

CHIRAMBADARE HURIPA NEPFUMO



Story by Phibie



CHIRAMBADARE HURIPANEPFUMO

STORY BY

PHIBION MANDONGWE

CALL OR APP

0774512473 or 0714160957

CHITSAUKO 1

"Mungangoti zvenyu n'anga yechikadzi
haioni mambo asi honai kuti muzinda
unosara washata kana mukabiwa
nevakatungamira musina kugadzira
nyaya idzi nokuti kana maonero angu
asiwovo hamenoo" vanodaro VaRusazu
mukadzi wamambo Chirambadare
vachipedzisa kukokota muhandyana
yaive yabikirwa mbeva ndokuiswa dovi.
Mambo Chirambadare vanomboti dhuu
vakabata rushaya vozeya nhau iyi

vachishaya pekuitanga napo. Pave
pashure vanogadzirisa pahuro
"Ndapanzwa asi hamenoo kuti
madzeyero andaita angave kwawo here,
ndoita kuti iye Chebamba achiroora.
Uyuvo Jeka sejinda rangu guru
ndochindomuvakira muzinda iye wake
kuya kwandaireva zviya". Vanodaro
mambo Chiramba vakaringa mukadzi
wavo mumboni chaimo. VaRusazu
vanobva vagutsuriravo zano reharahwa
yavo. Vanozoita zvavo dzimwe nyaya,
pave paya chembere inozobvunza "ko
iye samusha vamboindepiko
vandisingaoni" vanobvunza VaRusazu
vave kuunganidza midziyo yavo yaive
yapera kudyirwa. "Aaaa ungabvunza

Chebamba waunongoziva kuti ndewesango chete. Kunyangomuundira seruvisi rwotandira kuruzhowa, runomuka rwaendazve". Anodaro musharukwa akaringa tsoka dzake kuratidza kupererwa nezano.

"Zvaachapedzisira aita mufire wababa vake usina newakaziva chakadya chembere sezvo pasina chakarutse mvii, munoti hakusi kutsvaga kungozonzi pamwe akadyiwa nezvikara ikoku?"

Vanodaro vaRusanzu. "Zvino kana wakupa chironda mudzimu, ungapa mhaka kunhunzi dzinodya here"

Vanoramba vachikurukura nhau iyi kusvika vasunga rimwe rinove zano raive rauya navaRusanzu.

Mambo Chirambadare vaive vakaita
mwanakomana mumwechete asi
zvaingoitika mumuzinda wavo
zvaigarovarovesa nehana naivoo. Kufa
kwemachinda avo mamwe
kusinganzwisisiki. Zvakazopedzisira
zvaita kuti vazoerekana vashayavo
nechadya mwanakomana wavo
Mucharipa aive achangoroora mudzimai
achitove nepamuviri. Tadzei akazosara
ogarira mwedzi wegarapangoma atove
chirikadzi kare. Rombo rakanaka
mambo Chirambadare vachiunzirwa
chikatora nananyamukuta kureva kuti
mwanakomana aive azvarwa. Vakati
nyevenuei nokuti vaive voziva kuti
mwana wavo Mucharipa adzoka.

Chebamba ndozita rakazopiwa mwana
aive azvarwa. Sezvo vaive vasina
mumwe werudzi rwavo vese vakapera
nehondo vakazooka kuti vangaomesera
Tadzei/mai vaChebamba kuti vagare
vasina murume panguva yavakarumura
iye Chebamba. Vakabva vaudza
muroora wavo kuti asununguke zvake
kupfimbirwa nekuroorwa newaanoda
sezvo Chebamba aizosara ari mumaoko
mavaRusanzu. Sezvaineivo waive
mutevedzeri wejinda guru panguva iyoyo
ainzi Munaki aive achangoshaikirwavo
nemudzimai aive atotoravo mukana
iwoyo kuti apfimbire mai Chebamba.
Ichingovira hari yacho isati yasikwa kuti
richibikwa Munaki akabva amuka akafa.

Muzinda wese wakaungudza kuchema
Munaki sezvo aive munhu wevanhu.
Chiundura aive jinda raitevera Munaki
akarwadziwa kwazvo nekufa kwaMunaki
akasvikopengera vanhu vemumuzinda
"Muroyi iyeye ambotambarara
serunyemba ndiani chitopota ichocho
anozvishura kuripwa nepfumo?" Vanhu
vose vaiziva kuti Chiundura
chaasimudzira musoro haadzori
tsvimbo, nokudaro akabva apa zano
rekufamba kunamambo. "Kana wave
iwe jinda guru mumuzinda muno tonga
zvaunoda tikutevere tione. Sei usina
ruremekedzo iwe?" Rinodaro Jeka
remhino yakakwasha yakanamirwa
parume demadema kunge tsiga

rakatsva.Iri rume raizivikanwa kuti hapana aiti bufu kana raera ratonga.

"Nhayi mukuru ko kutadza kwangu apa ndekupi? Ndichingorevavo kuti dai chipfukuto ichi chaonekwa kuti chabvepi mumuzinda une rudekaro kuda.....?"

"Hihwee chirega kuramba uchindipikisa mhani imbwa iwe " anodaro Jeka atosimuka ndokunanga paive pakagara Chiundura. Mamwe machinda amambo anozosimuka kupfugamira Jeka kumupa ruregerero kuti Chiundura akanya zvake asi nyoka huru haizvirumi dai Jeka achiregerera Chiundura.

Runyararo runozovepo kusvika paurongwa hwekuti Munaki apiswe zvake muzinda wese uchimuchema.

Pakafamba mazuva kusvika mai
Chebamba vazopfimbiwa naJeka
ndokuzoiswa mumaoko ake voita
mukadzi wake ndokuzozvara zvavo
vamwe vana vatatu. Chebamba akura
ndiye chete muridzi weumambo mambo
Chirambadare vatevera madzitateguru.
Jeka jinda guru ramambo aive atove
mambo paari zvake sezvo aroora
mukadzi wekuumamboKunyange zvavo
mai Chebamba vainge vave mukadzi
waJeka asi iye Chebamba ainge
achizviona kuti hwake ukama naJeka
ndehwakiti nagonzo. Mazuva mazhinji
aizosarudza kugara musango hana yake
yamurambira kuswera kana kuvata ari
mumuzinda. Jinda rimwe chete

raaitombopota achida nhaurwa naro
ndiChiundura. Zvezuva raakabuda
musango achisvika mumuzinda
akapakatira mhara anosvikowana ruri
rumwiimwii kunge mafiwa zvikabva
zvamurovesa nehana. 'Regai ndione
Chiundura ndinzwe kuti chadya rufaro
chikasiya rusuwiso chingave chii'.
Anodaro asiya zvake usavi mubikiro
rambuya vake asina mazhinji
avapazirana. Anobuda ndokunanga
kusasa kwaChiundura munguva
dzekudyiwa kweremanheru.
"NdiChebamba here uyo" anorinzwa
zinzwi raakaziva. "Ee ndini maswerasei
babamunini" anodavira. "Taswera, ko uri
kuendepi uye unomboswerepiko

usingaonekwi muno"?."Ndambonoswera
zvangu kunovhima, apa ndichamboona
Chiundura akazosara nembezo yangu
musi wataiveza mipini" anodaro
Chebamba apa dzaive nhema dzenhema
chaidzo."Ihwo ukama hwaunoda kuita
naChiundura uyoka, rimwe zuva
uchaundurwa naye handimuchenesi
munhu iyeye nhasi chaiko ndaburana
naye padare zvokuti ungadai wawana
atsika nyikadzimu ndamunyudza bvumo,
dai wadzoka zvako warega kuendako
pamwe hana yangu yaitombodzikama.
Kana uchida mbezo huya utore imwe
kumba kuna mai vako dzizere uko".
Rinodaro Jeka richicheuka kudzoka
kusasa kwaro richida kuteverwa

mushure naChebamba. "Aaa
babamunini chiregai ndichiuya
kwachena mangwana mondosweresa
mai nanaChenai ikoko" anodaro naiyevo
atomupa gotsi kudzokera kumba
kwaambuya vake. "Sekuru vako
vatondotsivama zvavo asi
ndongokurumavo nzeve, musha uno
rave dongo chairo babamunini vako
ukasaisvunura unoitwa muranda iwe
vakatonga ivo muzinda uno. Nhasi
zvaitika padare zvapedza mate
mukanwa munhuwese naivo sekuru
vako izvezvi nesadza varikonewa.
Paunganidzwa vanhu vose vachipiwa
urongwa hwemakwenzi ekuzunde
ndokuturwa nhau yacho ndokubva

yapera, ndokubva vazoti?"

KUPERA KWECHITSAUKO 1

CHITSAUKO 2

VaRusanzu vanomira kutaura ndokubva varinga Chebamba uyo ainge ateya nzeve.

"Ivhiyei mbuya ndakateerera, ndoziva ini kuti sekuru havangopindi mudaunha nguva dzino dzekutandara asi paita kuvengi? Chii chabvongodza mvura yemuchitubu?" Anobvubva Chebamba

achiswedera pedyo nambuya vake.

"Zviripiko muzukuru , iyeyu Jeka jinda guru ndiye akonzera zvose izvi nenhau yako iwe Chebamba iya yawakarumwa nzeve na sekuru vako mambo Chirambadare" vaRusanzu vakabva vanyarara.

"Nhau ipiko mbuya zvimwe ndakoshiwa , sekuru vanogarondiudza nhau dzakawanda kwazvo" anotaura Chebamba.

"Mambo vaudza machinda avo kuti iwe wavakufanirwa kuroora asi vasati vapedza kutura shoko iri vabva vagurwa kamwe chete na Jeka, ati haisi nhau yekuvhiya pavanhu dai yananga kwaari sejinda guru vasati vaungana,

Nekuda kwekuti iwe wanga usipo vabva
vaimira vati mangwana anoyedza
vachaitaura nhambo dzichaungana
machinda padare sezvo kunoda
kunotemwa makwedzi kumunda wezuro
. Asi zvanyanya kuvadya moyo
ndezvokuti Jeka ava kuona mambo
kunge mwana wake uku nerimwe divi ari
mukwasha , handiti akaroora mai vako.
Zvimwe hukwasha ndohwaava
kushandisa kusvika pakupinda munhava
yamambo" vanotaura vaRusanzu
vachibva vasimuka. Chebamba
anoramba akagara pasi ndokutora
chikuni chemoto ndokuchitsotsonyera
pasi asi pfungwa dzake dzairatidza kuti
hadzichasi panzvimbo imwe. Haana

raakapindura panguva iyoyi.

"Ndava kunotsivama asi ndinoda
kukunyeurira kuti mangwana usabuda
muno mumuzinda pachataurwa nhau iyi
unge uripowo kuzoitira mangwana"
vanotaura vaRusanzu ndokubva
vabereka maoko avo kumusana ndiye
dhugu mumba ndokutekaira vakananga
kuhozi kwaiva kwainda mambo
Chirambadare murume wavo.

Chebamba anoona kuti mbuya vake
vanemashoko avasiya, asi haana kuda
kuvamanyira mberi semudonzo sezvo
garwe haridye chebamba charo inouya
nemuronga. Anosumuka ndokubereka
zvombo zvake kumusana ndokubuda
panze anomira pachikumbaridzo

ndokusunga gonhi. Achipedza akabva
ananga kugota kwake. Nguva iyi hapana
ainge achafamba famba kunze
kwevarindi chete vaioneka kumucheto
kwemuzinda vakarembedza zvombo .
Vaiti vamwe vakakwira vamwe vodzika
nyasi. Anoti ava kuda kusvika pagota
rake anoona munhu akangoti nzee seri
kwegota rake , nekuda kwekuti jena guru
rainge richivharwa nemakore haana
kuona kuti ndiyani. Anodududza achiida
mujinga meimwe tsapi yanga iri kurudyi
kwake painge pakadzikatira anoti
kududu ipapo ndokubva atanga
kugwesha semupurwa nedumbu
akananga kuneimwe tsapi yenzungu
yambuya vake. Achisvika ikoko akabva

anzwa gonhi ra Jeka richiti gwerere
kuvhurwa richiita ruzha ndiye dhwaga
kuvharwa kwaro. Chebamba akabva
aziva kuti uyu ndi Jeka hakuna mumwe.

Chebamba akabva apinda pasi pehwaro
yetsapi iyi , paiva neburi raakaboora
raaikwana asi mbuya yake havana
kubvira vaona buri iri . Sezvo paigara
pakagadzikwa dengu rezviyo. Akapinda
ndokubva avhara buri riya nedengu
ndokugara akazembera madziro.

"Jeka handisi kumuchenesa maitiro ake
ndinoona paine zvikuru zvakavanzika
zvaari kuronga zvino kana kuri kuti
anechokuita kwandiri anyagira yaaona .
Uye vanhu vangatsamwisana zvavo kuti
ini ndichiroora asi ini mambo

ndakavaudza ini kuti ndinoda kutanga
ndaziva kuti akauraya baba vangu
ndiyani . Kana munhu iyeye achiri
mupengu bvumo rangu iri rinofanirwa
kusukwa neropa rake. Regai kuyedze
timirire nhaurwa yacho padare
ndizvinzwire pamhuno sefodya. Asi
kana dare racho ratadza ndozviziva kuti
Chiundura anondipira mashoko ose
akaitika zuro" anotaura ega
nechemumoyo Chebamba uku achidzisa
zvombo zveke kumusana. Anosumuka
ndokuturura dehwe raiva rakaroverwa
pahoko mumadziro ndokubva afuka
sezvo jongwe rekutanga rainge rachema.
Zuva richingoti vhu-u Chebamba aiva
atobuda mutsapi maanga avata

runyanhiriri nguva yekudzoka kwemazizi,
ainge asingadi kuonekwa kuti ndimo
maakavata. Hapana kana munhu
akamutangira kumuka. Nguva iyi ainge
akamira pamusoro pechuru chaiva seri
kwegota rake achitenderedza meso
achiyeverwa nemuzinda wasekuru vake.
Uyo wainge wakanaka kwazvo. Muzinda
uyu wainge wakakura kwazvo zvekuti
waisaona kwawaigumira. Madzimambo
akapoterwa aiziva kuti mudunhu iri ndiyo
nyika yemagutwa. Mvura yaivemo
nechenyasi kwawo kwaiva nerwizi
rainge rwusingapwi rwainzi Mupembezi.
Ndimu mairaramira zvipfuwo zvedunhu
iri. Idzo mombe dzemukaka dzaiva
nemazamo anonzenzera pasi. Makwai

nembongoro nembudzi zvaiva fararira.
Waiva wakavakirwa mujinga negomo
rimwe chete rainzi Nyachibvi, gomo iri
raiva hombe uye riri kumavirira
kwemuzinda. Ndimu maiva neninga
yaivingwa madzimambo. Muzinda uyu
waiva wakatenderedzwa nerusvingo
rwemagwe waiva nemasuwo maviri
nguru nedoko. Suwo guru raiva
kumabvazuva diki ndiro raiva kumavirira,
kozoti chipukunyuko chaivapo asi
chaiva pakavanda. Minda ndiyo yaiva
kunze kwerusvingo . Vairarama
nekurima mhunga , rukweza, mabarwe ,
nzungu nenyimo kotiwo runinga.

Nguva yakatanga kumuka vanhu ,
Chebamba akabva adzika pamusoro

pechuru ndokufamba achidzoka
kumuzinda muruoko make ainge
akabata tsvimbo yenduni yaiva
nemusoro unenge wekarusvava kava
nemazuva mashanu kazvarwa. Pfumo
raiva rakanzi muchiuno kochekeche
dati remiseve rakagara rakatevedza
muzongoza wemusana, bakatwa
raionekwa kupekura nhembe
rakabairwa muhudyu. Anosvikonanga
padare apo pinge paine machinda ose ,
anosvikogara pachigaro chaiva
nechepakati pedare. Akabva amutsa
Jeka, "Mangwanani baba" koaigoti kudii
iye Jeka ariye akaroora mai vake ,
vakuru vakati murume wamai ndibaba.
Asi nechemumoyo aiti ini vangu baba

Mucharipa vakafa. Achipedza anobva amutsa Chiundura nemamwe machinda ose aisamirira kumutswa. Zvisineiwo mambo vakabva vasvika nguva iriyo. Ndokubva vagara pachigaro chavo chainge chakashongedzwa nematehwe emhuka dzakasiyana. Kumativi acho kwaiva nenyanga dzenzou. Chigaro ichi aiva matombo mana akagadzikwa raiva pasi ndoraiva rakaita hwendefa neraiva shure rinova rekuzembera. Ekumativi aiva akavezewa nemhizha ndokuzoisa nyanga pamusoro. Mambo Chirambadare vakamutsiwa nemachinda ava ose kusanganisira na Chebamba. Zuva iri mambo vanokatyamadzwa zvikuru kuona

muzukuru wavo aripo padare.
Nechemumoyo vakati ndiko kukura uku.
Chebamba anoringa Chiundura
ndokubva vatsonyana asi izvi hazvina
akaona. Mambo Chirambadare
vakaona iriyo nguva yekupanda
ravakasiira zuro panzira. Kana
vazopedza vozotaura yekutema
makwenzi sezvo vaida kuti mvura
yemunaya kamwe izoturuka votowarira
rukweza pasi. Vanokosora katatu
ndokutora chitende chaiva pasi
pechigaro chavo ndokupfira chikararwa
chakazangana neropa ndokurova rova
pachipfuva chavo.

"Machinda angu ndipeiwo nzeve dzenyu
ndaona zvakanaka kuti ndipedzise nhau

yangu nekuti Chebamba ari pano.
Ndovimba kuti hapana asipo uye kana
pane vasipo mozovaudzawo shoko iri
nekuti handina wandinosarudza
ndokudai zvakafanana. Ndovimba mese
murikuona kuti Chebamba abvezera uye
ini pano ndava hari yofanzirofa kureva
kuti ini ndikati dhi-i pasi apa , ndiye
achapfeka ngundu iyi" vakambonyarara
mushure mokunge vanhu vavakuita
mahon'era . Vakazosimudzira ndokuti,
"Nhau yangu dzeyokuti vakuru vakati
roodzanai vematongo, saka ini ndinoda
kuti jinda rine mwana acharoorwa na
Chebamba ndichamuvakira dunhu
rakewo kumacheto kwedunhu rangu
ovawo mambo, tarisai makuriro arakaita

ndoda kusiya ndazvigadzirisa izvi
ndichatsika uswa huchimuka. Saka
ndiwo mashoko" vanotaura mambo
Chirambadare vachibva vagara pasi.
Jeka nguva iyi musoro wake wakabva
watanga kuvira semhanga yadirwa
masvusvu. Anobva ati nyamwi paaga
akagara pfumo ririmuruoko.

"Changamire wangu regai ndikubatei
muromo ndichiti, hazvigoni kuti
Chebamba aroone chero bodo. Madii
masiira ini nhau yacho yose ndini
ndichamusarudzira musikana
wekuroona kana kumupa wangu
mwana oroora zvakaipai" anotaura
achibaira pfumo pasi.

Chebamba anobva ati sumu" nhai baba ,

hamuoniwo kuti hazviiti here, ndoora mwana wenyu sei imi makaroora mai vangu, handiti kana ndichiona vana venyu dzinenge dziri hanzvadzi dzangu" anotaira Chebamba.

"Kuti unenge waroora Chenai here akazvarwa na mai vako? , Ndagara ini ndine vakadzi vaviri unotora mwana wemukadzi wangu mukuru Shupikai". Anotaura zita remwana wake Jeka .

"Shura rakagochewa nyoka kudengezera chirongo" anotaura Chiundura achisumuka kubva paanga agere.

"Jeka Jeka hauoni kuti makuna kuna here iwawa. Chebamba kuroora mwana wako Shupikai sei? Izvi zvinokonzera kuti vadzimu vatituke mvura chaiyo

hainai. Zvirinani ku-----" Chiundura
haana kukwanisa kupedza mashoko ake.
Jeka haana kufadzwa nekutaura kwa
Chiundura zvikatiwo vagara
vakarimirana muganhu , Jeka anodzura
bvumo rake pasi anoruma muromo
wepasi akafinyamisa chiso pahuma
ndokuzara mananda mananda.
Anoregedza pfumo kuna Chiundura
uyo ainge akatovarairwa. Chebamba
achiona izvi anokwakuka kubva paanga
ari nekuchimbida pfumo parainge
rosvika pana Chiundura , Chebamba
anoregedza tsvimbo yake zvinesimba
ichibva yasvikorova pfumo ra Jeka
rakabva rawira kwakadero hwiriko
yepfumo ichibva yati nepakati pwa-a ,

utezvero uchiinda kwahwo hwega.

KUPERA KWECHITSAUKO 2

CHITSAUKO 3

Rakava gangaidzwa mukwenyi wemhezi. Hapana akasara aine mate mumukanwa Yakava mhere mhere padare , Mambo Chirambadare zvinovakatyamadza zvikuru asi remuromo vakarishaya.

"Handidi zvekupikiswa nendumurwa inenge iwe Chiundura, ndokuundura sezita rako iyezvi" anotaura Jeka

achiviruka kuna mambo ndokubva
abvuta tsvimbo yamambo kuti aparadze
Chiundura. Asi Chebamba akati kufa
kwemurume hubuda ura anovirukawo
ndiye dzvi-i tsvimbo ichiri muruoko ma
Jeka.

"Mapindwa nei nhai vaJeka. Sei muchi--
-?" anotaura Chebamba asi akagurisirwa
munzira.

"haugoni kuti baba here, kundizvidza
ikoko ndiri baba vako ini garapasi ini
ndichenese dunhu kwete Chiundura"
anotaura Jeka achipupa furo. Mamwe
machinda ainge achiti mwiro aiziva kuti
Jeka haasi wekudheerera anokuendesa
nyika dzimu. Nguva iyi Chebamba
akanga atsamwa chiso chake chainge

chazara tsinga makumbo ake nemaoko
zvainge zvohuta. Ziso rainge rakatsvuka
sererovambira yavhiringwa mubako.

"Jeka tsvimbo ndeya sekuru uye iri
yeushe kana wadai watambira
kunonyudza. Kana ndichifa nhasi
uchandiuraya ndopika na baba vangu
Mucharipa varere pachuru icho regedza
tsvimbo nekuchimbida" anotaura
Chebamba achivhizhura ndokutsvetuka
achiita kugwonha tsvimbo . Jeka
anoregedza tsvimbo yamambo asi
anotatarika ndokudududza ndokumira
nemadziro edare sezvo rainge
rakarongerwa matombo kumativi kuitira
mhengo.

Chebamba anofamba achinanga paiva

namambo ndokubva avatambidza
tsvimbo yavo. Chiundura nguva iyi ainge
awira pasi ndokurovera padombo
negotsi ropa rainge rava kubuda
senhongo yabaiwa. Rimwe jinda rainzi
Mugauri rakabva radambura chitehwe
chegwizo chaiva mumusoro make
ndokusunga Chiundura musoro kuti
ropa risanyanya kubuda.

"Ndava kutema shoko rekupedzisira,
ndoda kukuyambirai kuti
anemwanasikana wandichaona
achifambidzana na Chebamba ndine
urombo naye mwana na baba vose muri
kuinda nyikadzimu" anotaura mashoko
aya achibva agara pasi. Mambo vakabva
vati sumu. Vanotora nguva vakanyarara

ndokuti ,

"Machinda angu Chirambadare huripa
nepfumo garai mazviziva izvozvo. Jeka
ini ndirikutoti ndiwe unotungamirira
vanhu asi ndiwe wavapamusoro
nemhirizhonga tingasvikepi tichiita
zvakadai. Rudo rwangu ini kuda kuitira
munhu aroorerwa nemuzukuru wangu.
Kana ini ndikangoti hazvichaiti ndini
saka bopoto nderei" vanotaura mambo.
Asi Jeka akabva asumuka asina
raataura ndokunanga kusasa kwake
achiita kufambisa anosvikovhura sasa
nehasha ndokurovera achivhara
anozviwisira pachigaro chaivemo.
Vanhu vose padare vakazvishaira
donzvo.

"Chirambadare huripa nepfumo. Ndiwo mashoko angu uye hakuna mwena usingagumi handidi nemashoko angu sarai mupete dare mondibatira kuzunde kumakwenzi" anotaura Chebamba ndokubva atobva padare anotora demo rake ndokufamba akananga suwo guru.

"Hapana achasara mese chitoteverai Chebamba mangwana anoidza ichanoisa rukweza" vanotaura bambo machinda ose anosumuka kubva padare asi mumwe nomumwe ainge asina remuromo . Mumwe nomumwe anotora demo rake vamwe ndivo vakatora mapadza ndokubva vatonanga nesuwo guru vachitevera kwainge kwainda na Chebamba. Mambo vakasara vagere

padare nemajengeta mambo avo asi
waiona chiso chavo kuti chakasvava
semazhizha emuboora arohwa nezuva
remuchirimo.

'Asi Chirambadare ndiko kundidzikisira
kwaari kundiita. Ini ndini ndakaroora
mwanasikana wake akadii kugara
andipa dunhu racho sezvo ndakaroora
muimba yeushe ndini mukwasha wake
mumwe chete . Nhasi zvonzi aroorerwa
na Chebamba ndiye achapiwa dunhu?
Hazvigoni panozvarwa mwana asina
bvudzi ndonzi Jekachekeka ini
remadunhurirwa. Zviri pachena kuti
Chebamba ndiye mambo werino dunhu
zvino Chebamba ndava kutomupfuudza

zvandakaita baba vake Mucharipa
pamwe na Munaki. Ndikamupotsa ivo
mambo mbune ndinoendesa nyika
dzimu . Ndava kutotevera kuzunde
ikoko dunhu rino ndini ndichatonga
kusvika mbongoro dzava nenyanga
bvudzi rangu kutanga kuchena kudai
ndaona zvakawanda ini', anotaura Jeka
achibva asumuka anoturura rimwe
pfumo raanga akabairira muberevere
remba ndokuturura katemo kake kaanga
akatumidza zita rekuti Tonongei.
Kakangobairirwa muhudyu achibva
atobuda pasina waataura naye
ndokutevera kumunda uko kwainge
kwainda munhu wese kusara
kwevakadzi avo vaine vavanemufaro

wafuruka. Hapana ainge achiziva kuti
chii chatora nzvimbo padare. Vaiva
nehana nhete vaininge vatozvivharira
mudzimba dzavo.

Mambo vaininge vakangoringa Jeka uyo
ainge otevera kuzunde ramambo. Aiita
kukanda nhambwe. Anosvika pasuwo
guru haana waakataura naye
panevarindi vaivapo. Chiso chainge
chakaita kunge chakarumwa nemago.
Anoteremuka akananga divi
rechamhembe kwaiva nechikomo
chainzi madidi mujinga macho ndimo
maiva nezunde ramambo. Haana kuda
kutanga nekungosvika akananga
muchikomo cheMadidi ichi

ndokutanga kuringa zvose zvaiitika.
Anoona Chebamba akagara na
Chiundura. Chiundura aiita kuzunza
maoko ake atendeka kudenga gumbo
richitsika pasi. Vakatora nguva yakakura
vakagara zvose izvi zviri mumeso aJeka.

"Ndichaugura muswe uyoyu zvangu"
anotaura Jeka ndokubva aridza tsamwa
anodzika muchikomo ichi
ndokusvetuka ruzhowa achibva awira
mumunda. Anovhomora Tonongei
chitemo chake chiya muhudyu
ndokutanga kufamba achiinda kuvanhu.
Asi akawana makwenzi avakupera .

Jeka anosviko tenderera munda wese
asina waataura naye.

"Chimbidzai nhasi munda uno

unofanirwa kunongwa majanga maviri
opiswa nhasi" anotaura achishevedzera
Jeka. Machinda ose hapana akapikisa
Jeka pachake aityiwa kupfuura mambo.
Anotemwa makwenzi vachipedza
ndokubva vaunganidza majanga.
Vachipedza. Rimwe Jinda rinonzi
Mundione rakabva ramanya kunotsvaka
muti wemuHubvu. Akatora zvimiti
zvitatu ndokudzoka kumunda
anosvikosika zvimiti zviya chimwe ainge
achitsemura haana kutora nguva moto
wainge wabaka vanopisa majanga ose
munda uchibva wati ruru kuchena. Zuva
richingorova nhongonya munhu wese
akabva adzokera kumuzinda asi Jeka
haana raakataura.

'Apa kuti tsoro dzangu dzibude bhobho
zuva rechisi musi wechina
ndichamobata jongwe muromo
ndakananga kwa sekuru Gonamavende
n'anga yangu. Nekuti hazvichadi kuvata
nezamo mumukanwa iro svikiro
ndakauraya nyore nyore . Ndichatanga
ndagara pasi nemachinda angu toronga
dare kuti torova sei musoro
werovambira iri nekuti ringatikobora
nhongonya. Chebamba aita chana
chaicho pandiri anotaura ega Jeka ari
shure kwevanhu vose vachikwidza
kuinda kumuzinda. Jongwe remasikati
richirira ndiyo nhambo yavakasvika
pamuzinda nekuda kwenzara mumwe

nomumwe akananga kusasa
kwemukadzi wake kunotsvaka chekuisa
mumukanwa. "Chiundura ndichauyako
kumba kwako kana zuva radeuka regai
ndinoona kuti mbuya vabikei mudumbu
rangova gomba" anotaura Chebamba.

"Wochimbidza zvakawanda totaura
tichiinda kunogeza" anotaura
achicheuka .

Chiundura anosvikowana mukadzi wake
akagara padehwe achishara nzungu
dzembeu.

"Mungadzipedza mega here kusarudza
mai mwana" anotaura Chiundura
achigara pachigaro chake. Asi mai
Svinurai vanoramba vakaringa murume
wavo meso avo ainge atsvuka misodzi

yajenga mumeso. Vanokasira
kuzvivanza mushure mokunge Svinurai
mwanasikana wavo apinda akabata
tsotso dzavainge vamutuma panze.

"Ndingabatsirwa naniko, handiti dai
Svinurai uyu yavamhandara dai ariye
ava kuita basa rose iri kunonoka kuzvara
kwakashata , chipfuva chichiri ruware
ichochi . Asi nhai baba mwana. Vakuru
vakati kumedza bhonzu kuvimba nehuro
mungadenha mago imi musina
makumbo munorumwa. Moda kundisiya
ndiri shirikadzi here? Jeka
ndewekupikisa here tarisai manga mafa
ndinogarotaura kuti kunyarara
kunokunda kuhwereketa tarisai nhasi
Munaki aripi" anotaura mukadzi wa

Chiundura achiratidza kusagadzikana.

"Inga gonzo rinongonzi hero hero wani
mai mwana, zvimwe munyama waro
wagara pandiri. Zvinoita here kuti
Tapiwa mwana wangu uyu aroore
Svinurai uyu?" Anotaura Chiundura .

"Bodo agova makuna kuna here"
vanotaura mai Svinurai.

"Ndiyo yandanga ndafira iyoyo. Jeka
anga achida kuti Chebamba aroore
Shupikai mwana wemukadzi wake
mukuru mushure mekunzwa mambo
vachiti munhu ane mwana acharoorwa
na Chebamba ndichamupa umambo
ndomugurira muzinda wake. Ini
ndikabva ndati kwete makunakuna aya .
Ndokubva atopotsera pfumo dai asiri

Chebamba dei wavashirikadzi iwe mukadzi wangu!, Ndipei sadza ndidye ndinoda kuzonogeza tarirai ziya iri" anotaure Chiundura.

Mai Svinurai vanoshama muromo , ndokubva vatarisa mwana wavo Svinurai ndokubva vadzungudza raiva jeza chairo "Asi ndokuudzai kuti motamba makangwarira chero kumadoro kwenyu hazvichadi kuita musiya dzasukwa. Ndoshaya kuti daka nemi riri pai munofunga kuti Chebamba angaroora Svinurai here asati ava nebunha . Aifanirwa kudero kana dai avachikuku choita kuuraira vayenzi" vanotaure mai Svinurai vachigadzika Chiundura sadza raiva mudiro yemuti, raiva

nechimukuyu chemhara. "Chiregai tione kuchawira tsvimbo nedohwe" anotaure Chiundura ndokubva atanga kudya sadza.

Musi uyu murume vese akasvikoudza mukadzi wake shoko rainge rataurwa namambo rekuti aroorerwa na Chebamba achapiwadunhu rake. Zvakaunza mufaro mudunhu asi nekuda kwekuti mhandara dzaiva dzakanaka dzaiva dzakawanda kwazvo zvakaite kuti mumwe nomumwe afungewo zvake sezvo hapana aisada kuzova mambo.

Vakawanda vavo vakatanga kuda kuinda kudzin'anga kunotsvaka runakira kuti vana vavo vaonekwe na Chebamba.

Zuva parainge rorova huma

ravakunanga kunonanzva mhanza
dzemakomo. Ndiyo nhambo yakabuda
Chebamba na Chiundura nedivi
rekumatanga vainanga kurwizi
Mupembezi kunogeza.

"Chiundura ini hangu handisi n'anga asi
ndinoda kukuruma nzeve asi wobata
mashoko angu" akabva anyarara.

"Taurai zvenyu changamire
ndakateerera tione kana riine punduso
shoko renyu" anodavira Chiundura
achibva agura uswa ndokutanga
kunon'ona meno ake ainge akapakanwa
netunyama.

"Mambo vachimbidza kumedza. Ndaona
dunhu rinora-----"

"Chebamba hei Chebamba" rinonzwikwa inzwi dete shure kwavo izvo zvakaita kuti Chebamba atadze kupedzisa zvaainge achida kutaura vanocheuka nguva imwe ndokuona ari Shupikai mwanasikana waJeka wemukadzi wake mukuru.

Chebamba anomboramba akanyarara ndokubva ati.

"Kwakanaka here hanzvadzi yangu" anodavira Chebamba.

"Hongu ndaona uchibuda apa ndikati tifambidzane ndirikuinda kuhuni vamwe vandisiya, nhambo yandanga ndichishambidzika" anotaura Shupikai chiso chake chainge chakazorwa ivhu dzvuku repachuru.

"Handisi kubuda muno mukati ndirikuda
kunoonakubuda nembudzi madeko
ndiise bango ipapo dzingadyiwa
nemapere" anotaura achinyepa
Chebamba, mupfungwa dzake akangoti
dziri tsitsidzei tsvimborume kubvisa
mwana wemvana madzihwa.

"Ndafunga kuti muri kunogeza ini saka
hakuna kwandichainda hangu ndinga
dyiwa nezvikara ndega ndabuda suwo,
chitora hako matohwe aya andanga
ndichida kutsenga ndichivarairwa "
anotaura Shupikai.

Chebamba akabva atambira matohwe
aya, Shupikai anonyemwerera ndokubva
atendeuka achidzoka kumuzinda.

KUPERA KWECHITSAUKO 3

CHITSAUKO 4

Vakuru pavaiti madziro anenzeve aisava manyepo. Kushevedzera kwakaita Chebamba na Chiundura kuti kana rarereka tonogeza. Zvose izvi zvaiva munzeve dza Jeka sezvo aiva shure kwavo. Jeka akabva anyemwerera achipota neseri kweimba hoyo kusasa kwemukadzi wake mukuru mai Shupikai. Anosviko mira pamusiwo akabata pamusoro pegonhu ndokubva ati.

"Mai Shupikai idouya kuno kuhozi

nekuchimbidza chinono chinengwe"
anotaura Jeka achibva atorurama
kuhozi kwake.

"Shupikai sara uchipakura sadza woisa
murusero pandinodzoka ndopa baba
vako" vanotaura mai Shupikai
ndokusimuka ndiye dhugu pamusiwo
vanopesvaira vakananga kuhozi.

Vanosvikowana Jeka akamira
achitenderera nesasa .

"Ndauya Chasura ripandei
ndakateerera" vanotaura mai Shupikai
nemutupo wa Jeka vakapfugama. Jeka
anofamba ndokubva afamba akananga
pachigaro chake ndokuita kuzvipotsera
ipapo.

"Kwakanaka here Hungwe mufaro

wenyu zvaunenge wakatama zvadii chasura asi paita muvengi?" Vanotaura mai Shupikai.

"Mukadzi wangu muzinda uno unoda kundizvidza asi ndopika neruboshwe. Chinzwa mukadzi wangu nhau iri pano ndiri kuda kuti Shupikai aroorwe na Chebamba topiwa dunhu unozviona sei" anotaura Jeka. "Ose machena hapana dema. Ushe ndohwatakagarira panoka" vanodavira zenze ramira serem bongoro ririkudzingirirwa nebere.

"Wapedza mukadzi wangu ndikosaka ndichikuda unonzwisisa zvino Chiundura wati tana kuramba musoro wake kuita dombo sehuyo kuoma kuti gwa-a kunge damba kwanzu he he hazviiti hee chino

nechino , kuti iye apiwe dunhu namambo,
izvezvi shungu dzangu dzakawanda
kwazvo".

Anotaura Jeka ziso richinge chiropa.
Mai Shupikai vanosumuka
ndokupuruzira mhanza yaJeka
ndokuitsvoda katatu ,

"Musatya Chasura ndichaita zvekuti
Shupikai aroorwe naiye Chebamba
ndizvo zvangu izvozvo zvitete kwandiri",
vanotaura.

"Kuti shungu dzangu dziserere
idombondipawo ndirime gombo iyezvi
pamwe ndingafunga zvakanaka"
rinotaura Jeka inzwi richizhozhoma
richinanzvira maromo aro. Munaita
runyararo kwekanguva musasa umu

dzamara vapedza.

"Ndinotenda bvuzhi jena" anotenda Jeka nemutupo.

"Ndimi magona Chasura, asizve ini maonero angu ndeekuti-----" mai Shupikai vakabva vabatwa muromo na Jeka ndokuti.

"Ngatichirega kuwanza mambo pachitehwe cheshindi, izvezvi Chebamba anoda kunogeza na Chiundura saka ndoda kuti nhambo yavachabuda , Shupikai anofanirwa kutevera shure kwavo vozobatana vavakusuwo. Asi ndoda kuti azopa Chebamba matohwe aya andaisa mupfuhwira . Akangodya bedzi tsoro yedu yabuda bhobho. Saka iwe izvezvi

shevedza Shupikai auye pano tomuruma nzeve" anotaura Jeka. Mai Shupikai vanosumuka ndokunoshevedza mwana wavo nenguva isipi vakabva vadzoka na Shupikai. Jeka anotsanangura zvose kuna Shupikai uyo akaratidza kufara nazvo akabva ati.

"Ndichayedza nepose kuti andiroore, uye kuti avate neni saka kana zvangoderero ndoti maisakwa nyemba kutsva dzarungwa ndoziva kuti ipapo baba munenge matambarara sorunyemba dunhu ravarenyu . Pane ndingatozovhiringwa nedzimwe mhandara dzakandikurira kunaka pachiso sa Chiyedza mwana wa Gunanga na Tutsirai mwana wa Ndoro"

anotaura Shupikai.

"Izvo siira ini iwe inda unopa Chebamba matohwe aya iwe unodya iri kana wava kwaari aya usabata . Chiinda unozvishongedza wogara bvute retsapi apo ukaona vana Chebamba vava kubuda iwe shure tevere woita zvandataura" anotaura Jeka, Shupikai akabva anyemwerera achibva abuda.

"Kuti zviite mutsindo madii kuti titange tapfuudza mai Chebamba zviite nyore sezvo chirikuita kuti zvinzi hazviiti ndivo mai ivava" vanotaura mai Shupikai vachinge vagarwa. Jeka anoramba akanyarara akatarisa panzvimbo imwe chete.

"Wareva dama rega titange taona kuti

Shupikai musungo wake unopotsa here .
Tora sadza undipe ndidye dumbu rangu
rangova gomba" anotaura Jeka.

Mukadzi wake akabva anotora sadza
ndokuuya naro Jeka anodya dzamara
apedza. Zuva richingorerereka ndiyo
nhambo yakabuda Shupikai akatsvinda
kwazvo izvi zvakaonekwa nevamwe
vasikana vemumuzinda ivowo vainge
vanzwa shoko rekuroorwa . Jeka
akanyemwerera achiona mwana wake
ainge atononokerwa nekunzwa zvainge
zvabuda kumatama aChebamba.

Papera chinguva mushure mekunge
Shupikai abuda vakazomuona ava
kudzoka , asi Jeka zvakamushamisa
kuona mwana wake achichimbidza

kudzoka. Shupikai akasvikonanga
muhonzi maiva nababa na mai.

"Kwanzi naChebamba ndirikugadzira
chirugu chembudzi handisi kuinda
kurwizi saka ndaona kuti kudzika
kwakanaka" anotaura .

"Chirugu chipiko chaanotaura. Ko
matohwe wamupa here andakupa aya"
anotaura Jeka akasunga chiso.

"Hongu ndamupa" anopindura.

"Wagona chero ukachiinda hako tsoro
yanaka ndatova mambo ini munoti
mambo Chasura" anotaura nyemwerero
ichisvika kugotsi. "Mangwana kana
tabva kunorima ndinoda kufamba
zvemazuva matatu. Izvezvi ndinoda

kumbonoona Dapi na Madzorwe na Urahwatasva ndine dare navo" anotaura achitobuda musasa asi mufaro wainge wakamuputira.

Chebamba anoona nyemwerero ya Shupikai yakamurovesa nehana zvakaita kuti arambe akamutarisa. Anozobvisa meso ake ndokutarisa Chiundura uyo ainge ava chinhambo. Chebamba anomanya dzamara asvika paiva na Chiundura.

"Chiundura zvekugeza nhasi ngazvikone isu hande tinozembereka padanga rembudzi apo. Ndoteyewa nematohwe handisi gonzo rinoteyewa nenzungu bodo" anotaura achirasha matohwe aya.

"Ndazviona asi ndati ako meso ngaaone.

Ibasa raJeka iri , asi ndoda kuti apa
wotamba wakachenjera semhakure
nekuti muzinda uyu washata" anotaure
Chiundura .

"Ini ndoona sekuti sekuru
vakachimbida kumedza kutsenga
vachada. Vaisafanirwa kutaura ndisati
ndaroora mashoko aya. Asi nerimwe
divi ndinoti haisi mhosva yavo sezvo
vachida machinda avo zvakafanana. Asi
ini Chiundura ndinoda kutanga ndanzwa
kuti ndiyani akauraya baba vangu
ndoza zvose izvi ndamuwana asi
kana akafa bvavanonopedzerana
nyikadzimu ikoko.

"Nyaya yako ndirikuinzwa Chebamba asi
ukatanga izvi unosiya nyemba nekuti

muno mune minzwa iri mundove
yakawanda yausingaoni iyeni pano
hapana chandisingazivi . Asi ziva kuti
hakuna mwena usingagume , ivava baba
vako ukatevera matsimba avo
zvakanwanda uchazvionera pamhuno
sefodya. Kuroorwa kwakaitwa mai vako
iwe zvaitika angu meso akaringa dai
sekuru vako vaida kutaura zvimwe
vangadai vakakuruma nzeve" anotaura
Chiundura asi aisinga mativi ose vainge
vakamira padanga rembudzi .

"Nhasi uno ndonogara navo pasi. Asi
mangwana ndichafuma ndisiri muno
mudunhu ndinoda kumbovhima asi
zuva randichauya pano handizivi
ndaudza iwewe" anotaura Chebamba.

"Wafunga kupi Chebamba ukatadza
kuuya totevera tiine gwara zvino
ukasataura tosara tiri murima" anota
ura Chiundura.

"Kuno vhma chaiko ndiko kwandiri
kuda kuinda toonana zuva randichauya
ndichabuda muno jongwe repiri,
ngatichidzokai zvedu kumuzinda sekuru
vati vanemashoko neni" anota
uraa Chebamba.

Vaviri vanofamba kudzoka kumuzinda
asi zuva rainge ratsvuka semazimbe.
Vanoparadzana Chebamba ndokunanga
kusasa kwaiva nambuya vake.
Anosvikowana vachimona sadza
rerukweza.

"Ava manheru mbuya nhasi machimbidza kubika kudai asi sekuru vavanenzara su?" anotaura achigara pasi.

"Manheru muzukuru , ndati sezvo sekuru vako vaswerera mutetenerwa ndikasire kubvuwa kasadza vadziise mapapu. Usati wagara idoinda kuhozi kwavari uko vanga vachikubvunza saka vasiya vati kana wasvika uuyeko" vanotaura vaRusanzu vachikokota mugoti wesadza.

"Regai ndinovaona izvozvi ndagara ndine nhaurwa navo" anotaura achitobuda musasa. Nguva iyi zuva rainge rapinda munamai varo. Anosvikowana sekuru vake vachisvuta

bute vagere pfumo rakazendamiswa
pamafudzi.

"Manheru sekuru" anotaura achigara
pasi.

"Manheru muzukuru chokwadi haugari
pasi muzukuru nguri ndakushevedza,
chera maheu umo andasiya umwe
uswedere pedyo neni apa" vanotaura
sekuru vake. Chebamba anoita
sekudero anochera maheu ndokugara
pedyo nasekuru vake.

"Wavhara goni here madziro ane nzeve
aya" vanotaura.

"Hongu sekuru ripandei tinzwe" .

"Unoona muzuku zvawadai wakura ,
ndoziva kuti ungangoshora zvandataura

padare asi chinoziva ivhu. Handiti
unoona Jeka uyu ndakagara ndaona divi
rake ndikosaka ndataura mashoko aya
paruzhinji kuitira mangwana. Hazvigoni
kuti iwe uroore mwana wake iye
akaroora mai vako. Ndi hwo hudyire
ihwohwo , sekuziva kwako kuti dunhu
rino rinezvaro mwedzi hauperi pasina
afa , saka usavarairwa ndiwe mwana
wangu wandakatarisira umambo
ndichasiira iwe. Zuva randichanzi
ndatungamira handiti unoona pakati
peimba ino apa pandakaisa rushoka
rwangu unochera ipapa zvauchaona
ndizvo zvakabata dunhu rino ndicho
chikuru chandakushevedzera" .
Vanombomira kutaura kwekanguva ,

Chebamba aingogutsurira musoro wake. Vakabva vazosimudzira ndokuti, rimwe zuva ndichainda newe kuninga kana mvura yaturuka ndonokukumanisa nevadzimu vangu. Handizivi kana iwe uine mashoko".

"Zvamataura ndazvinzwa sekuru. Asi ini ndinoda kuti mudiudzewo kuti baba vangu Mucharipa vakafa sei" anobvunza mambo vanoramba vakanyarara asi chiso chavo chainge chasvava vainge vava kufunga mwana wavo . Vanotora bute ravo ndokubva vasvuta katatu vachiita rekupfokera mumhino.

"Chebamba , nepokutangira chaipo handina , asi chandinoziva baba vako vakafuma vakafa musasa mavo asi zuva

iri mai vako vainge vasipo asi
chakandinetsa hapana kana vanga kana
pfumo kana bakatwa rakabaya. Vakafa
vari vapenyu Chiundura ndiye aiva
sahwira wababa vako asi nemoyo wake
handingamupi mhosva sezvo masikati
acho Mucharipa aive k aswera pano
pamusha. Takazoona angova mumba
make chava chando" vanotaura sekuru
vake asi misodzi yekutambudzika
yainge yoturuka kunyangwe naiye
Chebamba.

"Ndanzwa sekuru , chinobhururuka
chinomhara, ini mangwana ndichange
ndisipo ndoda kumbonovhima
ndichabuda ndega" achipedza kutaura
mbuya vake vakabva vapinda nesadza.

"Rume rimwe ringakomba churu here iro sadza rinonaka kudya makawanda inga vamwe vezera rako varipo washaya kana mumwe here muzukuru" vanotaura sekuru.

"Bodo sekuru mbeva zhinju hadzina marise zvakawanda tokurukura ndadzoka" anotaura achisumuka.

"Zvakanaka muzukuru" vanodavira sekuru vake asi Chebamba ainge atobuda. Akananga kusasa kwake ndokunotori miseve yake yakazara dati bakatwa pfumo aiva naro ndokudzoka kuimba yekubikira ndokudya sadza rake raiva raiswa pajinga pemoto. Anodya dzamara apedza zuva iri haana kuda kuvata kugota kwake. Akatora nguva

arimo muimba yekubikira muzinda wese
wainge wanyararwa kwava kunzwikwa
ngonono badzi ndiyo nhambo yakabuda
Chebamba muimba yekubikira. Anoti
ava pachikumbaridzo anoona varume
vana vakadungamidzana vachipinda
mumba ma Jeka gonhi richibva ranzi
dhwaa. Hana yaChebamba yakabva
yati dididi kaviri akabva atura mafemo
sezvo vanhu ava akavaziva pavakapinda
vaivhenekwa netsvatsva yaiva ichipfuta
mumba umu. Akabva atisverere
nemadziro aida kunonzwa chairongwa
mumba umu. Pasina nguva ainge
asvika ndiye kwati kwati nemadziro
nzeve kwangwa satsuro magen'a.

KUPERA KWECHITSAUKO 4

CHITSAUKO 5

Ateya mariva murutsva haachaty
kusviba magadziko. Kunze kwakati
kwati mwiro pwere dzavakutanga
kunyorovesa machira neweti , ngonono
dzava kubvumirana. Jeka anobuda
musasa make ndiye verere senyoka
hoyo akananga kusasa kwa Dapi.
Anosviko gugudza , Dapi haana

kunonoka kudavira.

"Shevedza vamwe vauye kuhozi kwangu
tiite dare nekuchimbida usiku huno
inorohwa ichapisa" anotaura Jeka.

"Ririmunzeve changamire wangu regai
ndiite saizvazvo" anotaura Dapi
ndokubva Jeka adzoka kusasa kwake
achinyahwaira semuroyi musana wainge
wakavhuniwa semukweguri.

Dapi anonanga kusasa kwa Madzore
ndokunomutora vanonanga kwa
Urahwatasva ndokuzopedzisira nekwa
Mhodzongwe. Vanotungamidzana
vakananga kusasa kwa Jeka uko
kwainge kuchipfuta mwenje .

Vanosvikosunda gonhi iro rainge
rakaita kutsedeurwa vose ndokupinda

mukati, vanosvikogara pazvigaro
zvaivemo Dapi ndiye akazoshaya
pokugara.

"Tora hari iyo utsindikire ugarire nguva
dzirikudyanana" anotaura Jeka.

"Changamire wangu handizotandi botso
here ? Ihari yamai Shupikai kaiyi
ndikagara inotsemuka" anotaura Dapi.

"Hari iyoyo haina kumbokosha kupfuura
nhaurwa iri pano tora totenda
yatsemuka ikezvino dzichiri ngano"
anotaura Jeka. Dapi anotora hari
ndokubva ayigarira.

Mumba munomboita karunyararo
zvishoma , Jeka akabva ati,

"Machinda angu muzinda uno washata

mazvionera pamhuno sefodya , saka
dare rino nderekupangana mazano ini
ndini ndinofanirwa kuita mambo. Saka
zviripano Chiundura ndiye ari kukura
musoro anofanirwa kufa zvikadero
mambo vava nyore kupfuudza saka
achapfuudza Chiundura ndiyani pakati
penyu muri vana , ini ndini ndakapfuudza
Mucharipa na Munaki iyezvino iri basa
ndopa imi sezvo inini pano
vavakunyumwa nyumwa sehanga"
anotaura Jeka. Munomboita runyararo.

Zvose izvi zvaiva munzeve dza
Chebamba uyo aiva mumadziro .
Chebamba nhambo yaakanzwa Jeka
achiti ndini ndakauraya Mucharipa baba
vake iye Chebamba . Anonzwa hashu

kuzara maari shungu anoridza tsamwa
ndokubva simuka nekuchimbida ainge
oda kunopinda musasa umu. Nhambo
yaainge ava pagonhi imwe pfungwa
yake yamuti!, 'Wadireiko kusasika ura
pachitsiga kuti hudyiwe nemakunguwo' .
Nguva iyi akabva adududza asi
achipukuta misodzi.

"Ndanzwa kunge pane chirikufamba
panze apa varume mukati hapana
munhu here pamusiwo apa" anotaura
Urahwatasva akaita kurereka musoro
wake meso achinge nyimo.

"Nzeve dzako dzakaita seiko iwe
Urahwatasva unodiiko kunon'onewa
mapfunze wanyatsonzwa zvakanaka
,iwewe wega wobva wanzwa mutsindo

isu tatadza kuunzwa asi uri kutya kani"
anotaura Madzore.

"Hamumuzivi here Urahwatasva
ndobasa rake zvimwe ari kurevesa
tingasvora mbodza neinozvimbira Dapi
sumuka udongorere" anotaura Jeka.
Dapi anosumuka ndokubva atsedaura
gonhi ndokubva akanda meso ake
panze, anoridza tsamwa achivhara
gonhi.

"Haa!, Imbwa dziripamurundu zvadzo ,
ndaona imbwa hadzi iya chena
yakatodanhiwa nerimwe zidemadema
rembuya iya iri nyasi uko.

Kundisumudzira kuona imbwa ini"
anotaura Dapi achigara pasi. Nguva iyi
Chebamba ainge okwenya mhino

nekasiyanwa , akazotura mafemo
mushure mekunzwa kudzoka kwa Dapi
musasa.

"Chinzwai varume , ini ndaona
zvakanaka kuti iwe Urahwatasva na Dapi
ndimi muchauraya Chiundura. Nduru
yegarwe iyi momuisira mudoro kana
mumaheu . Mangwana chaiye
parikurimwa rukweza kunenge kuine
doro saka handizivi kuti muchaita sei
kutimupfuudze asi ini ndichange
ndisipo ndinoda kuinda kwa
Gonamavende ndichaita mazuva matatu
ndisipo pano, kana kuti momupfuudza
ndadzoka izvezvi sanai kuita ushamwari
naye. Iwe Madzore na Mhodzongwe

ndinoda kuti mupfuudze Chebamba
mhandara yaafambidzana nayo asiri
Shupikai ngaafe handizivi kuti
muchauraya sei chero nemiseve
nhambo yavanoinda kumvura kana
kupindira munhanga usiku asi haikona
kubatwa. Ini ndinoda kutamba
namambo Ndomene . Pane anopikisa
here zvatataura ataure dama rake"
anotaura Jeka.

Hapana akapindura vose vakabva
vabvumirana nazvavainge vasunga.

Jongwe rekutanga rakabva rachema.
Jeka akabva ati .

"Saka ngatichidzokerai hedu kumana
kwedu inzwai jongwe ratochema hweva
haina nguva isati yaoneka pamwe ne

utunga" anotaura Jeka. Chebamba
achinzwa zvose izvi akabva asumuka
ndiye verere hoyo seri kweimba ya
Urahwatasva ndokunoti kwadada
mumadziro. Anoona vose vachiinda
kudzimba dzavo ndokuonawo
Urahwatasva achisvika pasasa pake
anovhura ndokubva amira
pachikumbaridzo anosendeka pfumo
rake pamadziro ndokusiya gonhi
rakashama anomanya kumucheto
kwechivanze ndokubva atanga kurasha
mvura akatarisa mudenga akaita
kutsunzunyira. Chebamba anogwesha
ndokubva apinda musasa ma
Urahwatasva ndiye tumbi seri kwegonhi .
Akaita rombo rakanaka kuti maiva

murima. Anovhomora bakatwa
muhudyu ndokuribata zvakasimba .
Nenguva isipi Urahwatasva akabva
apinda , ndokuvhara gonhi anotsegera
neguyo , nhambo iyi akachatonona
Chebamba akabva atsvetukira
Urahwatasva ndiye muhuro dzvi-i .

"Waigochera pautsi , ukati bufu wafa,
matsotsi haagerani waita mwana
kwandiri. Uri mukuru pamakore asi
kwete papfungwa. Ndinonda
kukupukutai mese kukutsvairai sezviyo
paruware. Baba vangu vamakauraya
vakwana kwete ini bodo. Ndiudze kuti
daka raChiundura newe nderei
watumwa kumuuraya. Akakudyira chii"
anotaura Chebamba . Urahwatasva

nhambo yaakanga achida kutaura
akabva abaiwa nebakatwa mumuromo
richibva rabudira kugotsi rakasangana
neurozvi anorivhomora ndokumupfira
mate kumeso asi ainge angova chando.
Nguva iyi mukadzi waUrahwatasva
aitoridza ngonono , haana kumuka
zvimwe ainge ainda kunoroya.

Chebamba haana kuda kuchamira
akabva atobuda ndokubva asunga gonhi
nekunzwe . Anonanga kumba kwa
Chiundura anosvikorova gonhi kamwe.

"Ndini Chebamba" anotaura.

"Kwakanaka here nhai Chebamba
kwawauya usiku huno" anobvunza
Chiundura achibuda mudaunha.

"Hongu, ndati ndikuudze kuti kutanga nhasi usamwa doro, ukabata manzwi aya uchararama ini ndava kubuda akawanda totaura ndadzoka jongwe repiri inzwa rachema" anotaura ndokubva atofuratira .

"Chebamba warevei zvawati ndirege doro" anotaura Chiundura asi ainge ava kutaura nemhepo.

"Chebamba , Chebamba asi wainda kani" anotaura achivhura gonhi asi haana waakaona. Akabva adzoka kuvata.

Chebamba hapana chaanga asina nhava yake yainge yakanzi muhuro koche. Anomanya akananga nekuchipukunyuko anosviko bvisa hwendefa yaivepo ndiye

seri kwemuzinda dhugu. Anodzosera hwendefa iya.

"Apa hakuna kure kwandichainda zvavapano ndofanirwa kuona kuti Jeka achafamba sei. Uye kuona kuti zvii zvichaitika mudunhu nekufa kwa Urahwatasva. Ndaisaziva kuti Jeka anemweya kudero uye anevamwe vake vanonyepera kuva makwai izvo vari mapere. Zvino ndazvibatira ndoga hazvidi svikiro kana n'anga varoi ndabata chasara kuvarovera hoko mumisoro. Vakuru vakati Chirambadare huripa nepfumo! Varamba kuteerera zvakarongwa nedare ndiko kuriramba ikoko saka mubairo ipfumo" anotaure ega Chebamba ndokubva afamba

akananga muchikomo chaivamberi
kwake chainzi Gato. Anokwira dzamara
ava pamhanza pachu ndiye zvambara
pamusoro pemazimufa ndichimuka
(pfuri) , Sezvo hope dzisina mugoni
dzakanga dzamubata sezvo ainge asina
kumbovata.

Zuva richiti vhu-u. Machinda ose
akamuka kusunga mombe zvipani
zvishanu kuti vanorima kuzunde
ramambo. Dzichipedza kusungwa
vaRusanzu mukadzi wamambo vaininge
vatomuka vasunungura tsapi
yerukwezva. Jeka ainge agere padare
naMadzore Chiundura ainge ari pasi
pemukamba achirodza demo rake
pachivere.

"Yowe-yowe yowe! mune vanhu here
mumuzinda muno?" Huyai
mundionerewo shura yowe kani
ndapareiko ini" rinonzwikwa izwi
rechikadzi kusasa kwa Urahwatasva
kuhozi. Munhu wese mumuzinda akabva
amira ,meso ndokupotserwa ikoko.
Vamwe vakadzi vainge vabata zviuno.
Jeka anosumuka pachigaro paanga
agere ndokumanya achiinda kusasa
kwabva mhere. Anosvikorova gonhi
nedemo rake sezvo rainge rakasungwa
kunze zvakasimba. Rinobvanganyuka
mapango aro ndokuita zvigwishu
anotanga amira pamusiwo akakotamira
meso akabuda senyimo achiona
chaitora nzvimbo mumba umu. Akaona

zvisingaite kusvikopinda . Mukadzi wa Urahwatasva akabva abuda asi maoko ake ainge akazara ropa badzi. Jeka anokwakukira shure ndokutanga kudududza akatendeka musasa nepfumo. "Zvaita sei, chiiko mai Urahwatasva" anotaura Jeka . "Mu mu murume wangu aurawa chava chando" anotaura mukadzi achiwira pasi. Chiundura anosvikopinda muhozi umu pasina waataura naye ndiyowo nhambo yakapinda Jeka. Wanei Urahwatasva akatonyenama. Chiundura anobata gumbo ra Urahwatasva ndokumuzvuva achibuda naye panze.

"Chero chirichitunha ungabva waita chekukweva here nhai Chiundura

sumudza nekuchimbida
watondigumbura. Zvinoratidza kuti
ndiwe waita basa iri wauraya
Urahwatazva" anotaura Jeka akasunga
chiso. Chiundura haana raakataura
anosiya chitunha pasi. Ndokubva
atonona anotarisa gotsi ra Urahwatasva
anoona urozvi huchibuda ndokubva
adzungudza musoro kwakutarisa Jeka.

"Haisi nhambo yekuti tikandidzane
mashoko. Tarisai ipfumo rakabaya apa.
Chavapano kutobatana totsvaka
muvengi uyu.

"Mundione ridza hwamanda shoko
risvike kuna mambo iwe newe sumudzai
chitunha muuye kudare . Iwe Jeka iri
rava basa rako" anotaura Chiundura

achibva atofamba achiinda kudare.

"Ndichaitei handiti iwe ndiwe watoita zvose. Ndiri kuzviona hangu kuti ndiwe watova jinda guru mudunhu rino" anotaura Jeka ukuwo hwamanda yakabva yarira yekushevedza munhu wese padare. Shoko rekufa kwa Urahwatasva rainge ratozara dunhu rose nguva pfupi. Mambo vachinzwa izvi vanokatyamadzwa nerufu urwu. Ukuwo Chebamba akabva ati pepu nekuda kwehwamanda yakarira. Akabva agara zvake mugomo umu achiona zvaitora nzvimbo.

"Vanhu vakaungana nguva pfupi chero vainge vasunga mombe vakamanya kuuya kudare. Vakadzi vehana nhete

vainge vohwihwidza. Mambo
vanoshaya nesimba rekutaura ndokuti
Jeka sumuka utaure . "Pamusoroi,
rwendo rwedu rwekurima rwabva
rwagurwa negurwe . Mambo havana
kufara nechitiko ichi kufa kwe Jinda
ravo. Asi ini ndinoti aita izvi haasisinawo
mazuva ekurarama . Muno muri kufiwa
zvisina tsarukano asi kuti
tirikunakurirana nyoka mhenyu handina
akawanda changamire ndarwadziwa
nejinda rangu chero zvandaironga naro
zvawira mudondo ndicharonga nani"
anotaura asi Chiundura anozvibvunza
oga kuti kurongei iro dupe tupe rerume
Urahwatasva, mukadzi arinani aifungei.
Akabva asumuka ndokubva ati.

"Regai zvipore akabva mukutsva. Nhasi moyeuka bako nekuti mvura yanayaka. Zuva riya angu mashoko akainda nemhepo . Munozvone munzwa uri mundove ndakataura kuti zvinoda kufamba asi ndakaita kunge muroi ayedzerwa pano" anotaura Chiundura.

"Usataura zvekufamba nguva yerufu saka ndiwe waita zivi uchida kuti mashoko awakambotaura awane simba . Zvino kana uriwe muroi werino dunhu nhasi takubata Urahwatasva haangaindi ega" anotaura achisumuka panga agere uku misodzi yake yainge chitubu cheMhokore kusina.

KUPERA KWECHITSAUKO 5

CHITSAUKO 6

Kwakava kugeda geda kwemeni . Hana ya Chiundura yainge yokindidza sengoma yegororombe. Chiundura anodududza nenhendeshure. Meso ake ainge akaringa Jeka uyo aifamba achiuya kwaaiva.

"Tsuro haiponi murutsva kaviri iwe nhasi ndiri kukupfuudza unovata wava nyika dzimu" anotaura Jeka achibva aregedza pfumo , asi ainge anyangira yaona.

Chiundura anoti pasi hwatata , pfumo ndokupfuura nepamusoro pake rakabva ranobaya sasa raiva kumashure. Jeka anofinyamisa chiso kunge vanhu vari kugovana zvinonhuhwa ndokuvhomora bakatwa rake muhudyu, paanoti nhambwe imwe chete, mambo vakabva vati,

"Kureva kuti mese mava kundizvidza , ini ndiri kurwadziwa nejinda rangu rafa asi imi mava kuda kuita dzivo pameso pangu. Shura here kana kuti chii nhai Jeka" vanotaura mambo neinzwi gobvu rine mashasharadzi eshungu. Jeka akabva amira akatsikitsira asi ruoko rwake rwaiva rwakabata bakatwa rwaihuta . Ndokubva asimudza musoro

wake achiita zvishoma zvishoma
ndokuringa mambo.

"Changanire wangu kurwadziwa
kwamaitwa zvimwe kushoma pane
kwandaitwa ini nerufu rwaUrahwatasva.
Kuita hamungazivi basa guru raaida
kuzoita mangwana. Ndinoti kana
ndatadza ndaposha ishungu
dzakandizadza" anotaura Jeka neunyororo
zvinova zvakashamisa Chiundura kana
naivo mambo. Jeka anotarisa Dapi
ndokubva vatsonyana asi Chiundura
akazviona asi waakatsonyana naye
haana kumuona akafunga kuti Jeka
atsonyana neimwe mhandara yaiva
kwaanga akatarisa.

Jeka akabva adzoka ndokufamba

achiinda panechitunha cha Urahwatasva,
anotonona ndokubva abata maziso
aUrahwatasva ndokumavhara,
achipedza izvi akabva atora nhava ya
Urahwatasva yaiva muhuro ndokubva
apinza ruoko munhava iya anobudisa
chitehwe chainge chakaputiridzwa
chichiratidza kuti chine zvachakaputira.
Akabva achipinza munhava yake .
Ndimu maiva makaputirwa nduru iya
yegarwe yaaida kuuraisa Chiundura
sekuronga kwavakaita padare ravo riya.
Akabva asumuka ndokunogara
pachigaro chake. Nguva iyi mambo
vainge vakamira vachione zvose izvi.
Munhu wese ainge agara pasi kusara
kwaiva na Chiundura uyo aiva

akazembera sasa.

"Machinda angu izvi zvamunoita munopinza makonzo mumba tikashaya buru raapinda nawo. Tisingadi kupedza nguva sezvo kurima hatingaregi. Jeka sharudza varume vashanu vanonopisa chitunha ichi vamwe vose voinda kunorima kuzunde" vanotaura mambo .

Jeka rakabva rasumuka ndokuti,

"Dapi , Mhodzongwe , Madzore newe chikomana sumudzai chitunha ichi moinda nacho kujinga kwemuzinda pasi pemuhacha ndiri kuuya ikoko. Iwe Chiundura ndiwe uchainda nemachinda kunorima tokuonai madzoka" anotaura Jeka ndokubva atarisa mambo.

"Itai izvi nekuchimbida tozorodze mweya wemushakabvu uyu chingashata chitunha ichi takatarisa" vanotaura mambo Chirambadare.

"Zvimwe kana tapedza ini handisi kutevera kumunda, ndine kwandinoda kumboinda asi vana Dapi ndivo vachauyako" anotaura Jeka apa ainge angosarudza machinda ake badzi.

Chitunha chinoiswa padanda, vanobatirana Dapi na Mhodzongwe ndovaiva vakabata mberi. Madzore nemumwe mukomana vainge vakabata kumashure. Jeka akabva atora chitsiga chemoto padare ndokukakanyara sehoromba yebveni achitevera kumashure. Vanhu vose ndokusara

vachisumuka vakadzi vakabva vatakura
rukweza varume ndokutinha mhonde
vonanga kuzunde ramambo. Zvose izvi
zvaiva mumaziso aChebamba uyo aiva
muchikomo Gato.

Anoona machinda mashanu akabata
chitunha chiripadanda.

'Chero zvichinzi ndatadza kuona, asi
apa handina. Uyo ari mberi ndi Dapi
naMhodzongwe vabata kumashure ndi
Madzore mumwe wacho ari kundirasa.
Uyo asi shure ndi Jeka kureva kuti
asarudza dzimwe nyaka dzake kuti
dzipise imwe nyoka yavo. Kureva kuti
vane zvavanoda kuronga ikoko, ndinavo
kusvika kumagumo uye ndichaparadza
mumwe no mumwe" anotaura

Chebamba achidzika gomo kuda kuinda kwaipiswa Urahwatasva. Chaaida kunzwa zvaitaurwako. Nenguva isipi ainge asvika kujinga kwemuzinda ukuwo vana Jeka vainge vavakutokanda huni pamusoro pechitunha. Vaiva nekarumbo kavaiimba ipapo. Kusvika vapedze kupisa. Chebamba akamboda kuseka asi akazozvibata sezvo yaisava nguva yekuita izvozvo.

"Tapedza kupisa Jinda redu. Iwe mukomana chiinda hako pako wapedza iwe Dapi newe Mhodzongwe newe Madzore nditeverei iyezvi" anotaura Jeka ndokufamba achiinda kujinga kwemuzinda pakanangana nepaiva na Chebamba. Jeka akasviko gara

pamusoro pedombo raivapo asi vamwe vake vakaramba vakamira.

"Machinda angu, ini pfungwa dzangu dzadhanganyika, musoro wangu wadzungaira senzuma kutsvaka chakadya nyanga. Urahwatasva watakaparadzana naye manheru ari mutano ko chamudya chii? , Paoneiwo machinda angu hapana mutengesesi here patiri pano" anotaura Jeka .

"Changamire wangu kana ini pano zvandinetsa asi ini imwe pfungwa yangu ndeyekuti zvimwe anogona abaiwa nemukadzi wake achifunga kuti muvengi, kana kuti zvimwe azvibaya nebakatwa ndiwo mafungiro angu iwawa" anotaura Dapi.

"Haa Dapai!, Unofunga here iwe?
Sekuona kwako mukadzi uya angauraya
Urahwatasva here? Ko sei gonhi racho
ranga rakasungwa nekunze kana uchiti
mukadzi wake aita izvi". Anotaura
Madzore achipikisa pfungwa yaDapi.

"Machinda tingaswero tsvaka chisvo
mujecha , hamuoni kuti zviripachena
here izvi semhanza yako Jeka . Ndi
Chebamba aita izvi hakuna angaita
ushingi hwakadai . Mambomuona here
padare nhasi sewe" anotaura
Mhodzongwe. Zvose izvi Chebamba
aizvinzwa ari seri kwerusvingo.

Panomboita karunyararo pasina
apindura. Jeka akabva agutsirira pamwe
na Dapi.

"Izvi zviripachena , asi nerimwe divi
igaroziva kuti mhanza yembudzi iri
paibvi , Chebamba manhenda
kumuwana padare kana mumuzinda
kunguva dziya anenge amuka
runyanhiriri chairwo kutaura kuno
amedzwa nemasango kunenge
kuchiindwa chaiko hapana anoziva
munhu rudzii asina kana shamwari inga
majaya akawanda ezera rake . Ukada
kumuti ndiwe waita izvi . Anogona kuti
mandizora mafuta enguruve yadzisina
kudya saka toti ndiye here?" Anotaura
Jeka akatarisa Dapi. Hamusi kureva
manyepo ipapo, uye ini ndogona kuti
hasi sezvo Chebamba izvi aita mutete
pazviri ndinopikisana newe

Mhodzongwe dai wati ndi Chiundura
raigamuchirika dama rako.

"Musafa makairambira imbwa
inemazino kuti haisiyo yadya mazai.
Hamuna kuzviona here kuti padare paya
Jeka waiva wasiiswa nyemba here naye
asi ini hana yangu iri kuti ndiye
Chebamba" anotaura Mhodzongwe.

"Machinda angu tingawanzwa mbambo
pachitehwe cheshindi, pabva zino sare
vende. Tarisai tanga tirivashanu izvezvi
tava vana. Tingatsvaka mumwe here
anotsiva apa kana kuti tofamba takadai"
anobvunza Jeka.

"Tikapinza mumwe tinobatirwa
pazvimbo sembwa. Takadai zvakanaka
asi chiripo ndechekuti Jeka sezvo uriwe

mukuru wedu tironge kuti jinda rako guru nderiri sezvo iwe ndiwe mambo wedu" anotaure Madzore.

"Dapi ndojinda guru, Madzore ndiwe mutevedzeri iwe Mhodzongwe ndiwe mukuru wehondo. Ndapedza saka chizivanai. Ndichipendera dare redu ini ndichibva pano ndavakunanga kwa Gonamavende".

Anotaure Jeka achibva aringa mativi ose. Hapana akadavira akabva ati,

"Saka chiindai henyu ini ndava kurinda Chiundura tomuona ndadzoka, abvunza moti Jeka hatina kubvira taona tsoka yake kana huma zvayo" anotaure Jeka achibva atobereka zvombo zvake kumusana pfumo ndoraiva mumaoko.

Anonanga nesuwo diki remavirira, vana
Dapi vakabva vambodzokera
kumuzinda vozoina kuzunde kwainda
vamwe. Chebamba anotevedza rusvingo
dzamara ava kusvika kusiwo diki
ndokubva avanda seri kwedombo .
Pasina nguva Jeka akabva abuda
sembeva irikubuda mumwena.
Anonokora ivhu pamusiwo wemuzinda
ndokubva aisa munhava yake. Anotarisa
divi remaodzanyemba kwakadziva
mavirira. Nguva iyi zuva rainge rati
kwirei kamushana kainge konakidza
vakadzi vakazvitakura vane mwedzi
mitatu uye ndiyo nguva yaipiwa vana
bota. Jeka anopinda muchakasara
mesango aiita kunzunuzutira pamwe

pacho aitoparwa nemiti achiita
kutukutira sembutsi irikudya sosote .

'Mukono unorwa unoonekwa
nemavanga , nyangwe zviome sei ndofa
ndayedza tinosvika tose ikoko
kwaGonamavende' anotaura Chebamba
achitevera shure. Vanopinda nepakati
pemakomo aityisa kwazvo. Zuva
rakasvika pakupinda munamai varo ,
Jeka aiva nekamukuyu kaaifamba
achidya. Ndizvowo na Chebamba asi
nyota ndiyo yainge yotonga. Kuchangoti
zvarara vhenekera tsvimbo rume yainge
yati nenga yakarereka. Ndiyo yakava
mubatsiri sezvo jena guru rainge risati
rabuda. Nenguva isipi Jeka akabva
asvika murwizi asi rwaiva nemvura

yaisvika mumabvi. Anokotama
ndokubva atanga kumwa mvura
nemaoko. Chebamba anovhomora
museve wake mudati ndokuisa tsvimbo
pasi. Anoupfekera pauta
ndokuutatamura akaita kuvhara ziso
rimwe uku akaruma muromo. Ko Jeka
aizivei zvake aiti ndiri munyika yangu
ndega kusaziva kuti shure kwake kune
chikara.

KUPERA KWECHITSAUKO 6

CHITSAUKO 7

Nhambo yakainda vanhu kumunda.
Chiundura akafamba nhambwe gumi
achibuda mumuzinda ndokubva amira.
"Mundione newe Gunanga sanai
kunofambisa basa ndiri kuuya uyezvi.
Tangai kurima muchibva jinga
rechikomo" anotaura. Chiundura asi
meso ake ainge akaringa vana Jeka
vaiinda kunopisa chitunha cha

Urahwatasva.

"Zvakanakai Changamire" anodavira Mundione. Chiundura akabva adzoka mumuzinda , aiita kukamhinira gumbo rekuruboshwe. Ainge ofunga nhambo yaakapotswa nepfumo padare na Jeka. Anosongana na mai va Chebamba vaina vaRusanzu vakadenhezera tswanda dzaiva nerukweza.

Achangodarika akanga ashevedzwa.

"Mangwanani vaChiundura miraipo" vanotaura mai vaChebamba ndokubva vadzoka shure.

"Kwakanaka here mai Chebamba?" anobvunza Chiundura.

"Ndati ndibvunze imi varume, ko budzi

rangu randirisi kuona muno mumuzinda ranyangarikira kupizve" vanotaura mai Chebamba vachibvunza mwana wavo sezvo vainge vasina kumuona kuye kuonekana. Sevakadzi vakashaya mwana wavo moyo wekubereka unobva wabaya.

"Aaa muchabvunza Chebamba nguva dzino zvimwe kutaura kuno atoputsa mhembwe mbiri kana masango asiri matema" anotaura Chebamba.

"Mangwananizve vaChiundura, kumira rudziiko ikoko nemukadzi wemunhu komukagoita kuvhunduka nhai mai Chebamba , honhai basa kurezvana zvino Jeka ndiri kuda kumuudza zvole" vanotaura mai Shupikai . Aiva zvawo

manyepo kuda kuti mai Chebamba
varambiwe na Jeka sezvo ndivo vaiva
mukadzi wepiri mai shupikai varivo
mukadzi mukuru.

"Nhai mai Shupikai mapindwa nei
chokwadi, zverudo zvingaitwa pachena
ipopano here kana kuti pakavanda
muchiona here kana kuti
murikufungidzira" anotaura Chiundura .

"Zvamava kutaura ndezvemugotsi
matsuro zvakawanda mozopedzerana
na Jeka kana auya ndayenda ini"
vanotaura mai Shupikai chiso chavo
chairatidza kushinga serume regonzo.

Mai Chebamba vakaramba vakanyarara

asi vakaona kuti apa paveswa moto
wematanda chaiwo usingadzimuriki.

"Regai ndimbonoona mambo Chebamba
anodzoka nhasi chaiye zvimwe rogara
makomo kana kurova nhongonya
anowira muno" anotaura Chiundura asi
ainge atoona chiso chamai Chebamba
chatofuruka semabarwe ashaya moto .
Vanoparadzana ndokubva ananga
kusasa kwamambo. Anosviko gugudza
kaviri.

"Ndiyani" vanodavura mambo.

"Ndini Chiundura" anotaura amire
pamusiwo.

"Pinda jinda rangu" vanotaura mambo,
Chiundura akabva apinda ndokubva

avhara sasa sezvaraiva rakaitwa
ndokugara pachigaro chaiva mberi
kwechamambo ndikutarisana.

"Changamire wangu pachipamwe,
ndaona kuti hakuna kwandingainda
ndisina kutaura nemi. Nekuti tsuro
haiponi kurutsva kaviri rimwe zuva
ndinogona kuindiswa nyika dzimu
ndakati vava va saka ndauya kumazano
enyu ndisati ndaitawo mazano anguvo
nekuti mwana asingachemi anofira
mumbereko" anotaura Chiundura.

"Mai vebenzi havana mufaro unozviziva
wani. Angu meso anoona aya asi shiri
haingapotseri nedombo isati yamhara.
Iwe wanga wauya wakasenga dama
ripi" vanobvunza mambo.

"Changamire ini rangu uyu Jeka jinda renyu guru ndaona aparadza dunhu rino raita rake. Imi wacho mukaindiswa nyika dzimu. Ndateerera mashoko aataura ekuti Urahwatasva anebasa guru raanga achifanirwa kuita ramusingazive imi, azotizve pamwe imi mambo kurwadziwa kwenyu kungangova kushoma sekurwadziwa kwandaitwa. Kureva kuti vaiva nezvavaiita uye havasivo vega mune vamwe vatisiri kuziva . Sarini Jeka kuchema kubuda musodzi" anotaura Chiundura , izvi zvakaita kuti mambo vagutsurire musoro wavo ndokubva vati.

"Wataura zvandanga ndisina kuisa mumusoro. Asi ini chandinetsa

Urahwatasva wacho afa nei , uye Jeka
ati nhasi haapo pano pamuzinda anoda
kuinda kupi? Dai Chebamba anga
aripano. Chinzwa Chiundura iwe
zvowoita chiinda kumunda kwainda
vamwe ndovimba newe pazvose iyi
nhau toidzeya wadzoka nekuti
ukazotadza kuinda ungaigochera pautsi"
vanotaura mambo . Chiundura akabva
abuda musasa ramambo. Anoti ava
pachikumbaridzo kubuda anoita
mahwekwe na Dapi , Mhodzongwe na
Madzore vachibva kunopisa chitunha.
Asi Jeka anga asipo zvairatidza kuti
ainge ainda kwaanga ataura . Anodzika
pachikumbaridzo ndokufamba achiinda
kusasa kwake anonotora badza

ndokubva ainda kwaiva nana Dapi avo
vainge voindawo kumunda.

"Ko Jeka aindepai zvamadzoka mega"
anobvubza Chiundura.

"Jeka taparadzana naye nhambo
yatapararira padare hatina kumboona
rutsoka rwake kana huma zvayo .

Manga musiri mese here musasa
mamambo umo mataona uchibudamo"
anodavira Dapi.

"Haa kana Jeka anga asimo, pamwe
ainda kumunda" anodavira Chiundura.

"Murume uya Chiundura ukasangwara
anokuuraya. Ndoona zvakanaka kuti iwe
utore chinzvimbo chake iwe woita jinda
guru , munozviona sei machinda ndoona

senge Chiundura aneuchenjeri" anotaura
Dapi achida kunzwa pfungwa dza
Chiundura. Koiye Chiundura
aimbozviziva here kuti akakombewa
nemhandu dzake .

"Garwe haridyi chebamba charo
chinouya neronga. Ruchiva rwunouraisa"
anodavira Chiundura.

"Unoyedza kuti chii Chiundura"
anobvubza Mhodzongwe.

"Usafa wakachiva zviro zvemumwe ,
zvakafanana nekuti ini ndochiva ushe
hwamambo kufa kwangu kubaiwa
nepfumo zvirinani iwe Dapi uite hako
jinda guru" anotaura Chiundura.

"Asi ndoziva hangu kuti na mambo

ndozvamanga muchitaura musasa umo"
anotaura Dapi , asi Chiundura haana
kudavira. Vanokanda nhambwe
dzamara vasvika kumunda kuzunde
ramambo. Chiundura anonyemwerera
basa rainge rabatwa vavakutopedza.
Vakadzi vaipfudzira rukweza vachiimba
nekuridza mhururu. Varume vaikuza
mombe mheterwa dzichiridzwa. Zuva
parakatanga kurova nhongonya vainge
vapedza kurima vavakumwa zvavo
maheu. Asi Chiundura nguva iyi aifamba
zvake achiona mumunda. Mai Shupikai
vakabva vasumuka pavaiva ndokuinda
kuna Dapi. Vanotorana ndokuinda
kusina vanhu ndokubva vati.

"Dapi chandakudaidzira pano , nhasi

ndapererwa kusvika pakushaya
remuromo. Chiundura anga
achisumudza mai Chebamba
achivatsvoda seri kwetsapi yangu iya .
Paandiona abva amanya achidzoka
kuimba yamambo" vanotaura
vachiratidza kurevesa.

"Iyawokani munondiudzei. Imi kani muri
kuti Chiundura ari kufambidzana namai
Chebamba here kana kuti iye Chiundura
ari kuda kuti mwana sikana wake
Svunurai aroorwe na Chebamba?".

"Dapi Dapi Dapi Chiundura kudanana
chaiko ndazvionera neangu meso aya"
vanotaura Mai Shupikai.

"Maiwe ! Zvamataura zvanaka iyi
yazvikanga yoga nemafuta ayo isiirei

kuno ini ndini ndouya ndoudza Jeka
nhau iyi kuiti iite mutsindo . Sezvo
mukataura murimi zvinonzi maita godo.
Hamupaoniwo here mai Shupikai"
anotaura Dapi akatarisa mai Shupikai
mumboni chaimo.

"Ukazonditarisa mumeso ndozonyara
Dapi" vakabva vanyemwererawo Dapi
ndokucheuka mativi ose. "Mati
ndingadiiwo ini ndakaringa njuzu
ichangobuda mumvura handifunge kuti
mudunhu iri pane ane runako serwenyu
uru ndabvuma kondaiva
ndakambokutarisai here ndairinga hana
ichirova seichabva, saka Jeka ini
ndichamuudza achingosvika" anotaura
Dapi.

"Ukataura izvi ndichakupa tswanda yenzungu" vanotaura mai Shupikai.

"Ndagova mukadzi here anopiwa nzungu . Handina tseu ini, hapana zvimwe here".

"Ndozvandowana semukadzi, wanga uchida chii Dapi".

"Makura imi mai Shupikai , zuva rimwe hariodzi nyama sanhasi zvaasipo Jeka kudai ini ndova baba chingaramba chii sezvinotaura". Anotaura Dapi achinanzvira miromo.

Nguva iyi mai Shupikai vakabva vangotendeuka ndokutarisa kwaiva nevanhu ndokubva vasumudza tsoka dzavo.....

Dzainge dzawira mutswanda
dzisingachanetsi kunongera .
Chebamba anoswederera padyo kuti
anyatsouregedzera aida kuti aupinze
nekumagadziko kana museve
waizobudira neseri zvaivawo zvimwe.
Nhambo yaakati achiuregedzera,bere
rakabva rachema riri mujinga
mechikomo chaiva mberi kwaJeka
zvimwe raida kumwa mvura. "Yowe dofa
mandirasa vadzimu" Jeka
anokwamatata achibva awira mumvura.

Chebamba akabva ati pasi hwatata
haana kuzoregedza museve uya.
Anokambaira achiinda kurwizi kuya.
Anoona Jeka ava nyasi kwerwizi asi kuri
mhiri. Bere riya rakazokuma kepiri rava
kumusoro chaiko.

"Jeka anofanirwa kutenda bere iri anga
achifanirwa kufa nhasi , asi ndoziva
hangu kuti tsuro haiponi murutsva kaviri
rimwe zuva gava richadambura
musungo" anotaura achidzosera
museve wake mudati ndokubva apinda
mumvura ndokutanga kutevedza jinga
regomo achimanya dzamara ava kuona
Jeka. Anopota seri kwechikomo ichi ,
Chebamba akabva anzwa kunhuwa
kwemoto,

"Tofanirwa kunge tasvika , uyu moto uri kunhuhwa unenge uchangoveswa chete regai tione" anotaura ega achibva avhomora museve mudati pfumo ndokuriisa muchiuno.

"Bu-bu-bu-bu" kuuchira kwaiita Jeka achipota seri kwerimwe dombo kwainge kooneka chiutsi.

"Tisvikewo sekuru Gonamavede, Bu-bu-bu-bu tisvikewo sekuru" anotaura Jeka zvekare. Uyu Chebamba ainge achiswederawo"

"Svika muzukuru svika svika"
rinonzwikwa inzwi gobvu richibuda muchiimba chaiva chakarerekera divi rimwe kunge chinoda kudonha.

"Ndiro dumba racho ren'anga yake nhai ndinoda kunzwa kuti avingei chaizvo" anotaura achiswedera zveshoma zveshoma.

"Isa zvombo pasi usiye ikoko wouya uri iwewe badzi unonzwa here muzukuru" rinonzwikwa inzwi riya zvekare.

"Zvirimunzeve sekuru". Jeka anosiya zvombo pasi chaakatora inhava yake yaiva nezibadza raanga abira mambo. Anofamba ndokubva asviko mira pamukova pedumba ra Gonamavende. Anodongorera ndokuona muchipwiritika chiutsi maiva na Gonamavende na Makumbi wake aimubatsira kurapa. "Ndi Jeka here uyu" rinotaura inzwi riya zvekare. "Hongu changamire ndauya

kwamuri" anodavira Jeka. "Pinda ugare
pasi" anotaura Makumbi. Gonamavende
akabva ainda seri kwematehwe aiva
akaganhura dumba iri nepakati.

Chaingonzwikwa ihakata chete
kurovaniswa . Anopinda ndokubva
agara pasi anoringa mumba umu
mainhuhwa kunge mafira chidembo
maiva nezvitende zvakawanda uye
maiva nematehwe emhuka dzakasiyana
siyana , koti zvimiti nemakwande zvaiva
zvakanyikwa mumvura yaiva muchainga.
Zvimwe mvura iyi ndiyo yairapa varume
vanenge vakasungwa kana kuti ndiwo
mupfuhwira hazvina akaziva
Gonamavende ndiye badzi aiziva.
Chebamba anogwesha dzamara asvika

paiva pasiiwa zvombo na Jeka
anozvitora ndokubva ati verere seri
kwerimwe dumba ndokupota seri
kwedumba raiva nana Jeka ndiye kwati
kwati. "Jeka zvawauya zvanaka
muzukuru ndiri kuona matama ako
anemvura yekutambudzika. Kuti
nditange nhau yako isa makwati
mundiro iyo" anotaura Gonamavende
achisundidzira ndiro nepasi pedehwe.
Jeka akabva anyemwerera ndokupinza
ruoko rwake munhava ndokubva
abudisa zibadza raakabira mambo
ndiye mundiro tsve-e. Gonamavende
akango tora badza riya anonyemwerera
ndokubva ati .

"Taura nhau yako muzukuru

ndakateerera" anotaura.

"Sekuru musaona ndauya kuno kudai hapana kumira zvakanaka kumuzinda uko. Zviri kunzi-----!

KUPERA KWECHITSAUKO 7

CHITSAUKO 8

Kana museve wada nyama unodauka vakataura vakuru. Asi vakazodzoka zvakare voti nhambe tambe inoregwa ichanaka nekuti unozodzamara ita segurwe rinofarisa kusvika pakubvisa

makumbo. Jeka anovhura meso ake
akatarisa dehwe rembada raiva
rakaganhura pakati pedumba iri, akabva
ati.

"Sekuru Gonamavende kumuzinda
kwandabva uko angova manyama
amire nerongo. Chandisumudza ini
inhau yeumambo . Sekuru munoziva
kuti ini ndini jinda guru uye ndini
ndakaroora mukadzi waiva wemwana
wamambo. Saka zvava apa mwawa wa
Mucharipa anova Chebamba
wemukadzi wandakaroora ini ava kuda
kuroora . Zvino mambo vakabva vati
munhu ane mwana acharoorwa na
Chebamba ndinomugurira dunhu
kumacheto kwemuzinda wavo atonga

ikoko. Kureva kuti ini hapana changu
saka ndauya kuti imi sasekuru mondipa
mazano ekuti nditore dunhu ndiwo
mashoko angu" anotaura Jeka.

"Muzukuru saka chiri kukunetsa ipapa
chii, zvawauya pano zvanaka handiti
mudzi wenyaya ndiChirambadare here
ivo mambo! , saka ukagona
kumupfuudza iwe watova mambo kana
iyeyu anoda kuzogurwirwa dunhu kana
uchimuziva hakuna chake ndiwe
unenhe wava nemasimba" anotaura
Gonamavende. Jeka anoramba
akanyarara ndokubva azoti .

"Sekuru ndinenge ndisina kuikangira
pakatsvira dzimwe here apa. Chebamba
uyu akangoti kure badzi

anodzishandukira serwaivhi
akandipfuudza" anotaure Jeka.

"Iwewe unenge uchamusiireiko
Chebamba wacho? wotongopfuudza
vese nekuti kurera imbwa nemukaka
mangwana inofuma yokuruma saka apa
kuti dare iri ndiripedze panoda muripo
mukuru kwazvo. Sezvo iwe unoda
kutanga kuita mambo. Ndotema here
muripo wangu kana usingakwanisi
unoti kwete asi kana uchikwanisa kuripa
woti hongu nekuti handikwanisi kutaura
muripo wausingazogoni" anotaure
Gonamavende achibva adzvova dumba
rose richibva raita maungira uye
kuzununguka. Zvakaita kuti Chebamba
aiva mumadziro adonhere pasi nekutya .

Jeka akazvinzwa hana yake yakabva yakindidza seichabva .

"Sekuru aiwa musanyanya kuita ukasha vazukuru venyu vane hana nhete ndokumbirawo sekuru kuti multe neunyororo" anotaura makumbi akapfugama achirovanisa maoko musoro uri parutivi .

"Zvanzwikwa muzukuru , Jeka pindura timwe usatya zvako zviripanze apo imbwa dzangu" anotaura Gonamavende. Zvose izvi zvaiva munzeve dza Chebamba , paakangonzwa zveimbwa akabva amuka nekuchimbida ndokutarisa mativi ose asi haana chaakaona anodzoka mumadziro. Nguva iyoyo ndokumira,

ndokudongorera nepa berevere aiona
zvaiita Gonamavende. Ainge ari mutsvi
asina kusimira , zvuma ndizvo badzi
zvaiva zvakati muviri wese rezu rezu.
Aiva nezino raiva rakabuda uye aine ziso
rimwe chete. Chebamba anodzungudza
musoro wake akafinyamisa chiso.
Nguva iyi akayerekana anzi mba-a
tsapfu yake haana kuda kuita ruzha.
Akatendeuka achiita zvisihoma
zvisihoma ndokuona rino zimbwa dema
dema raiva nemeso akatsvuka aipenya
neusiku . Anosvasvaira pfumo rake
muchiuo ndiye vhomo. Zimbwa riya
rakabva razunza tsapfu iya katatu ropa
richibva rati dzatu senhongo yabaiwa.
Anofinyamisa chiso ndokudzisa pfumo

zvineukasha pfumo rakasvikoti muhuro
pitipiti ndiro svata ,

"Waa-waa-waa" katatu ndiyo zii
yakadero" anoibata gumbo ndokubva
asvetukira nayo mumauswa aiva seri
kwedumba iri. Ukuwo Jeka achinzwa
ruzha urwu anosumuka ndokuwarukira
seri kwaiva na Gonamavende
achikwamatata anobudisa mweya
pamwe nekuzvinyorovesa
ukunachifemera pamusoro sendere.
Anosvikowira pamusoro pehakata.

"Iya muzukuru kuno hakuuyiwi imhosva
iyoyi zvirinani kudyiwa nezvikara pane
kundiona ndichiita basa rangu. Iwe
makumbi pota seri uone kuti chii
chatora nzvimbo zvimwe dzirikirwa

imba idzi wanga wadzipa sadza here"
anotaura Gonamavende.

Makumbi akabva abuda ndokupota seri
kwetsapi asi haana chaakaona nekuti
hwaiva usiku uye akasiya tsvatsva yake
mumba. Chebamba anoramba akati
hwatata pasi akatsimbirira zimbwa riya
asi chainge changova chando chete.

Makumbi paakatendeuka Chebamba
akada kuregedza museve asi akazoona
kuti ndinenge ndachimbida kumedza
kutsenga ndichada. Akabva amurega.
Makumbi anodzoka mudumba
ndokuwana Jeka achidirwa mvura yaiva
yakanyikirwa zvimidzi zviya. Mvura iyi
yaiva yakatsvukuruka asi yairatidza kuti
irikuvava. "Hakuna chiriko imbwa

dzacho dzatiza enderera mberi nebasa sadza ndanga ndadzipa dzikasiya rakadero" anotaura achichonjomara. Jeka ainge ongohuta zvairatidza kuti mvura iyi yaitonhora. Chokwadi n'anga inokuita zvainoda mumwe nomumwe ndimambo pabasa rake.

"Jeka taura kuti wakasununguka here kuripa muripo wangu, uye zvawaita izvi zvekuuya seri kuno vadzimu vatsamwa wapinda nemwenje mudziva" anotaura Gonamavende achiratidza kuti shungu dzakamugara. "Hongu sekuru ndikosaka ndauya pano taurai ndakateerera" anotaura Jeka nguva iyi Chebamba ainge adzoka pamadziro. Vakuru vakati kufa kwemurume kubuda ura.

Akangoshinyira achirwadziwa
ndokumira akateerera. "Chinzwa Jeka
ini ndinoda mombe makumi maviri.
Nematengu makumi mashanu ezviyo.
Kupinda kwawaita seri kuno kwandiri
ukandiona muripo wacho
ndewenhandara mwana wako iwewe
asati avata nemurume ndapedza
ndokuti vadzimu vangu vafare, kana une
chekutaura ndakateerera taura hako"
anotaura Gonamavende achirongedza
hakata dzake muzinhava raiva nemidzi
pamwe nemalehwe. "Sekuru
mandiomesera pamwanasikana wangu
apo. Ndingori nevaviri badzi Chenai na
Shupikai uye Chenai richiri jeza chairo
haridyike uyu Shupikai ndiye wandanga

ndichida kuti atorwe na Chebamba saka
ndozvifambisa sei" anotaora
akagwadama achiuchira.

"Kana zvisingaiti Jeka handikupikisi
kana kumanikidza chinzwa. Sarudza
zvaunoda pazvivitatu izvi, kuita bofu uye
wotadza kufamba, kana kuinda
nyikadzimu kana kundipa mwana wako"
anotaora Gonamavende.

"Sekuru hazvigoni here kuti ndikupei
mumwe musikana asi asiri wangu
mwana, mombe nezviyo izvo ndokupai"
anotaora Jeka.

"Kana uchiona hako kuti hazviiti izvi
dzokera hako kumuzinda kwako asi
kana zuva rikayedza uri kupenyu
bvaumambo unotonga, unoda kundipa

mwana wemumwe mumhu sei panoda
ropa rako iwe wapinda muno. Ukandipa
mumwe musikana asiri ropa rako
hapana zvawaita zvakafanana nekuti
ndini ndinenge ndasvitsvagira".

"Bodo sekuru musagumbuka kusvika
pakudaro ndazvinzwa zvamataura
ndichaona kuti ndouyisa upi" anotaura
Jeka. "Hauchaoni wava kutaura
semurume zvino. Chinzwa Jeka iwe
ndava kukuzora mafuta eshumba
pahuma uchatyiwa chero namambo
kana nhunzi chaidzo hadzikumhari.
Uyezve ndinoda kukupa tsvimbo iyi
ndiyo inemasimba ose watova mambo
usawana anokutorera tsvimbo iyi .
Mambo uchavauraya sehuku ndapedza

newe muripo wangu ndiwo wasara"
anotaura Gonamavende.

"Muripo wenyu ndinouyisa kana ndatora
dunhu mombe dza Chirambadare
ndidzo dzandichauya nadzo" anotaura .

"Asi mhandara gara wauya nayo kuitira
kuti ndisane ndichisimbisawo mhiko idzi
uite mambo.

"Zvakanaka sekuru. Ini handichamiri"
anotaura Jeka nguva idzi jongwe
rekutanga rainge ratochema.

Chebamba anowaruka achibva
mumadziro ndokudududza hoyo
anokamhina achidzira nyasi kwedumba
divi ravakabva naro anonoti kwati kwati
nedombo achiringa mafambiro aizoita
Jeka.

Jeka anobuda musasa ndokuridza kamuridzo achiinda kwaaiva asiya zvambo zvake kanhava kachitorwa nemhepo kari muhuro . Anosvika paya wanei yangova nzvimbo badzi zvambo zvikati wakandisiya pano here?.

Anotenderera akatsikitsira sembongoro irikudya tsangadzi.

"Ndazvisiya ipapa ini ko zvagoinda kupi? asi zvamedzwa nerima irori rajairwa nevaroi asi rinenge ririshura chairo.

Kana kuti makumbi ndiye azvitora" anotaura Jeka akakotamira achitsvanzvadzira netsvimbo yake yaaiva apiwa na Gonamavende.

Anoringa ringa asi haana chaakaona. Anodzoka kudumba ndokubva

asongana namakumbi uyo aitobva
kunorasa mvura kumacheto
kwechivanze.

"Ndipe zvombo zvangu ndava kuda
kuinda makumbi" anotaura Jeka .

"Zvombo? Zvani ?" anobvunza achimira
pamusiwo.

"Usanyepera kudzungaira sechembere
mbiri dzaitirana mwenya murima.

Ungaramba zviri pachena seinda iri
mubaravara kuti ndiwe watora ndipe
nekuchimbida nhambo dzakandidya"
anotaura Jeka.

"Tora zvombo pawasiya ndopazviri,
wamboona rutsoka rwangu rwuchigura
kwese ikoku here, sei wananga ini?"

anotaura Makumbi.

"Chiiko panze apo zvadii Makumbi"
anotaura Gonamavende.

"Jeka ashaiwa zvombo zvake zvino
arikundizora mafuta enguruve yandisina
kudya oti ndini ndatora" anotaura.

"Ndozvamunganetsanirana here tora
zvoto zva Gata zviri mumba umo umupe
atsike matama enzira ozozvidzosa u
nhambo yaachauyisa muripo yangu
kana kuti anowedzera mombe imwe
chete usachadzisa zvombo" anotaura
Gonamavende achiwedzera gumi
pazana.

Jeka anongoshama muromo
ndokudzungudza akatarisa pasi

koaigodii. Anopiwa zvombo zvaGata
pamwe aiva mwana waGonamavende.
Anotambira ndokubva atopinda
munzira ndokunanga kumuzinda.
Chebamba akaona kuti hazviiti kuti
ndisvikirane na Jeka kumuzinda.
Akamanya mberi kwaJeka achikamhina,
ainge asunga gumbi rake negavi
reMuswati kuti paarumwa pasanyanya
kumurwadza uye ronda racho riindwe
nemuto weMuswati. Aiva ari divi
remunyasi. Zuva rakatozobuda ava kure.
Richitangawo kurova nhongonya ainge
odongorera kusvika kumuzinda .
Chebamba akananga nekumisungo yake
, zvineiwo akati asvika panewekutanga
akawana pakabatwa mhara. Akabva

anyemwerera haana kuda kutevedza
misungu yose, anoisumudza
ndokunanga kwaaiziva kuti ndokunouya
na Jeka. Zuva richitangawo kurereka
nguva iyi Chebamba aidya makwakwa
akagara pasi peMutarara.

"NdiChebamba here uyo, inga wadzimba
mwanangu , hauna makwakwa awasiya
here mwanangu ndipowo ndinyause
mumukanwa, apa wotondigurirawo
chidya ichi dai zvaibvira waindipa
nechityu chine nyama yakapfava ichi uye
akanuna wondipa ndoda kuti mai vako
vanobika vomene nhasi havaisi dovi
chidyu chine mafuta ichi" rinotaura Jeka
richibva ragara pasi achinanzvira
maromo. Airatidza kuti aneta kwazvo.

Chebamba ziso rake rakangomanya
kutsvimbo yaiva naJeka yaiva
yakavezwa iine mufananidzo we nyoka
iya inonzi Nyamapfingu yakamonera
muviri wetsimbo iyi. Musoro wayo aiva
weshiri iya inonzi hungwe. Uye
mufananidzo wenyoka iyi waiva
wakashamira shiri iya Hungwe kunge
inoda kuimedza , hungwe ichiita seinoda
kubhururuka ndomavezerwo ayaiva
yakaitwa . Chebamba akabva avhunduka
nazvo uye zvaiva nechirevo sezvo shiri
iyi ndiwo waiva mutupo wa Jeka
Chasura. "Mavezerwa naniko tsvimbo
yakanaka kudai baba, nyama
ndinokugurirai tasvika kumuzinda .
Hazvigoni kuti ndiigure kuno

ndingafamba ndichizara ropa inzwai
ndichangoibata ichikudziya" anotaura
achitambidza Jeka makwakwa matatu
asi meso ake aiva kutsvimbo iyi.

"Ndakaiveza ndenga tsvimbo iyi nezuro
ndozvandakaswerera ndichichena
hangu jinda rangu Urahwatasva"
anotaura Jeka.

"Hoo! Chero vakuru vakati tsvimbo
hainzi ndakanhonga ungatorerwa asi
ukaita yekuvezha inenge iri yako. Bva
ngatichiindai hedu kumuzinda
zvakanwanda tokurukura tasvika"
anotaura Chebamba ndokubva asimuka
anodzvara mhara yake ndokubva
vadungamidzana vonanga kumuzinda
asi hapana aitura nemumwe Jeka

ndoaiva mberi achinan'anidza tsvimbo yake. Vasati vasvika kure vakabva vaita mahwekwe na Dapi uyo aibva nedivi rekuchikomo chaiva mavirira asi aingocheuka cheuka semombe yarumwa nemago.

"Unobvepiko Dapi nguva ino uri wega kudai" anotaura Jeka.

"Zvamauya zvanaka changamire ndine mashoko , iwe Chebamba inda zvako. Changamire ngatigare pabvute apo" anotaura achitendeka pamusekesa. Chebamba akabva atofamba zvake ava vaviri vakabva vasara. Chebamba anofamba haana kucheuka . Anopinda muchirwizi ndiye vambu otarisana nesuwo diki, akabva aitawo mahwekwe

namai Shupikai vakakwinya
nhahwamaringa yavo vachiita
kufambisa kunanga kumuzinda.
Chebamba zvakamunetsa ndokubva
amira.

KUPERA KWECHITSAUKO 8

CHITSAUKO 9

Hana ya Dapi inoti tibvu tibvu kurova
kaviri meso ake ainge anjenga misodzi
yerudo. Kutendeuka kwakaita mai
Shupikai, vakafamba nhambwe imwe

chete ndokubva vanyemwerera
vakatarisa divi remavirira ndokubva
vamira ndivo tendeudeu kuna Dapi.

"Nyaya yako ndainzwa Dapi asi ngazvive
zvedu tega nekuti Jeka akazviti fe-e
panozvarwa mwana asina bvudzi"
vanotaura mai Shupikai.

"Ndava munhu mukuru ini mai Shupikai,
tichatambira tsoro yedu pasi pemvura
zvekuti manhenda Jeka kuti bata.

Handiti iye akakuroorerawo mai
Chebamba saka iwe chingakutadzisa
kuti ini newe tipengesane nerudo chii?,
Chinzwa mangwana nguva dzekuvhurwa
kwemombe unobuda mumuzinda
tonosangana kuchikomo chiri
kumavirira Chitemavakadzi , ini

ndichachimbidza kubuda unowana
ndichiveza mupini wedemo rangu
wavhunika tichipisa Chitunha cha
Urahwatasva" anotaura Dapi.

"Zvakanakai rega ndinomwa maheu
tikwidze kumuzinda" vanotaura mai
Shupikai .

Dapi anosara akamira moyo wake
waifara kwazvo . Anodzoka kuvarume
ndokubva agara zvake pasi.

'Kana watoteya mariva murutsva
hauchatyi kusviba magadziko, ndofa
ndayedza mai ava ndakavada kare zvino
vadzimu vandinzwa" anotaura ega zvake
ndokubva akutura mukombe wemaheu .

Chiundura nguva iyi ainge adzoka

apedza kumema zunde ramambo.

Akabva amira mberi kwevanhu ndokuti.

"Basa ramaita rakanaka kwazvo
ndovimba tapedza mambo vachanofara
kwazvo. Saka nguva ino ngatichiindai
hedu kumuzinda " anotaura Chiundura.

Vanhu vanoridza mhururu setsika
yaivako kare kana vanhu vapedza
kurima, varume vakabva varidzawo
mheterwa. Vakadzi vakabva
vatosimuka ndokutungamira ,varume
ndivo vaivawo kumashure. Nenguva
isipi munhu wese ainge ava pamuzinda
ndokunanga kudzimba dzavo. Mambo
Chirambadare vainge vagere pabvute
nemajengeta mambo avo vachikurukura
nhau dzakasiyana siyana. Chiundura

ndiye akapedzisira kusvika mumuzinda
akasvikonanga paiva namambo
ndokuvaswedza.

"Changamire wangu, basa tabata
tikapedza chasara mvura kuti ichiuya
zvayo imedze mbeu" anotaura
Chiundura akaringa mambo.

"Kana mapedza marwa mumire. Tarisai
mvumi dzakasengwa nemakomo idzo .
Kureva kuti hapachina mazuva inoturuka
chero musu. Ko Jeka abudirira kuinda
rwendo rwake here anga aripowo here
pamanga muchirima" vanobvunza
mambo.

"Anenge aida nekuti anga asiko, Dapi
na Madzore na Mhodzongwe ndovanga
varipo" anotaura Chiundura.

"Zvakanaka Jinda rangu . Saka ndovimba kuti mangwana anenge awira muno ndinoda kuti mubaye mombe kurima kwamaita kwandifadza, uye tichimirirawo Chebamba zvimwe mangwana anosvika zvekare" vanotaura mambo.

"Ririmunzeve changamire wangu chiregai ndinozorora" anotaura Chiundura achibva atosumuka paiva namambo ndokunanga kusasa kwake.

"Nhai amai , kubva zuro Chebamba kana kumuona, haadero aine kwaakaona musikana here ini ndikasara ndakatii vavava" anotaura Shupikai .

"Kuti haana kunovhima here , rega tione kuti nhasi hariviri auya here. Asi iwe

unofanirwa kutendererawo nedunhu
uchiona zvirikuitika nekuti vamwe
vasikana vanogona kunyangirawo
nerweseri. Uye ndiko kuti Chebamba
wacho umuone. Asi kana akatadza
kuuya ndichamuka ndichiinda kugomo
reChitemavakadzi mangwana nguva
dzinovhurwa mombe ndine mashizha
emutsvanyangari andoda kukupa kuti
uyise muhapwa mako wadero ndoziva
kuti chekutya hapana" vanotaura mai
Shupikai apa vainyepera mwana wavo,
vaida kuti zviite nyore kunoonana na
Dapi.

"Zvakanakai amai saka ndichaita
zvamataura. Regai ndiinde kumvura
nedzimwe mhandara idzo

dzakadengezera zvirongo idzo ndouya
ndogara kamwe" anotaura Shupikai
ndokusumuka ononga chirongo mberi
kwechikuva ndokubva abuda.

Anosvikobata vamwe vasikana
ndokubva vananga zvavo kurwizi
vachitaura nyaya dzakasikaya.

Mumwe musikana aiva mutema
zvekuti waitozoona nemazino kuti ndiko
kumeso kana ava kutaura. Aiva
akashata zvokuti kushata kwake
kwaimuremera aiita kunge arikuinda asi
achiuya kwamuri. Aiva akapiwa chipo
chekutaura zita rake ainzi Manzwei
akabva ati.

"Vasikana ini chandakanzwa
handinyarari, shoko rakabva

kunamambo makarinzwa imi rekuti
Chebamba ava kuda kuroora. Saka
zvava kwamuri kufuka kana kuwarira
mukana ndewenyu uyu kuti vana baba
venyu vave madzimambo ini vangu
vakainda nyika dzimu. Asi kana uri
sewe Shupikai usashupika hako sezita
rako uri Hanzvadzi ya Chebamba ,
Chiedza na Tutsirai mumwe vavo
ndoangagona kutorwa na Chebamba ini
ndiri chipuka ndipe mwenje zvangu.

"Iwe iwe Manzwei ini ndini ndiri
kuroorwa na Chebamba musingadi
muchida. Ihazvadzi yangu kupi
akazvarwa namai vangu here? Bata
chishanu ichi wozondiudza" anotaura
Shupikai akabata chiuno chirongo

achiisa pasi. Chiuno chainge
chasimudzwa mudenga senzembe
yabatwa neurimbo.

"Totenda yavira tsambakodzi yedemhe,
ini chandizoziva ndechekuti baba vangu
ndivo vachapiwa dunhu rino ini
ndaroorwa na Chebamba, iwe Shupikai
zviroto zveharahwa manyautsa
mukanwa kurota ichiyamwa zvauri
kutura. Uri kufunga negotsi here kana
nepfungwa" anotaura Tutsirai
mwanasikana wandoto. Shupikai
achinzwa izvi anovira nehasha achibva
aregedzera Tutsirai mbama kumusana
uyo ainge akarivara.

Tutsirai anorwadziwa achitonona pasi
rumwe ruoko rwakabata musana wake.

Anosumuka neshungu ndokubva
asvetukira Shupikai vachibva vawira
pasi vese, chirongo chaShupikai
chichibva ati bwaga kuita zvipenga
zvitatu. Tutsirai anatora chimwe
chipenga chehari ndokubva arova
Shupikai nacho mumusoro muchibva
maita madukuswa kunge mhoni ,
anochekwa dama nechimwe chipenga
chakagurika. Anoikwetsura mhere
achidzoka kumuzinda vamwe vasikana
vakabva vatanga kuseka
vachimusvorororedza.

"Unovaziva baba vangu , vachingouya
badzi wava muchoto . Ungaputsa
chirongo chamai vangu wakamira sani"
anoshevedzera ava kure akabata

musoro wake wainge wazvimba.

Tsutsirai anononga chirongo chake
ndokubva atonanga kurwizi vamwe
vasikan vanotevera vachiseka.

"Shungu sedzababa asi chinozivikanwa
hapana" anotaura ega Tutsirai. Nenguva
isipi vainge vasvika pamifuku.

Vakatanga vanogeza kubvisa guruva
rekumunda ndokuzochera mvura asi
zuva rainge ragara makomo.

Vakatozosvika kumuzinda ravira.

"Shupikai nhambo yaakasvika
kumuzinda aiita kupepereka.

Akasvikowana mai vake vachivira
nehasha vakatarisa mai Chebamba avo
vainge vakagara pachitehwe vakati
mwiro parutivi pavo vaiva nekatswanda ,

vainge vauya kuzotora zviyo zvekuti vakuye upfu hwesadza .

"Iwe ndozvawakauraira murume wako Mucharipa kuda kuzotorwa nemurume wangu nhasi uno wava kuhura na Chiundura , zvirinani hako kuti kana uchida izvi inda unogara na Chiundura. Zviyo zvekukuya upfu handikupi nhasi unovata nenzara kusvika Jeka adzoka. Budai muno nekuchimbida mharadzi yemunhu. Ruchiva rwenyoka inoruma chaisingadyi ndiwe iwewe" vanotaura mai Shupikai vachipotsera mai Chebamba nechitehwe chembudzi. Mai Chebamba vakabva vabuda ndokunanga kusasa kwazo. Shupikai akabva audza mai vake kurohwa kwaanga aitwa na

Tutsirai uye kuputsika kwechirongo.
Vakabva vati,

"Wangu mwana haarohwi nemwana
wemumwe munhu uyu anokurira muvhu
sembambaira. Murege ndinoda kugura
muswe wake uyoyo wakarebesa iwe
ndiwe unoorwa naChebamba
zvikaramba toita zvimwe murege baba
vako mangwana zuva ragara makomo
vanosvika pano rega timuredze sehove
tikamuchenjedza angangwara zvoreva
kuti mai Tutsirai ndivo varikupaka
Tutsirai mashoko kana kuti ndi Ndoro
ndouya ndichiisvitsa kuna Jeka baba
vako nyarara mwanangu" vanotaura
maiShupikai.

"Chibika tidye mvura irimo shandisa

iyoyi" vanotaura. Vakabva vabika
ndokudya ndokuvata asi Shupikai
akavata achibidirika nemarwadzo.

Usiku uhwu hwakaitira Dapi hurefu. Aiti
akati vate vate ofukura daunha
osimudza musoro kuti aone kuti
kwakuyedza here. Moyo waiva
wekunosongana na mai Shupikai
kuchikomo Chitemavakadzi. Mukadzi
wake akasvika pakubvubza kuti chii
nhai murume wangu nhasi. Asi
akapindura kuti nhasi ndadyisa
makosvo nenhengeni zvandizvimbira
mudumbu uri kumonya. Kutu ndibude
panze ndotywa kuitwa zvakaikwa
Urahwatasva akangourawa nechatisina

kuona. Mukadzi wa Dapi akabva agutsikanawo. Kwakazosvika pakuyedza hako asi Dapi ainge atambura. Nguva yainge yokamiwa mukaka, Dapi akatora mumwe mukaka ndokuinda nawo kumba kwamai Shupikai . Anoita rombo rakanaka kuwana varivoga.

"Mai Shukipai mukaka uyu, inga zvautori wega. Chinzwaka chiponda moyo , ini ndava kubuda kunanga kuya kwatarongana ndikokuti madziro asaona" anotaura Dapi achinyemwerera.

"Zvakanaka ndanga ndatoti zvimwe watoinda, chimbidza kubuda nekuti ndoda nhambo hombe kwazvo tichisasana usane kutsvaka mambwide

ne zviishangura kana tsambatsi
zvinondinakira izvozvo ndonzwa
pareremoyo ndikazvidya" vanotaura mai
Shupikai. Dapi anonanzvira maromo
meso akati piriviri , "Ndava kubuda iyezvi
itotevera kana wanga usati wabika
murivo kanya sadza nemukaka
mumbishi uyoyu rinosimbisa" anotaura
Dapi achibva abuda. Anonanga kusasa
kwemukadzi wake anosvikomira
pamusiwo ndokubva ati.

"Mai mwana, ndava kumbonoveza
mupini wedemo rangu kumakura uko
ndodzoka kwava kutonhorera kana kuti
ragara makomo" anotaura Dapi.

"Zvakanaka murume wangu,
tochitongobva tabatana

ndichinotsvakawo huni dzangu tarisai
svinga randakauya naro pano apa
rakapera kunge paigochewa nyama"
anotaura mukadzi wacho. "Dzozopera
nhasi nekuti ndati ndoda kunoveza
mupini wangu, wadii kumirira vamwe
vako vakadzi mabatana. Ini ndinoda
kutoinda nekudoro uko ndabva ikoko
ndatumwa namambo kunososa
pakapinda nemombe kubindu kwavo ,
ndozosumudza mariva angu ndichiinda
mugomo Gato ndoteya ndikosaka
uchiona tsvungu idzi , dovi reruninga
riripi ndidzinyike. Ndichipedza izvi
ndozonotema mupini wangu mhiri
kwerizi kumakomo anoita seakananzva
denga ayo zvekuti ndikada kuita

chinono ndogona kutozonoutema
mangwana chaiwo" anoruka hake
nhema dzake ndokubva atotora mbezo
nedemo zvaiva zvakabairwa muberevere
kwakufuratira ."Ndichataurei hangu
toona madzoka . Kutanga rini kusada
kufamba neni" anotaura mukadzi asi
hapana akamudavira Dapi ainge
atobuda dunhu.

Akananga nemavirira , hoyo mumakura
kwakunanga kuchikomo
Chitemavakadzi. Anotsvaka mambwide,
tsambatsi nema roro nezvishangura.
Ndokugadzira hake pavaizotandarira
akaisa mashizha. Anogara padombo
achiridza hake kamuridzo asi ziso raiva
munzira inobva kumuzinda. Pasina

nguva mai Shupikai vakabva vauya.

"Inorohwa ichapisa sezvo chinono chinengwe bere rakazodya richifamba mai Shupikai ndosakura here gura iri" anotaura Dapi.

"Sakura hako zvihuta zvava kutambiramo vene varo havachacheuki nekuda kwemafambo nguva ndeyako tingawanza mbambo pachitehwe cheshindi" anotaura mai Shupikai . Regai gomo iri rakapiwa zita iri nevakuru vaininge vaona. Zuva parainge rorereka vakanga vava kudyisana michero iro ziya kuna Dapi kuti teu teu seadirwa mvura , chiso kunge mombe yabva kusina furo.

"Dapi chero ndoresva kuona uyo ndi

Jeka asi anoita kunge ane munhu
waanaye" vanotaura mai Shupikai
vachisumuka pamakumbo aDapi. Dapi
anowarukawo ndokubva akotamira.

"Ndiye , usatya ndonzi Dapi ini rega
ndinosongana naye iwe uchitomanya
kumuzinda zvitete izvi bvisa marara
kugotsi wogumha nhahwamaringa yako"
anotaura Dapi achibva atodzika
mugomo ari museve wabva pauta.

Ndokunobata vana Jeka akazoona kuti
ainge ana Chebamba. Ndipo paakafunga
zvekutomuudza kuti Chiundura
arikufambidzana na mai Shupikai. Izvo
ariye hake, Chokwadi zino irema vakuru
vainge vaona.

KUPERA KWECHITSAUKO 9

CHITSAUKO 10

Charovedzera charovedzera gudo
rakakwira mawere kwasviba!, Vakataura
vakuru sezvo vainge vaona. Munhu
wese anoshinga pazvinhu zvake zvose
nekuti ukada kutya unodzamara
wazviwisira muchoto sezvo Matanda

mazunungunuswa rimwe rinenge
rakaora iwe uchityira kure. Dapi akaona
kuti akada kutya Jeka aizobatwa akaita
nyama yemagora. "Unobva nepi Dapi
nguva dzino iro zuva richivanga iro ziya
kuti nyakata kunge wadirwa mvura asi
kwambonaya kwawanga uri" anotaura
Jeka achigara pamusoro pedombo raiva
pasi peMusekesa.

"Zviripiko changamire wangu ndabuda
kumuzinda rungwanani ndichinovhima
kugomo Chitemavakadzi uko
kwandakafuratira zvino ndateya
musungo wangu ndokutenderera ,
zvineiwo ndabva ndabata mhara
ndainzwa kuchema kwayo ndiri seri
kwezimu hacha riya ririkwakadziva

mavirira rekugara mazizi riya. Saka
ndabva ikoko ndichimanya kwazvo.
Ndati ndava kusvika pamusungo
ndatosimudza tsvimbo mhara yabva
yadambura musungo ndokubva
yasvetuka yakandinanga ndabva ndawa
negotsi. Ndokubva yati kweza
yakananga mugomo Chitemavakadzi ini
ndikati Kana museve woda nyama
unodauka , fiki!, ndiri shure kwayo,
yakwidza mugomo ini ndiri shure hwatiti
nagonzo. Tatenderedzana imomo
dzamara tava pamhanza pegomo. ndipo
payazondinzvengera ndatozoiona
yatova pasi ichiuya nedivi ramabva naro
saka ndazonzwa usimbe kutevera
ndokutodzika hangu nhereka nhereka ,

asi kwayainda inofanirwa yafa chete
nekuti ndairova netsvimbo kamwe
chete ndiri mugomo umo" anotaura Dapi
achiruka zvake nhema dzake. Ko
aigotaura here kuti ziya raaiva naro
rabvepi, iye aswera namai Shupikai
mukadzi waiye Jeka , handiti paizvarwa
mwana asina bvudzi maida ati kudiiwo?.

"Mbudzi yemurombo kuchema
ichitevera bere. Iwe wanga watobata
wava kupukunyusa watadza kusunga
musungo zvakabata here? Zvimwe
ndiyo ina Chebamba ndasongana naye
paseri apo akabata mhara yawaona
akadzvara yanga ichitodziya kuratidza
kuti achangoibata nhambo yandaibata
ini, Saka iyezvi idomhanya unomutorera

asati ayambuka karwizi kari panyasi apo
titoigovana isu pano handinganosevi
nemukaka ini Dapi" anotaura Jeka
achisumuka ndokutarisa munzira
kwaiva kwainda na Chebamba chiso
chakazara mananda pahuma asi haana
kumuona.

"Haa changamire wangu yadeuka
yadeuka haichaorereki siyai ainde
tonomubata mberi" anotaura Dapi
achibata Jeka ruoko kuti agare pasi.

"Chiivhiya tinzwe nhau yawandimisira
munzira muno ndakateerera, asi pane
zvakasara zvoitika ndabva kani Dapi"
anobvunza Jeka achibva asendekedza
pfumo rake pamafudzi utesvero
hwepfumo huri nhungamakore.

"Changamire wangu nguva iya
yatakaparadzana imi muchibuda kuinda
kwamabva uku, isu tonanga kumuzinda
kuti titevere vamwe kuzunde ramambo.
Ndakasvika mumuzinda ndokunanga
kusasa kwangu kunotora badza. Saka
Pandakati nditevere vamwe vangu
vanga vatova kusuwo vana Madzore
ndakabva ndaita mwahwekwe na mai
Chebamba vakasumudzwa na
Chiundura vachitsvodana seri kwetsapi
ya Ndoro kuya kwakadzikatira . Handina
kuda kuvavhundutsira nhambo iriyo
hana yangu yakati usachimbidza
kumedza kutsenga ndichada, ndakabva
ndati kwati nemadziro eimwe imba ,
ndakabva ndaona mai Chebamba

mukadzi wenyu vavakusundidzirwa
mutsapi iya isina denga chongo iri
kurudyi kweya Ndoro. Ndipo
pandakabva ndakosora asi
Nhahwamaringa yaiva yatobviswa
Chiundura akasvetuka achii-----" Dapi
anogumira munzira kutaura mushure
mokunge Jeka rasvetuka ndiye dzi-i
kwakadero uko achiita kuhuta
neshungu mazino ake ainge ava kurira
kunge abatwa nechando ndokubva ati.

"Dapi! Dapi! Dapi!" Jeka anotaura
achishevedza zita raDapi katatu
ndokubva anyarara. Anovera pfumo
rake pasi richibva rati svata muvhu
achiita ruzha kuti 'Wa-aaaa'.

Dapi anodedera achidududza shure

achiita kugwesha haana kudavira. Jeka anofamba nhambwe shanu akatarisa kumuzinda ndokubva amira, ruoko rwerudzi rwaiva netsvimbo yake yaaiva apiwa na Gonamavende. Akabva atendeuka kudzoka kwaiva na Dapi ndokunomira paaiva abaira pfumo rake paya akabva aridzura. Pese apa hapana chainge otaura bodo. Ndipo paakazoti.

"Dapi , unondiudza kuti Chiundura kurima munda wangu inini. Ini ndiri mupenyu? Kureva kuti hazvina kutanga nhasi kaizvi?. Ivo mai Chebamba ndiri kuvatumbura handigari nemukadzi anopa rudo rwangu kumunhu wese wese , kuroora muroi kurinani. Wagona Dapi wandiudza izvi ndinoda kuti iwe

uone zvandinoita mumhu anotora
mukadzi wangu wakatarisa. Ndikosaka
ndakati uchava Jinda rangu guru.
Chiundura apinda nemwenje mudziva
mune ngwena. Hande kumuzinda iyezvi
nhasi anodzidza pamuonde" anotaura
Jeka shungu dzakaita kumuzadza,
muromo wake wainge wakapupira furo
kumucheto.

Dapi akabva asimuka paanga agere asi
hana yake yairova kunge ichabva.
Nechemumoyo akabva ati 'Ko
paachazvibata kuti ini ndodanana namai
Shupikai ndichaitwa sei. Nemabatiro
avandiita kuvasiya hazvigonhi ndotoda
mwana mukomana chaiye.
Ndikarambana navo ndinenge ndava

huku yabviswa manhenga. Kufa
kwemurume kubuda ura totangira mberi
ikoko, handiti iye akauraya Mucharipo
achida ivo mai Chebamba. Uyezve
mukadzi wa Urahwatasva ndini ndogara
nhake' anozvisimbisa Dapi ari shure
sezvo nguva iyi hapana aitura
nemumwe.

Jeka akabva acheuka ndokuona Dapi
akatsikitsira achidzungudza musoro.
Jeka akabva amira.

"Ko chii nhai Dapi wabva wanyarara asi
uri pamwe chete na Chiundura
zvawagoti una una sehuku yanaiwa
kunge ndiwe wakatora mai Shupikai
vacho?. A-aa kwete mhani ndoreva mai
Chebamba, inzwa ndava kutiwo mai

Shupikai kuda kutosvibisa mukadzi
wangu akarurama semukaka
unoraramisa rusvava".anotaura Jeka.
Dapi achinzwa kuti mai Shupikai
anovhunduka ndokubva
angodzungudza musoro ndokuzoti.

"Changamire wangu ini kunyarara uku!
dzitori shungu nekuti imi mukatadzirwa
zvaka fanana kuti ini ndini ndatadzirwa
nekuti inini pano ndikanzwa kuti mai
Shupikai vavata nemunhu nhasi uno!,
Ndogona kurova munhu akafira ipapo.
Ndikosaka ndakanyarara kutirwadziwa
uku . Zvino apa ndakati handidi
kumanya ndoda kuzvibatira ndoga
zvose ndizowana umbowo seuhwu .
Zuva racho ndaiva nebadza chete

muruoko ndopaakapona napo
Chiundura chete nekuti akazoita
zvekusvetuka achibuda mutsapi
ndokutiza dai ndaiva nemuseve
ndaimutumbura dai masvika atopiswa
iyezvi ava kutandara na Urahwatazva
nyikadzimu" anotaura Dapi asi matauriro
ake aiva akavanda mumadimikira.

Akabva asimudzira zvekare achiti,
"Sezvo muine kwamabva changamire
wangu uye makabva mumuzinda maita
rufu. Zvakadii kusvika mumuzinda
muchiiita kunge pasina chamuri kuziva
nekuti ndakanzwa mambo vachiti
vanoda kubaya mombe kuti vanhu vadye
nekuti vakafara nekurima kwakaita
vanhu ndipo pamunomubatira

Chiundura ipapo. Nekuti apa mukasvika muchipfuudza Chiundura mambo vanobva vati saka Jeka ndiwe uri kupedza vanhu vangu . Kungotaurawo munopaona sei sezvo mazano marairanwa uye pangwa uine rakovo", anotaura Dapi asi Jeka akabva aramba akanyarara kwekanguva ndokubva azoti.

"Nhasi chaiye Chiundura ari kufa, Zvose zvauri kutaura Dapi handizviteereri ndezve mugotsi matsuro , ivo mambo vacho ndiri kupfuudza zvekare, kwete nhasi! , asi rimwe zuva saka ndotoda kuti vataurise ndobva ndagura muswe wavo uyoyo"anotaura Jeka ndokubva vapinda muchirwizi ndiye vambu asi zuva rainge ratotsvuka sezvo vainge

vatora nguva yakareba vakamira .

Kumira kwakaita Chebamba , mai
Shupikai vakabva vacheuka
ndokusonganidzana meso.

"Chebamba madzimba zvemwanangu"
vanotaura mai Shupikai asi Chebamba
anoramba akanyarara akavatarisa.

"Asi mambodonha gotsi rese rine uswa,
iko kuparika muviri wese chii, ndamboti
zvimwe mabva kuhuni asi huni dzacho
hamuna muri kubvepiko nhambo dzino
dzekugadzirira kubika kudya
kwemanheru" anotaura Chebamba
achisvika pana mai Shupikai.

"Zviripiko mwanangu, huku yemurombo
kukandirira mumuti. Huku yangu

yandakabva kuchekera uswa unyoro
huno yanongwa nenyamudzura zvino
ndaona ichidonhedzwa mugomo iro
Chitemavakadzi saka ndainda
ndichimanya kwazvo zvino kuparwa uku
kwese kwaumona ndanga
ndichitukutira mumiti ndazosvedza
ndikadonha , zvino ndafambira
mashangurapata ndasvika chikovo
chavakutopedzisa musoro wayo"
vanorukawo dzavo nhema.

"Ndimu mandaswera mugomo imomo
dai Dapi aiona zvakanaka aindiona zvino
pfungwa dzake dzanga dzisinei
nezvekuringa mativi ose uye dai ndanga
ndiri muvengi mumwe ndaibaya
nepfumo" anotaura Chebamba

achinyepa sezvo ainge aona Dapi
achibvako kuchikomo ichi.saka anga
oda kuziva kuti vanhu ava havana
kuonana here, uye zvii zvaitika? Akaziva
kuti kuti apa ndateya gonzo neriva,
inobatwa chete.

"Chebamba waona chii? Anga achiitei
Dapi wacho uye anga anani iwe wanga
uri pai" vanotaura mai Shupikai asi
vainge vofemedzereka vachidzanha pasi
vachizunza maoko kunge vari kutsva.
Chebamba haana kupindura akabva
atofamba kunanga kusiwo jiki
remuzinda . Mai Shupikai vanofambisa
ndokubata Chebamba ruoko ndokumira
mberi kwake, Chebamba akabva ati,
"Handiti imi manga muchitsvaka huku

yenyu here, saka kuti nditaure zvanga
zvichiita Dapi uye nani, handingatauriri
imi maita mutete asi kuti ndada kuudza--
-----" anogurisirwa munzira kutaura.

"Chebamba ndiudze anga achiitei ,
ndokupa mwana wangu Shupikai
pasina muripo Chebamba taura tinzwe,
waona kuti ndiyani here waanga ainaye .
Sak unoda kuudza ani Chebamba taura
usanyarara" vanotaura vachiratidza
kutya, makumbo avo ainge overera
mvura.

"Musandibata nguva handina ndoda
kunovhiya mhara iyi nguva ichipo ndoda
kudya zviropa nemaguru" anotaura
Chebamba asi nechemumoyo akangoti
'Ano nyumwa bere ndeuya akazora

manda, ndatoziva zvose apa . Zvino
vatamba naMahiswa' akabva azoti.

"Ndamuona achitanha tsambatsi
masikati chaiwo ndopandamusiya
ndava kunoteya musungo yangu nyasi
uko, anga atori ega asi handina kutaura
hangu naye sezvo ndanga ndichimanya"
anotaura ava kunyangarudza ,ko handiti
chokwadi chainge chava muhana.

Nguva iyi mai Shupikai vakabva
vanyemwerera sezvo vakaziva kuti
Chebamba haana chaaona uyu vakabva
vaseka zvavo.

"Ndanga ndafunga kuti zvimwe anga
aine mamwe machinda achironga dare
reku-----!" Vakabva vanyarara.

"Saka muchandipa here Shupikai

wamandivimbisa kuti ndiroore" anotaure
Chebamba achida kunzwa dama ramai
Shupikai, uye mupfungwa dzake pane
zano raainge atoruka.

"Hongu ndokupa chero mangwana kana
nhasi uno kana uchida kutorora zviri
kwauri kufuka kana kuwarura" vanotaure
nguva iyo vaine vatova mumuzinda
vavakutopinda muchivanze chawo .

"Zvakanaka momuudza kuti mangwana
azosvika kumba ndizotaure naye sezvo
ndingazotangirwa nevamwe" anotaure
Chebamba ndokubva vaparadzana
onanga kusasa kwambuya vake
nemhara iri pamafudzi. Anomanyirwa na
Chenai hazvadzi yake mwana wamai
vake asi ari waJeka.

"Titambire mukoma manga
muchibvunzwa namai , nezuro vakavata
vachichema nhasi zvekare vakasuwa"
kanotaura Chenai asi ange akanjenga
musodzi zvairatidza kuti pane
chariuraya zizi.

"Kuchema?nekuda kwei? Koiwe kupora
sebota remurwere kudai chii?"
Anobvunza Chebamba.

"Handizivi vakaramba kutaura, saka ini
ndingafarawo here vari kutaura zvekuti
ndichaurawa" anotaura.

"Ndiri kuuyako, inda unoti mukoma
vadzoka , wozouya watora nyama
kumba kwambuya uko yekubika"
anotaura Chebamba ndokubva
afambisa achiinda kusasa kwambuya

vake. Anowana vakagara asi vainge
vakagara pachoto matama avo aiva
akanyorova uye vakatsikitsira. Mbuya
vake vakabva vachimbidza kuvanza
misodzi asi vainge vadya manonoko
Chebamba ainge aiona.

"Mbuya zvadiizve mukagochema, chii?
anotaura Chebamba achidzisa mhara
pasi.

"Ndingagarisika here Chebamba usipo,
ukabuda hautauri unoziva iwe kuti baba
vako Mucharipa ndiyo firo yavo iyoyi
,hanzi mbudzi kudya mufenje
hufananyina , Chosiya huyo chokuya nei.
Nhasi mai vako pano vava kuzorwa
mafuta enguruve yavasina kudya"

vanotaura vaRusanzu.

"Kuzorwa mafuta?nani iyeye uye vagoita
sei mai vangu vakanyorova serusvava ,
ndopaneziso rangu ipapo kwanzii
mbuya , kana kuti regai ndiindeko ini
ndomene, nhasi kamba inosongana
neane demo" anotaura achibva ati sumu
kubva pachigaro chake neshungu,
anononga tsvimbo yake yaanga aisa
pasi pamwe nepfumo ndokubuda
mumba ari museve wabva pauta
ndokunanga kumba kwamai vake.
Anosvikoita gonhi rekurova negumbo.
Anosvikoita mahwekwe namai Shupikai
vakamira mberi kwechikuva vakabata
chiuno chainge chego nerumwe ruoko
rweruboshwe vakaita kukotamira .

Rumwe ruoko rwerudyi rwakatendeka
huma yamai vake nechigumwe.

"Baba Shupikai vauya, nhasi iwe
ndozuva rako rekupedzisira kuona nyika
basa kuhura , kana uchivimba na----" .
Ndimai Shupikai vaitaura zvose izvi
zvaiva munzeve dza Chebamba uyo
akasvikomira meso akatsvuka
seerovambira ravhiringwa mubako.

"Rambai makadaro ruoko rwenyu mai
Shupikai mukangobvisa chete masiya
nyemba" anotaura Chebamba
achivhomora bakatwa rake muhudyu
raivaima serunambi rwemoto.

Mai Shupikai vanoyedza kudzora ruoko
rwavo shure , kubvisa mumwe wavo
wainge wakabaya huma yamai

Chebamba.

"Ndati dzosai ruoko parwanga rwuri
nekuchimbidza handisi kuseka handisi
murume wenyu. Vana mose budai
panze nekuchimbidza" anotaura
Chebamba muromo wake uchiita kuhuta
neshungu semunhu anechirwere
cheshura matongo chakombera
mumuviri. Chenai nechimwe chisikana
vanobuda mumba vachimanya
ndokubva Chenai arovera gonhi
ndokubva ravharika , tsvatsva ndiyo
yainge yasara yakachenesa mumba
mese.

Mai Shupikai anodzosa ruoko pahuma
yamai Chebamba pavanzi dzoserai.

"Handina akawanda nemi ndingapedza

nguva zororai murugare" anotaura
Chebamba achisumudza bakatwa rake
mudenga , nhambo yaanga oridzisa
gonhi rakabva rarohwa negumbo zvine
ukasha, Chebamba akabva ati cheu
kumusiwo ndokuona ari Jeka uyo ainge
akasimudza pfumo rake mudenge
akaruma muromo wepasi, chiso chake
chakanyanga sechenyati.

Veduwe Chitaurirwa hunyimwa mbare
dzekumusana. Zvaida kuzvionera
pamhuno sefodya.

KUPERA KWECHITSAUKO 10

CHITSAUKO 11

'Yazvikanga yoga nemafuta ayo. Zvaita zvakanaka apa , ndofanirwa kusvika ndichibaya mai Chebamba nepfumo vofira panzvimbo setsuro. Ndikadaro chete ndoziva kuti dzawira mutswanda kunongera hadzichanetsi . Chenai ndiye wandava kufanirwa kuinda naye

kunopa Gonamavende. Handichengeti
mwana wepfambi ini. Akaroorwa uyu
anobva atevedzera matsimba amai vake
ndizvo

zvaachaita , Chosiya huyo chokuya nei.
Zvirinani kuti anogara ne n'anga
Gonamavende ovata achisikiswa hakata.
Kunyadza muchenjeri kumutakudza
mwana wake. Kana ndadai hapana
chandichatya kana ari saChebamba
akada kudziya moto wembava bedzi apa
anenge apinda nemwenje mudziva
zenze rake ndinodambura.

Ndakamunyara paakavhika pfumo rangu
ndichida kubaya Chiundura .

Ndakamunyara asi ndakangoti
Chafamba kamwe hachiteiwi , akada

kununura mai vake nhasi paokamwa imbwa hono chaiyo'. Jeka anotaura ega nechemumoyo zvaisanzwikwa na Dapi uyo aiva shure kwake. Nguva iyi vainge vachitsvika pasuwo diki. Hapana aitaura nemumwe asi vaikanda nhambwe. Dapi akaona ega kuti kufamba uku kune chirevo. Vanoti vachangopfuura pasuwo, Dapi akabva ati.

"Changamire wangu, ko ndagozobvunza here zvandaona nemeso. Tsvimbo iyi makaiwana kupi yakaisvonaka kudai" anobvunza Dapi.

"Ndakaiveza nezuro ndakaswera mugura renyasi uko kwakadziva kumabvazuva, zvino mbezo yangu yawira mumvura" anotaura Jeka

achinyepera Dapi.

Nenguva isipi vanopinda mumuzinda.

Jeka haana kumwe kwaakada kunanga

kunzwe kwekuimba yamai Chebamba,

Dapi akamboda kunooni mai Shupikai

asi akazorega, aida kubvunza kuti

mafamba zvakanaka here?. Akabva

ateverawo shure aida kuona pfumo ra

Jeka richisukwa neropa ramai

Chebamba sezvo chiso chake chaitaura

choga uye kutyisa. Jeka anosongana na

Chenai uyo aimanya achiinda kwambuya

vake vaRusangu.

"Iwe mai varimo here mumba umo, uri

kuinda kupi kunze kwavira kudai?

ndakati chii nekuinda kwa vaRusanzu?"

anotaura Jeka asi haana kuda kumirira

mhinduro dzaChenai anofambisa
akananga pachikumbaridzo , anoita
kukwakuka achimira pachikumbaridzo
ndokubva arova gonhi negumbo richibva
rati bherengende anopinda akasumudza
pfumo mudenga . Akabva aita
mahwekwe na Chebamba uyo ainge
akashumudza bakatwa mudenge. Asi
akaona kuti bakatwa iri ririkuda
kuparadza mai Shupikai avo vaininge
vakamira matama avo achiyeredza
mvura yekutambudzika.

Jeka haana kutaura anofamba
zvishoma nezvishoma achiinda kwaiva
naChebamba.

"Jeka mira pauri ipapo wotaura
chawafambira , ukangofamba ndava

kuregedza bakatwa kuna mai Shupikai ukasara wava tsvimbo rume" anotaure Chebamba. Asi nguva iyi Jeka akaona kuti ndatangirwa akabva apfava setsvingudzi iri kupfimbirwa. Anodzisa pfumo rake pasi ndokubva arizendamidza mumadziro.

"Zvaita seiko mwanangu Chebamba" anotaure Jeka achibva atora chigaro ndokugara.

"Kana muchida kuona ruvara rwangu ini shungurudzai mai vangu ava. Asi chandiri kuda kukuudza Jeka ndechekuti rimwe zuva uyu mukadzi wako uchawana ndauraya. Kubaya mai vangu huma vakamira pai sani?" anotaure akatendeka huro yamai Shupikai

nebakatwa raiva pasi pechirebvu.

"Ukagotaura zvekuda kuuraya mukadzi wangu akarurama iwe usingatauri kuti chii chaitika zvinobetserei nditsanangurireka ndinzwe handiti baba vemusha ndauya here . Ungatonga mai ini ndiripo here zvakaitikepi izvozvo?" anotaura Jeka.

"Mai Shupikai tsanangurirai Jeka anoda kunzwa chaita kuti mumire ipapa muchibaya mai vangu huma . Taurai makabata huma iyi kusvika ndati chibvisai itai nekuchimbida nguva handina" anotaura Chebamba.

"Mai vako ava Chebamba, vakabatwa na Dapi vachitsodewa na Chiundura kutsapi ya Ndoro uko Nhahwamaringa

yainge yatosunungurwa kuti vaite mutambo wevakuru. Kovakatora mukondombera handiti ini ndozarawo, ungachenesa Chiundura chaiye? , ini semukadzi zvinondirwadza Inochema ndeiri paurimbo asi iri muriva inoti denga rawa. Ndikosaka ndimire mumo ivo hazvivarwadzi nekuti vakafa kare ava" vanotaura mai Shupikai. Izvi zvakaita kuti Jeka avire neshungu ndiye kwaku pachigaro paanga ari achibva amhidzura pfumo rake pamadziro.

"Nhasi mai Chebamba muri kufa , mune chokwadi kundigarirwa nhaka ,kundihurira senge ndakafa ini ndichiri mupenyu ndichirikutsika uswa huchimuka, hazvigoni ! , Iwe Chebamba

buda muno nekuchimbida nditonge
mukadzi wangu ndomene
haungavhikiriri mai vako nekuda
kwehupambwe" , anota Jeka. Asi
Chebamba haana raakapindura panguva
iyi. Ainge ohutisa gumbo rake riya
rekurumwa nembwa. Dapi akabva
apinda akasungawo chiso.

"Mai sumukai tiinde, kuna mambo. Iwe
Dapi handina akawanda newe upenyu
hwako huri muhana yangu" anota
achibva atarisa mai Shupikai,
ndokutarisa Dapi zvekare. Nguva iyi mai
Shupikai vakabva vachururuka misodzi.
Hana yaDapi yakabva yatanga kurova
sezvo ziso ra Chebamba rairatidza kuti
ari kuziva zvole zvaiva muhama yake.

"Handiti ndiwe wakaona mai vangu
vachihura, sei iwe uchiona zviri muziso
remumwe asi mako muine zidanda.

Bvakana zvakaderi ini ndava ku-----"

Chebamba haana kupedzisa mashoko
ake akabva airegedzerwa tsvimbo
nechemugotsi na Jeka ndokubva aona
rima nguva iyoyo ndiye pasi dhi-i ,
akanyangirwa nhambo yaaikotama kuti
asimudze maivake vainde kuna mambo .

Dapi sunga mumhu uyu kana kuti tarisa
uone kuti achikufema here asi ndoona
senge ainda nyikadzimu ruoko rwangu
rwataura, kana asina wopedzisa
netsimbo yako , iwe mai Shupikai buda
muno nekuchimbida uinde kusasa
kwako unopfumbira muromo ikoko

hapana chawaona" anotaura Jeka
achiinda paiva namai Chebamba.

"Anosvikovati dzvi-i ndiye bakatwa rake
vhomo muhudyu" wava kutevera mwana
wako kwamupfiga nembwe. Une
chokwadi kuhurira mambo. Unoziva kuti
ndini ndirikutonga dunhu rino here?

Nhasi waigochera pautsi" anotaura Jeka
uku akabata muromo wamai Chebamba
kuti vasati bufu. Anovasundidzira pasi
Dapi ainge atovasunga muromo
nechekare . Anovagwadamisa
vakabatirana ,Jeka anosumudzira
Nhahwamaringa yamai Chebamba
ndokubva avhomora pfumo rake raanga
aisa muchoto. anoripfekera pfumo
rakatsuka sezimbe nekumashure

makwai Chebamba raiita kukwiritika
chiutsi, airinzwa richidambura mutsinda
nhoko dzamara rasvika pagurokuro
ndoparakamirira , anoritenderedza
katatu richimonya ura ndokubva
arivhomo . Anotora zimbe rinopisa
ndokuribaira kumashure kuti ropa
rosabuda riungane mudumbu.

"Dapi handiti unoona kuti hapana ationa,
saka zvava pano tora tambo yemombe
iri seri kwegonhi iyo wosungirira
padanda iro toda kuti vanhu vazongoti
mai Chebamba vakazvisungirira, ita
nekuchimbidza nhambo dzatekaira . Ko
Chebamba afa here uyu" anotaura Jeka
achitsika Chebamba nezitsoka rake
raiva neman'a.

"Hongu changamire mweya wake
watosva nyika dzimu kuna baba vake"
anotaura Dapi achisungirira tambo
padanda raiva pakati peimba
rakachinjika.

"Rega ndione" anotura Jeka ndokubva
abudisa bakatwa rake anocheka nzeve
yekuruboshwe asi Chebamba haana
kufurukuta.

"Afa uyu, asi nhau iri pano iwe Dapi na
Madzore ndinoda kuti mubude dunhu
rino asi mobuda nekuchipukunyuko uko,
nechitunha cha Chebamba uyu .

Ndinoda kuti munange nemabvazuva
mobuda dunhu rino, Mukasvika kurwizi
Nyazvidzi modzika narwo rwizi irworwo
muchiona dziva riri kujinga kwegomo

rine manhanza monokukandira ikoko
makarwe owana nyama,
musamukandira mudunhu rino hapabudi
chakanaka" anotaura Jeka vachipedzisa
kusungirira mai Chebamba ndokubva
varezuka vari pakati peimba.

Jeka anofamba achiinda kumusiwo
ndokubva avhura gonhi sezvo nhambo
iyi ainge arivhara. Anoona panze pasina
ainge achifamba famba.

"Sumudza chitunha ichocho utobuda
jena guru hakuna uku , ndichibva pano
ndava kunanga kuna Madzore mosanga
pachipukunyuko" anotaura Jeka.

Dapi anosumudza Chebamba zvose
nezvombo zvake ndokumukandira
pafudzi anobuda ndokubva atoti verere

achibuda mumuzinda hoyo
kuchipukunyuko. Jeka anonanga
kusasa kwa Madzore asi anoita
mahwekwe naye achibva kudare.

"Madzore huya kuno asi hauna kunzwa
kuti ndauya zvausina kuuya kukwazisa
mambo" anotaura Jeka.

"Ndigere kunzwa shoko changamire
ndiregererei madzokozve" anotaura
Madzore

"Izvezvi nanga kuchipukunyuko
unobatana na Dapi jongwe repiri
rofanirwa kurira madzoka muno
nekuchimbida Madzore", Anotaura
Jeka achibaya baya pasi
nekumagadziko kwepfumo. Madzore
haana kuda kupikisa sezvo aiziva kuti

Jeka haana zino rinooneka kana
atsamwa uye apa aitova mhuka chaiyo.
Haana kuda kubvunza kuti
matitumepiko . Akangoti zvizere
ndononzwa na Dapi.

Madzore akabva atoti verere sezvo
ainge anzi usaonekwa, anomanya
achisvetuka makwenzi akanosvikirana
na Dapi. Uyuwo Jeka anosara akamira
ndokubva atofamba achiinda kusasa
kwake, anosviko zvikandira padaunha
painge patowaridzwa kane namai
Shupikai. Anovata negotsi akatarisa
mudenga meso ake aiverenga nhungo
dzaiva dzakapfuririswa sasa iri.

"Tsoro yangu yabuda bhobho ndadai
ndava mambo" anotaura nechemumoyo

make ndokubva anyemwerera.

Dapi anotseta Chebamba pasi.

"Aa-a ndiyani uyu nhai weDa-----"
anotaura Madzore asi Dapi akabva
abata Madzore muromo.

"Hana ngaisimbe Madzore , watanga
nhasi kuoma chitunha here? Ndi
Chebamba uyu tamuuraya. Saka
izvezvi toda kunomukanda mudziva asi
kwete redunhu rino , ndaona sekuti
madzova emuno tikamukandiramo
pane zvinoitika , saka Jeka ati indai
naye kure chaiko . Saka tichafamba
tichichinjana kusumudza chitunha ichi ,
iye akuti chii Jeka" anobvunza Dapi
achibuda kunze ndokukweva Chebamba
"Kwanzi jongwe rekutanga ngaririre

madzoka" anotaura achibudawo. Saka
ngatitokanda nhambe chaiko zvimwe
pane rimwe rakatimirira basa". Varume
vaviri ava, vakapatimba pasi
vachitukutira nemumiti vakananga divi
remabvazuva. Nhambo yakatanga
kunzwikwa dova pamapundo vainge
vagura mitumhu. Dapi ainge achineta
zvino asi semunhu ainge atumwa uye
aizodawo kuva jinda guru akati kufa
kwemuruma kubuda ura. Vanopinda
murwizi rwainge rwarehwa na Jeka
Nyazvidzi ndokudzika narwo. Rwaiva
nemvura yaisvika mumabvi, vanoti
vavanyasi chaiko vakaona gomo rainge
rarehwa remhanza raitonzi Chemanza.
Ndokunanga kwarwaiva , nenguva isipi

vanosvika ndokuona zvedi panezidziva .
Ndokuti mumwe kumakumbo mumwe
kumaoko vakabatirana . "Pashi ,piri
,tatu" anoverenga Dapi paakangoti tatu
vakabva varegedzera Chebamba
mudziva . Mvura ichibva wati bvuva-
bvuva zvine ukasha. Vaviri ava havana
kutarisa zvakawanda vakabva
vatotendeuka ndokudzoka kumuzinda
vachifambisa kwazvo sezvo hapana
chavainge vakabata kunze kwezvombo
badzi. Jongwe rekutanga richingochema
ndiyo nhambo yakasvika Dapi na
Madzore mumuzinda. mumwe
nomumwe ndokunanga kusasa kwake.
Kumanya kwakaita Chenai achiinda
kwavaRusanzu , chimwe chimwana

chiya chakabva chaindavo kumba
kwamai vacho. Chenai akasvikopinda
mumba ndokubva agara pajinga
nambuya vake.

"Wagosiya mai nani Chenai handiti
vanoda kuvhenekerwa vachibika here
nekusukirwavo mugoti" vanotaura
vachibura hadyana vayo.

"Mukoma Chebamba vati budai inda
kuna mbuya, vanga vakabudisa bakatwa
saka ndichaindako kana vadzoka asi
vakanonoka ndovata hangu muno"
anotaura Chenai.

"Chebamba aneshungu mwana
wemwana wangu uyu . Adiiko kuzviita
kwakachena pane kuita mhirizhonga
kwavira kudai regai tione kunowira

tsimbo nedohwe. Tora ndiro ndikuburire sadza" vanotaura vaRusanzu. Ndokubva vapakura sadza vanovigira mambo ravo vaiva kuimba yeumambo.

"Chebamba achigere kudzoka nanhasi here nhai vaRusanzu". Vanobvunza mambo . "Adzoka asi abuda kuinda kunamai vake saka achigere kudzoka" vanopindura vaRusanzu.

"Ndomuda pano kana adzoka ngaasavata asina kundiona " vanotaura mambo. VaRusanzu vakabva vadzoka kuimba yekubikira. Vaifunga kuti zvimwe vachawana Chebamba adzoka asi zvakava zviroto zveharahwa manyausa mukanwa kurota ichiyamwa, vakasvika pakutonovata vakaona kuti

uku kwatova kurindira guyo seimbwa.

KUPERA KWECHITSAUKO 11

CHITSAUKO 12

Zvairwadza vadzimu nekuti ndivo badzi
vaiona chiitiko ichi. Kudai vaiva vanhu
vaiona tingadai tichiti zvairwadza vasara.
Zvichikonzerwa nenyoka inoruma
chaisingadyi Jeka. Mumoyo make aiti
nzou haitadziswe kufamba nekuda
kwekuhukurwa neimbwa. Asi
chaasingazive ndechekuti nzou

inoputsirwa pasi nesvosve. Pava pakati
pahwo usiku , mhupo inovhuvhuta
zvineukasha ichibva mavirira egomo
Nyachibvi kune ninga. Matenga edzimba
aiita kunge achasumudzwa nemhupo iyi .
Dapi na Madzore ndiyo nhambo
yavainge vachangopinda mumuzinda
vachibva kudziva riya. Zvakaita kuti
kunze kuve nedehwe mukwindi rerima
zvokuti waiti ukaisa ruoko kumeso
kwako waisarwuona. Kwainge
kwasvibva sepasi pehari. Iwo makore
ainge aputira denga rese. Nhambo
dzekukukuridza kwejongwe repiri mvura
yakabva yadzatuka, ichibva mavirira
yakananga mabvazuva zvakasongana
nezimhupo riya.

"Mwanangu kuno kwawauya nguva haisati yakutendera. Haungapfuudzwi nemuvengi akandipfuudza. Tarisa madzisekuru ako ese aya" anotaura mumwe murume chiso chake chaiva chakashatirwa chichityisa kwazvi uye achibuda ropa mumuromo pamwe nemumhino. Murume uyu aitaura na Chebamba asi nzvimbo iyi haina akaziva kuti ndeipi kunze kwevaviri ava.

Murume uya anotaura achibva atendeka kwaiva nedzimwe harahwa dzaiva nezvuma muhuro uye paiva nemumwe mukweguri aiva nendebvu dzaiva dzakareba seruoko nepfumo raiva rakatesvera kwazvo richivaima kuutesvero kwaro.

"Ndavaona baba, asi kwandabva uko hakuna kumira zvakanaka kuri kupisa kunge majuru ari muhari kutsva kwacho , ndati regai ndiuye ndizorore nemi baba" anopindura Chebamba.

"Kana nguva yako yakwana uchauya kuno nyikadzimu , nekuti nzvimbo yako kuno haisati yavako" anotaura murume uya waaiti baba.

Chebamba anoramba akanyarara asi achiyeredza misodzi asingabhwairi.

Nguva iyi , murume uya wendebvu refu akabva afamba achiuya paiva pamire Chebamba na baba vake Mucharipa. Anosviko mira pakati pa Chebamba na Mucharira avo vainge vakatarisana semachongwe ari kurwa . Murume uya

akabva abata mucharipa pachipfuva
ndokumuti ainde kwaiva nevamwe.

Murume uya anosara akamira na
Chebamba. Anotenderera Chebamba
katatu ndokubva amira mberi kwake.

"Muzukuru, inda unopedzisa basa
nyangwe zviome sei kufa kwemurume
kubuda ura. Uchafamba nenzira
dzineminzwa asi baiwa uchiinda.

Tambira pfumo iri richakurwira
kuzvikara zvose" anotaura murume uya ,
Chebamba anotambira pfumo riya ,
nguva iyi aiita senge akamira pamawere
egomo zvekuti aiti akatarisa divi ainzwa
dzungu , kuti asumudze tsoka aisvedza
akanowira kumapiripiti pasi pegomo iro
raiita kunge rakatunga denga.

Chebamba akangoti achiritambira
pfumo iri, murume uya akabva
asundidzira Chebamba uyo akabva
aikwetsura mhere kuti 'Yowe-ee'
zvinemaungira anopidiguka achidzika
pasi akananga muzidziva raiva
rakasviba kwazvo mairatidza kuti mune
makarwe. Nhambo yaakati bvuva
muzidziva iri ndiyo nguva yaakati pepu
achiita zvekukwakuka kubva pamajecha
paanga awira nhambo yaaka kandirwa
mudziva nana Dapi. Havana kuona kuti
kwavakandira Chebamba kwaiva
nemvura shoma uye kuine jecha.
Paakakwakuka aivhomora pfumo rake
rainge ririkumusana kwake raiva
rabairwako na Dapi nhambo yaakanzi

sumudza chitunha ichi utobuda
mumuzinda na Jeka. Saka aida kuti
azviite nyore kusimudza. Achipedza
kuvhomora pfumo rake anoripotsera divi
raiva nemvura yakawanda , pfumo
rakabva rasvikoti mumukanwa
megarwe rainge ratosvetuka nechekare
kuti rimurume. Kukurukura hunge
wapotswa asi apa paiva
pasingachadanwi anonzwa. Garwe riya
rakabva rangoti o-o kamwe chete
richibva rawira mumvura ropa richibva
rati piriviri mvura yose.

Nguva iyi mvura yaiita kutsvotsvoma
ichinaya, yaipenya zvokuti waikwanisa
kuona zvaiva kure kana yapenya. Ndiro
rombo rakanaka rakaita Chebamba.

Garwe riya risati ranyura mumvura
anosvetuka ndokubata hwiriko yepfumo
ndipo pakabva pabuda rimwe garwe
zvakare. Rakasumudza musoro
waro,nguva iyo ainge akatsikitira
paneriya raanga auraya anocheuka
mativi ose ndokuona akombewa
nemakarwe airatidza kuti anenzara.
Nguva iyi kwakabva kwapenya
Chebamba akabva aona kuti dziva raari
iri pajinga paro paiva nemuonde waiva
nemidzi yakaremba ichinanga
mudziva umu yakaita matambo
matambo. 'Vadzimu musandisiya inga
mati enda unopedzisa basa wani"?
Mabva mandifuratira seiko?" Anotaura
nechemumoyo achitenderedza pfumo

rake. Pakapenya mvura kepiri
anosvetuka akaisa pfumo rake
mudenga akaribata akananga kumidzi
wemuonde achiita kukwamatata ,
pfumo rake rakabva rasviko haka
mumwe mudzi wemuonde nerimwe divi
rekuutesvero. Anofemudzeka akabata
pfumo rake neruoko rumwe chete
rumwe rwacho rwainge rwakabata dati
rake rainge radambuka tambo
yekukochekeresa muhuro. Makarwe
aisvetuka achiyedza kuda kubata
makumbo aChebamba ayo aainge
akaita ekugonya sezvo kumatambarara
airumwa . Chebamba anoruma dati
remiseve yake pamuromo. Ndokubva
abata pfumo rake nemaoko maviri,

anotanga kubuda mudziva muya,
nechemumwoyo aingoti vadzimu
ndiringeiwo hwiriko risavhunika.

Akakwira dzamara abata mudzi ndipo
paakatura mafemo. Anoshingirira
dzamara abuda mudziva riya ndokubva
azvikandira pasi achifemedzereka
sembongoro yakasungwa ichirima
mudoro(bani).

Chebamba anogwesha achiinda pasi
pemuonde uya dzamara asvika pahunde
yemuonde uya ndokubva agwesha
ndokumuka achibva agara pasi
akazembera hunde yemuonde uyu.

Nguva iyi mvura yakabva yatanga
kugasa ichiita zvisishoma zvisishoma
dzamara kwasara zvipfunha mbuya

badzi.

"Kuno ndauya sei , uye ndauyiswa nani chii chaitika kuti ndisvike kuno uye ndimboripi kudziva rakadai?" Anotaura ega Chebamba , anoyedza kusumudza musoro wake asi anonzwa muhuro make muchirwadza. Paanoda kuti asumudze gumbo rake rakabva ramurwadza paya paakarumwa neimbwa dza Gonamavende. Nguva iyi airatidza kuti hapana chaari kuziva.

Nyamasasi pamwe neutunga zvakasvika pakubuda Chebamba akangogara pasi achikwenya musoro wake.

Hope dzinobva dzaita zvekunyangira sezvo dzisina mugoni, ndipo paakatanga

kurota akasimudza bakatwa mberi
kwake kuina mai Shupikai vakamira .
Mai vake vainge vakagara pasi
vakatendekwa pahuma, Jeka na Dapi
vakamira nechekumusuwu sezvo
zvaitikira mumba. Anoona Jeka
achimuregedzera tsvimbo mugotsi
ndokuwira pasi. Munzeve dzake nguva
iyi akanzwa inzwi ramai vake richiti.

'Chebamba mwanangu ndaurawa na
Jeka ndaenda kuna baba vako nyika
dzimu'. Inzwi iri richingonyarara akabva
ati pepu wanei zuva ratobuda .

'Zvinoreva kuti Jeka na Dapi ndivo
vandiuyisa kuno handiti? Asi mai vangu
vatourawa chete asi ndopika na
Mucharipa baba vangu izvi zvaita Jeka

kuzvisikira moto muziso' . Anotaura ega
misodzi yake inobva yati mokoto
nematama anoyedza zvekare
kusumuka asi zvakakona n'anga
murapwi achida.

Zvainge zvoremera kumusoro
setsvimbo. Zuva rikati harina anomisa
dzakasvika nhambo dzekukamwa
kwemukaka Chebamba akangogara
achiteerera marwadzo. Anotora pfumo
rake ndokurimisa nekumagadziko kwaro
anogwadama ndokutanga kusimuka
akabaira pfumo pasi dzamara amira.
Anotanga kufamba achiinda
nemabvazuva, aifamba achikweva
makumbo nzara ndiyo yainge yobvunza
mutupo. Uye chainge chava kumunetsa

ainge asingazivi kuti kumuzinda ndekupi
sezvo divi iri haana kumbobvira
asvika, Anomira ndokutenderera
achitarisa mativi ose asi haana
kwaakaona akaziva nekuti paakabva
kumuzinda aiva akafenda kana kuti kufa
hazvina anoziva kunze kwevadzimu
vake badzi. Anosiya divi remabvazuva
ndokunanga chamhembe kwakadziva
mabvazuva. Ko aigozivei kuti kumuzinda
kumavirira?. Dai kuri kuti mvura isina
kunaya aiona matsimba aDapi na
Madzore zvimwe aizivawo kwekunanga.
Anosvika pane rumwe rwizi asi anoona
musina mvura yakawanda anofukura
mufuku ndokubva atanga kumwa
mvura. Nguva iyi anobva anzwa mhere

munerimwe sango raiva mberi kwake.
Anosimuka nekuchimbida ndiye dzi-i
meso ake achibva amapotsera kwabva
mhere iya.

"Yowe yowe yowe"ndiye zi-i.
Anokwakukira munhokwe dzaiva
mujinga merwizi urwu Ndiye gwadagwa
pasi . Anokambaira achikwidza nerwizi.
Asi zvaaida aida kuona kuti munhu ari
kuchema uyu akabatwa here kana kuti
panechikara. Anoti achangopinda paiva
netsanga ndokukwira padombo raivapo
anopotsera meso ake kuya paakati
dadamire akabva asvedza ndokuwira
pasi.

Kunaya kwakatanga kuitamvura
mumuzinda. mambo vakabva vati pepu

ndokubva vagara pasi vakazembera
madziro esasa. Asi vairatidza kuti pane
chiri kuvanetsa.

"VaRusanzu, vaRusanzu hei ma
Mucharipa" vanotaura mambo
vachizunungusa mukadzi wavo.

"Shewe ! Kwakanaka here changamire
wangu" vanotaura vachiratidza kuti
vakabatwa nehope.

"Ido mukai iyezvi nekuchimbida
ndikupandire hope dzangu ndashaya
hope usaona kugara kudai zvichitiwo
nemvura iri kunaya iyi" vanotaura
mambo Chirambadare.

VaRusanzu vakabva vamuka asi
vairatidza kuti vanohope.

"Torai mvura iri muchainga icho mugeze kumeso mobatidza tsvatsva" vanotaura mambo. VaRusanzu vakabva vaita zvainge zvarehwa namambo ndokubatidza tsvatsva mumba ndokubva majeka.

Mambo vanotora nhekwe yavo yefodya kumutsago ndokubva vaigugudzira paruoko, vanotsunya neruoko vachiisa mumhino. Vachipedza ndokugumha maoko avo meso ainge atsvuka zvino ndokutarisa vaRusanzu.

"Mukadzi wangu. Ndarota Chebamba ari pakati pesango asi paita nyoka rovambira dzanga dziri shanu. Arwisana nadzo zvino imwe chete yacho yafa. Handina kuzoona kuti Chebamba

afamba sei . Ndazoona mai vake
vamonerwa nenyoka mbiri vachirumwa ,
dzimwe mbiri dzacho dzabva dzatanga
kuuya kwandiri saka ndazoti pepu
dzisati dzasvika" vanotaura mambo
vachibva vatsikitsira .

"Changamire wangu mukati haasi
muvengi iyeye here? Hope dzenyu
dzandiomesa mate" vanotaura
vaRusanzu.

"Ndoona sekudero mai mwana , nekuti
pasi peguvhu rangu pari kupfura uye
richiita kukweveka kweveka
zvinondiudza kuti rufu rwehama yangu.
Ko iye Chebamba wandakati avate
andiona akazouya here" vanotaura
mambo.

"Agere kuuya uyu. Chenai hanzvadzi yake ariko kuimba yekubikira ndomaavata zvakawanda tofuma tichizviona asi nehope dzenyu iyi ndatya" vanotaura.

Vaviri ava vakabva vatanga kutaura dzimwe. Kunze kwakasvika pakuyedza vakagara vachitaura. VaRusanzu vakazobuda voinda kunovesa moto. Vaida kudziisa mvura yekuti mambo vageze kumeso. Vanopinda muimba yekubikira ndokuwana Chenai achakavata.

"Kwayedza muzukuru wangu muka. Inda unoona kuti mai vako vachakavata here vauye kuno inzwa vamwe vamuka , muka Chenai. Wava kubva ikoko woinda

kugota kwa Mukoma vako Chebamba
woti auye ateme teme musoro wemhara
yaakasiya yakadero iyi uye woti mambo
vari kumuda tanga kuinda nekuna mai
vako" vanotaura vachiworera madota.

"Zvakanakai mbuya" anotaura Chenai
achiwarura daunha rake ndokuturika
pahoko yaiva yakaroverwa kumadziro.

Achipedza anobuda achimanya
ndokunanga kuimba kwamai vake.

Anosviko vhura goni iro raiva risina
kusungwa , zvose izvi zvaiva mumaziso
aJeka uyo aifamba achiinda kudare
kwaiva nana Dapi nemamwe machinda
amambo asi Chiundura ainge asati
asvika padare.

"Mhai mhai murimo here mumba umu

muri kudiwa nambuya" Chenai anotaura
achidevedzera mai vake asi haana
kudavirwa. Anoshevedza katatu
ndopaakavhura gonhu ndiye dhumha
dhumha nemashura mumeso ake .
Anoona mai vake vakaremba
vakasungwa musoro netambo vari
pakati peimba. Chenai anofamba
achiinda paiva namai vake . Ko aiziveiko
kuti ndiko kufa mai vatova chando.
Anoona vakabudisa maziso nerurimi
zvaityisa akabuda ari museve
achikwamatata akananga kumba
kwambuya vake Jeka rinoseka riri
padare pamwe na Dapi nekuti ndivo
vaiziva kuti chii chaonekwa na Chenai .
Chenai akasviko rova gonhi rambuya

ndokubva awira pamakumbo pambuya vake.

"Chii muzukuru wangu asi mai vako vakurova kanhi?" . Vanobvunza.

"Indai munooni zvakaite mai mbuya, vakaremba mumba" anotaure misodzi yekutambudzika ichiti mokoto nematama.

KEPERA KWECHITSAUKO 12

CHITSAUKO 13

VaRusanzu vanokahadzika zvikuru hana yavo ndokutanga kukindidza sengoma yepandari.

"Vakaita sei mai vacho? Asi varohwa vakazvimba kumeso here Chennai" vanobvunza vaRusanzu vachibva vati nyamwi pavainge vagere nekuchimbida. Vanobuda musasa Chennai asina

kuvapindura , vanobereka maoko avo
kumusana ndokukotamira mudonzvo
uri kune rumwe ruoko havo votekaira
vakananga kusasa kwamai Chebamba
Chenai ari kumashure. Vachisvika
vanokwira pachikumbaridzo ndokubaya
gonhi nemudonzvo wavo kuti rivhurike.
Richingoti bheu , heano mashura
akagochewa nyoka kusumha mhapa.

"Yowe yowe huyai mundionerewo shura
pamusha uno" vanokwamatata
vachiwira mumba mukati. Chenai
ndokubvumirawo mhere akamira
pamusiwo. Mukadzi wa Chiundura
aitoinda kumvura aipfuura nepamba
apa. Paakanzwa mhere iyi anotsveta
chirongo pasi ndokumanya achipinda

mumba umu. Anoona mai Chebamba vakarezuka , zvakavaomesa mate mumukanwa. Vanobuda ndokumanya kudare kwaiva nemachinda ose. Nguva iyi Jeka ainge asumuka achiinda kusasa kwamambo kunovakwazisa.

"Pamusoroi machinda amambo, shoko riri pano herino, mai Chebamba vakazvisungirira musasa mavo , kutaura kuno changova chando" vanotaura mai Chiundura. Dapi na Chiundura nemamwe machinda mashanu vanosimuka ndokumanya vachiinda kuya vanosvikoona chiri chokwadi.

"Zvava kuda kuti tiudze mambo ini ndaita mutete pazviri. Chisarai muno ndiri kuuya ndava kunopira mambo uye

ndiko kuna Jeka murume wacho"
anotaura Dapi chiso chake chichinge
chemunhu ari kurwadziwa. Asi aiziva
hake kuti ndivo vakaita mabasa aya.

Dapi anomanya kusasa kwamambo,
anosvikowana mambo vakagara na
Jeka vachikurukura zvavo kunge
vanowirirana asi Jeka aiita zino irema.
Mambo waitoti jinda ravo Jeka vari
pamwe chete. Dai moyo yaitariswa
zvaifungwa handifungi kuti mambo
vangadai varitsika nditsikewo na Jeka
nyoka inoruma chaisingadyi.

Dapi anosvika achizviwisira pasi kunge
acharovera pachigaro chamambo.

"Zvadiizve Dapi unouya uchimanya kudai
asi kwaita muvengi kani ndimutumbure
asati apinda muno mudunhu" anotaura
Jeka achisumuka pachigaro chaanga
akagara ndokumhidzura pfumo rake
raanga akasendamidza mumadziro.
Anosvetuka achiinda kumusiwo achida
kuona kuti chii chaitora zvimbo sezvo
vanhu vainge voita mhere mhere
kuchema mai Chebamba.

"Kwete changamire wangu hakuna
muvengi. Asi maputsika, mukadzi wenyu
mai Chebamba vafugaravo vega
kutura kuno vanhu vatoungama
pamusha penyu nhere yamuri kunzwa
kuungudzwa iri pamusiwo wekwenyu"
Anotaura Dapi achibva agara pasi

zvakanaka asi ainge achizembera sasa.

"Uri kuti chiiko Dapi! Kupinda kwangu mudunhu rino ndiko kwaita kuti mukadzi wangu afe here, uri kurevesa here kanakuti ndezvemugotsi matsuro, unoreva wangu mukadzi here kana kuti mukadzi wamambo vaRusanzu"

anotaura Jeka achifamba kudzoka pana Dapi akawetsura maziso kunge nyimo yakasvuurwa akaita kukotamira kunge munhu ari kunyangira nyoka yapinda pasi peguyo .

"Changamire wangu , zvimwe ndaposha masvikiro kwamuri asi mondiregererawo kana zvanga zvichifanirwa kufamba nemuronga. Asi ini ndiri kureva mukadzi wenyu mai

Chebamba vakazvisungirira muimba
yekubikira vatoonekwa iyezvi nechana
chavo Chenai" anotaura Dapi chiso
chake chakati una una kusuruvara .

"Vadzimu mandifuratirireiko kudero?
Vadzimu vadzi-----" Jeka anotadza
kupedza kutaura mashoko ake akabva
azvidonhedzera pamusiwo
ndokuchinjika pachikumbaridzo
cheimba yehumambo. Aida kuti vanhu
vaone searikurwadziwa nekufa
kwemukadzi wake asi iye hake achiziva
kuti ndiye akauraya kwaiva kuda kubata
vanhu kumeso. Dapi anosumuka
ndokunobata Jeka uyo aiungudza
akavata pasi musoro wake uchinge guyo,
aiita sembongoro iri kuumburuka

padurunhuru . Vanhu vainge vatoungana vachiona Jeka, ko chaiva chisionekw mudzi webwe kuvanhu. Mambo vainge vanyerere zvavo vakagara pachigaro chavo meso avo aisabwaira vakaringa panzvimbo imwe, havana shoko ravakataura kunze kwekutura befu. Dapi anosumudza Jeka ndokubva atarisa kwaiva neruzhinji.

"Madzore, Madzore iwe huya tibatirane changamire tiinde navo vanoona shura ramedza mukadzi wavo" anotaura Dapi. Madzore anomanya ndokubva asvikobatsirana kusimudzira Jeka ndokuinda naye kuimba yamai Chebamba. Vanosvikomira pamusiwo Jeka ndokutarisa chitunha chaiva

chakarezuka ndikubva ati,

"Mai Chebamba kundisiya here
uchitevera Mucharipa kunyika dzimu.
Chokwadi here mukadzi wangu wainda
ndichakuda panyika ino, wandibaya
panyama nhete mai Chebamba
kundicheka nerakagomara here hi-i hi-i a
-ah ndarwadziwa ini Dapi" anotaura
Jeka achibva adzadzarika kunge anoda
kudonha asi Dapi na Madzore vaininge
vakamubata kwazvo. Asi chaishamisa
hapana musodzi waibuda pana Jeka.

Chiundura ainge akamira achiona zvose
izvi asi akaona kuti uku ndiko kutungana
kwembudzi. Anoringa mativi ose
kutsvaka Chebamba sezvo ainge anzwa
kuti Chebamba akauya zuro asi

zvakanunetsa kuti sei asina kuuya
kumba kwake kumukwazisa
sezvaaisiita mazuva ise. Hana yake
inomurambira. Nguva iyi mambo
vakabva vasvika nemajengeta mambo
avo akavatungamirira kuti vaonewo
shura iri. VaRusanzu vainge vakagara
zvavo musasa imomu asi matama avo
aiva akanyorova uye simba rainge rapwa.
Mambo vakasvikomirawo pamusuwo
ndokukanda meso avo mukati
vanopedza nguva vakatarisa chitunha
ichi. Asi semunhu mukuru vakaona kuti
kuzvisungirira uku kwaita mai
Chebamba hakusiko kunoitwa nemunhu
azvisungirira? Painge pasina chishwe.
Tambo yacho yaiva yakaitwa kusungwa

chaiko kwakuiswa fundo,mambo
ndokubva vati.

"Pamusoroi machinda angu .Kuti
ndaresva kuona here? Ndaona kuti
marwadziwa asi ini ndarwadziwavo
nekuti mukadzi uyu akazvara munhu
achava mambo wedunhu rino anova
Chebamba. Asi ini ndiri kuringa tambo
yakasunga muroora wangu uyu
muhuro. Haana kuita zvekuzvisungirira
asi aita kusungirirwa padanda iri
Chiundura idouya pano newe Dapi newe
Gunanga. Tarirai pane chishwe here
apo?" Vanotaura mambo vachitendeka
tambo iya netsvimbo yavo.

Nguva iyi Jeka anopukuta meso ake
akabata tsvimbo yake

yekwaGonamavende. Anoswederera
pedyo achiita sembudzi yaona shato
yavakunakirwa nemavara ayo.

"Pindai mutarise machinda ini simba
handichina asi ndoona sekuti mambo
vangu vaona chaizvo izvi zvaitwa
nemunhu badzi. Mukadzi wangu
haagumirwi kusvika pakuzvisungirira!
Tarisa Dapi tione?" Anotaura Jeka.
Dapi anopinda musasa umu ndokubva
asvika pachitunha. Iye akaziva kuti
takaresva kusunga sezvo vainge
vomanya manya nezuro.

"Ichokwadi chamareva changamire izvi
zvakaitswa nemunhu nekuti hapana
chishwe . Mai Chebamba vakaita
zvekusungirirwa chaiko" anotaura Dapi

achibata tambo iya achiita
kuizunungusa kuzunza. Zvakaita kuti
zimbe riya rakabairwa kumashure
kwamai Chebamba na Jeka kuti ropa
risabuda rivhomoke richibva rawira pasi,
nguva iyi ropa rakagwamba
rakavhengana nerisina zvakabva zvati
dzatu ndiye pasi waya rimwe richizara
patsoka dza Dapi". Vanhu
vanovhunduka nazvo. Jeka
anovhomora meso ake ndokuswedera
akaita kuchwatira rimwe ziso.

"Ririkubuda pai ropa iri vadzikisei ipapo
mubude navo pano panze tione kuti
chii?" anotaura Jeka. Chitunha
chakabva chadziwa pasi ndokubudiwa
nacho pasi. Jeka anosumudza

nhahwamaringa ndokuona achibva
aringa chitunha painge pabva ropa
chakaradzikwa pasi. Anodzungudza
musoro ndokuti. "Mambo wangu
mukadzi wangu akaitwa zvekubaiwa
nepfumo nekumashure ndokusungirirwa
nemuvengi ndanyadzwa ini changamire,
iri zimbe rakanga rakavhara ropa rabuda
iri" anotaura Jeka. Nguva iyi mai
Shupikai vakabva vashevedza kuti.

"Pamusoroi pamusoroi mumhu wese
munganetsekana henyu kutsvaka tsono
mujecha asi ini nezuro ndakaona
Chebamba ari musasa umu
akasumudza bakatwa mudenga pamwe
nepfumo kana muchiti ndonyepa
bvunzai Chenai uyu akadzingwa mumba

macho saka ndoona sekuti akaita izvi
ndiChebamba akatiza. Tarisai haapo
aripi?" vanotaura mai Shupikai.

Munhu wese akabva ati 'Ha-aa ha-aa'
akaita mahon'era muzinda wese. Munhu
wese akabva agadzikwa pasi chitunha
chiripakati pevanhu chainge chaputirwa
nedehwe remhara.

Jeka akabva anonga pfumo rake
ndokubva afamba achiinda kwaiva
nevakadzi ndokumira diti richinge
rechidhiidhii chiri pahundi. "Chenai
mwanangu sumuka" anotaura Jeka
.Chenai akabva asimuka ndokufamba
achiinda kuna Jeka."Chebamba
wakamuona here zuro, uye taura zvose
zvaunoziva" anobvunza Jeka neinzwi

gobvu . "Ehe ndakamuona akauya
nemhara. Ndokubva anoiisa kumba
kwambuya ndipo paakazouya kumba
kwataiva namhamha. Akawana mai
Shupikai varipowo ndokubva abudisa
bakatwa rake isu takabva tanzi budai
mumba. Ndopandakainda kwambuya
paya pandakakuonai baba muchisvika,
ini ndakazovata kwambuya mukoma
Chebamba handina kuzovaona"
anotaura Chenai ndokubva agara pasi.
"Chirimumusaka saka chazvinzwira. Ini
ndakasvika pano ndikabva ndanovata
kusasa kwamai Shupikai mukadzi
wangu mukuru semurawo sezvo ndaiva
ndakaneta saka zvinoreva kuti
Chebamba ndiye akauraya mai vake? Ha

-a zvimwe anenge ane n'anga
yakamutuma kuita izvi achibva atiza.
Saka arikupiko Chebamba nhasi
ndinouraya munhu kuuraya mukadzi
wangu here chero vari mai vake ndopika
na Shupikai chete uyu uyu uyu o-oh
pfumo iri richamutonga, regai .
Chiramba dare huripa nepfumo"
anotaura Jeka achirovera pfumo pasi
ndokubva azvikandira pasi. Musi uyu
vanhu vakanzwa nekubata Jeka pamwe
nekumudira mvura achifenda nhema
hake. Akabva asimuka ndokuti,

"Chiundura handikuchenesi pachiitiko
ichi maitiro ako urimowo mukati"
anotaura Jeka. "Changamire wangu ini
maoko angu akarurama semukaka

unoraramisa rusvava. VaMajakanye
variko uko togona kuindako
tonovhunzira kuti akaita izvi ndiyani
tonzwa chokwadi , tosiya chitunha
chiripo apa kana ndirini bvamondipisa
pamwe chete na mai Chebamba ava .
Asi zvimwe mavakutozorawo
Chebamba mafuta enguruve yaasina
kudya. Handioni zvichiita kuti Chebamba
angauraya mai vake nemadiro aaivaita
ndarambirana newe Jeka ndasumudza
maoko mudenga. Kwangova kutsvaka
kwewashaya kusvika pakutsvaka uta
nemugate" anotaura Chiundura akabata
imwe tsvimbo yaiva nemusoro
wakakura kunge wetsoko . Tsvimbo iyi
yairatidza kuti ichangovezewa.

Ayiitambisa tambisa mumaoko ake
meso ake aisabhwaira bodo.

Chaionekwa paari kufemedzereka
achitura befu. "Iwewe sei uchida kuinda
kun'anga yaunoda , kokana makaipa
huku dzenyu igoshopera nhema . Ini
ndine yandinoziva yandakanzwa kana
muchida kufamba toinda ikoko asi kana
ukangobatwa iwewe na Chebamba
badzi panotsva badza mupini uchisara"
anotaura Jeka asi akaona kuti
Chiundura chiso chake uye kuita kwake
hacusiko kwemazuva ose akaona
achiundurwa nehwandamwakwakwa
tsvimbo yenduni yairezurwa muruoko
naiye Chiundura.

"Aikakazve maisakwadzo nyemba

kutsva dzarungwa . Ini kupa n'anga
huku ndinorwara here nhai Jeka, kana
iwe uchida kuziva chokwadi ngatifambe
tobuda nemabvazuva edunhu, makwati
kana mombe dzinodiwa ikoko ndini
ndinobvisa" anotaura Chiundura.

"Ngatimbochengeta mukadzi wangu
tichipedza izvi toona kuti todii , nekuti
mashoko akawanda handina . Ndasara
ndiri pachena seinda iri mubaravara,
mambo ndosiira zvose kwamuri"
anotaura Jeka semunhu
kwaye."Sekuziva kwenyu, mai ava
havasi veimba yehushe saka zviripo
tofanirwa kuvapisa. Asi tose tichaindako
tonovapisa tichipedza toita chikaranga
chedu tapedza todzoka saka handei

hedu vamwe sumudzai chitunha ichi"
vanotaura mambo . Chinosumudzwa
ndokuindwa nacho kujinga kwedunhu
uko kwaipisirwa zvitunha. Unoveswa
moto kuita mabviravira. Ndokubva mai
Chebamba vatsvetwa mumoto . Nguva
iyi munhu wese ainge akanyarara
akakotamisa uso hwake dzamara ava
madota. Chiundura anopiwa pfodya
yebute ndokubva amwaya fodya pasi.
achipedza akabva ati. "Munhu wese uri
ipapo usafurukuta yasvika nguva yekuti
tirangarire mai ava saka toita
kwekanguva tozofamba kudzoka
kumuzinda" anotaura Chiundura .
Panoita runyararo kwekanguva
vachipedza ndokuchinanga kumuzinda.

Mumwe nomumwe akananga kumana kwake asi varume vakananga padare vose namambo. "Nhasi namangwana hapana basa rinoitwa muno, uye tenge tichimirira kuuya kwa Chebamba ozotiudza kuti chii chakatora nzvimbo. Asi kana asina kuuya toita zvimwe" vanotaura mambo. Vanhu vose ndokubvumirana nemashoko amambo. Asi mazuva maviri akasvika pakusvika ndokupfuura Chebamba asina kuuya . Izvi, zvakomesa vanhu mate mumukanwa uye munhu wese akaziva kuti Chebamba ndiye akauraya mai vake akatiza.

KUPERA KECHITSAUKO 13

CHITSAUKO 14

Kudonha kwakaita Chebamba
akazvikorovera padombo nedivi
regadziko achibva agomera kamwe
chete akarumanisa muromo.

Kufa kwemurume hubuda ura,
anotaurira mumoyo make achibva
asumuka . Anofamba akakotamira
achibuda murwizi urwu, zvekumwa

mvura akabva azvirega sezvo chinonzi
mira udye isadza asi rufu unotiza.

Anovanda nemiti neso ake akati bhe-e
achimamanyisa seechivangu chaona
nhiyo . Anosvika pagwenzi remuroro
raiva rakapfumvutira ndiye tonono itapo.
Anovhomora museve mumwe chete
mudati achibva awupfekera pauta,
Nguva iyi anobva anzwa kuti, "Aa-a a-a i-i
i-i" kwaiva kugomera asi inzwi iri raiva
remumhu kadzi. Zvaiitika seri kwemiti
yaiva mberi kwake airatidza kuti pane
achaari kurwisana nacho. Anofamba
achinyahwaira sekatsi yaona gonzo.

"Chauya chauya chinoona ini,
makunguwo akatya akaga mangani?"
anotaura Chebamba chiso chake chaiye

chohuta, zviya zvekuti gumbo riri
kurwadza akanga asingachazvinzwi
panguva iyi, semunhu aiva asingazive
kuti aripi mumwe moyo waiti pamwe
munhu wekumuzinda kwake. Achingoti
pota seri kwemuti wemukwesha meno
akabva aita mahwekwe nemusikana
ainge akarezuka segozha yakabatwa
nemudzito weurimbo, ari padhibhura
rainge rakamubata makumbo ake.
Chebamba akabva aziva kuti mhere
yaanga anzwa iya ndeye musikana uyu.
Anofamba achiinda paiva nemusikana
uya ndokubva amira vakatarisana.

"Ndiwe ani iwe unonditeya nedhibhura
unoti ndiri muka here ini? Washaiwa
here kwekuteyera dhibhura rako? Mhuka

dhapera here?". Anotaura musikana uya akarezuka akatarisa Chebamba asi airatidza kurwadziwan, uye Musikana uyu airatidza kuti aneukasha sehwe rovambira. Chebamba haana shoko raakadavira asi akaramba akangatarisa musikana uyu kwekanguva. Musikana uya akabva afinyamisa chiso chake ndikupfira Chebamba kumeso chaiko nemate. Chebamba anobvisa mate aya neruoko ndokubva atenderera pasi pemuti uyu. Ndokubva anonga museve mumwe chete wemusikana uyu sezvo paakabatwa nedhibhura iri miseve yose yakawira pasi akasara akabereka dati badzi risina chinhu. Anounan'anidza asi haana kuuziva kuti ndewekumuzinda

kupi. Anoudzoserwa pasi ndokutarisa
musikana uya. Anooni chiso
chemusikana uyu chakafinyamiswa
senyati yatorerwa mwana wayo
neshumba. Chebamba anovhomora
bakatwa rake muhudyu ndokubva
aripotsera patambo yainge yakasunga
musikana uyu, rakainda richirira uye
richiti vaku vaku kupeyanya.

Bakatwa iri rakasvikocheka kamwe
chete tambo yedhimbura ichibva yati
dambu. Anogamha musikana uya kuti
asadonha nemusoro bakatwa rake
rakabva ranowira kwakadero uko.

Anotsveta musikana uyu pasi ndokubva
afamba achiinda kunononga bakatwa
rake kwaranga rawira. Musikana uya

achiona asiiwa pasi, akabva avhomora
bakatwa rake raiva muhudyu
ndokudambura tambo mumakumbo ake
anosumuka ndokudzosera bakatwa rake
kuhudyu. Anononga pfumo raiva pasi
pane miseve yake ndokutarisa kwaiva
na Chebamba uyo ainge akakotama
achinonga bakatwa rake. Musikana uya
anomanya achiinda kwaiva na
Chebamba akasumudza pfumo
mudenge . Aida kuita rekumurova naro
zvine simba pamwe nekubaya. Asi
haana kuziva kuti anyangira yaona.
Chebamba anononga bakatwa rake
ndokubva akwakukira kurutivu rwerudyi
ndiye pfumo rake vhomo muchiuno
paiva netsimbo yake ndokudzosera

bakatwa pakare.

'Kurera imbwa nemukaka inofuma
yokuruma chokwadi, ini mukukanwa
mamupere maanga ari iyezvi oda
kundiuraya seizve?" Anotaura ega
nechemumoyo achibata pfumo rake
zvakasimba. Vanomirisana
semachongwe arikurwira mhambo.
Chitaurirwa hunyimwa mbare
dzekumusana. Musikana uya anozeyesa
pfumo rake kaviri achibva ariregedzera
kuna Chebamba. Chebamba anoti pasi
hwatata ndokuumburuka kamwe chete
ndiye dzi-i akatarisa musikana uya .
Musikana uyu achiona izvi
anosvetukiravo pfumo rake rainge
ranzvengwa na Chebamba rikanonyura

muvhu ndiye dzi-i arivhomora.
Vanosongana pakati nguva imwe chete,
mapfumo avo anoravana moto
uchioneka kuvaruka uchibva
pamapfumo aya. Airira zvayiita
maungira munerimwe gomo raiva
pajinga pavo. Dai shiri dzaitaura
dzingadai dzakakuudzai chemusi uyu ,
panosongana mikono hapameri uswa ,
nekuti hwese hwaiva apa wakadzurika.
Musikana uyu aiita semurume kurwa
kwake. Chebamba zvakamunetsa kuti
musikana uyu abvepi uye sei achigona
kurwa , akadzidziswa nani zvaiva zvitsva
kwaari. Chebamba anozheyesa pfumo
rake paanoriti hero kune musikana uyu
rakasvikorovera pahwiriko yepfumo

remusikana uyu . Vose tsinga dzainge
dzati tare tare muvuri wese semidzi
yembambaira. Musikana anoona painge
pakasungwa Chebamba pagumbo riya.
Anoita seanoda kuregedza pfumo kuna
Chebamba. Chebamba paakada kuti
avhike akabva atsikwa ronda rake
anosvetuka mudenga achishinyira
semutakura uri muhari. Misodzi yake
inobva yati nematama mokoto sezvo
ainge arwadziwa.

"Iwe kunditeerea dhibhura kuda kundiita
nyama yemagora , zvino wateya nzou
neriva uri kuinda nyikadzimu nhasi
mutumbi wako unodyiwa nemakava"
anotaura Musikana uya nguva iyi
Chebamba ainge awira kwakadero

ndokusimuka achiita kukamhinha.
Nguva iyi shungu dzake dzaiva
dzamuzara muviri wese ainge oita
kubvunda serutsanga rwurimumvura.

Chebamba anotarisa musikana uyu
ndokubva adzungudza musoro wake
katatu. Musikana uya anosvetuka
zvekare kuti achipedzisa Chebamba ,
ndipo paakairasa ipapa. Chebamba
anovhomora tsvimbo yake muhudyu
mayaiva achibva airegedzera musikana
uya zvinesimba, yakainda ichiita
mutinhimira sekutinhira kwemvura
yemubvumbi. Yakasviko rova pfumo
remusikana uyu hwiriko rwuchibva rwati
pwa-a nepakati, akasara akabata

chidurwa chekumagadziko. Chebamba
anopidiguka kamwe chete achinobata
gumbo remusikana uyu achibva ati pasi
dhi-i negotsi. Chebamba anosvetuka
ndokubva anogara musikana uyu
madunduru. Anotsikirira maoko
emusikana uyu ose nemabvi ake. Uye
aiita kufemedzereka sembongoro
irikukweva matanda ekupisa doro
remukwerere. Musikana uya anoyedza
kupidigura Chebamba asi zvakakona
n'anga murapwa achida. Kwaiva
kusunda gomo. Chebamba
anovhomora bakakwa rake raaiva aisa
muhudyu make. Meso ake ainge atsuka
seerovambira ravhiringwa mubako maro
nehombarume ichivhima mbira.

Anorumanidza miromo yake wepasi newekumusoro. Akaringa musikana uyo ainge oyeredza misodzi yake akatarisa Chebamba.

Chebamba anorisumudza bakatwa mudenga nemaoko ose , anoridzisa achiita ruzhwa kuti "Aa-aaaaa" bakatwa rakasvikoti svata parutivi pemusoro wemusikana uyu muvhu. Nguva iyi musikana uyu ainge atotsunzunya ava kutoona madzitateguru ake. Musikana uya anosvunura achiita zvishoma zvishoma ndokuona bakatwa ririparutivi pemusoro wake rakanyura muvhu. Chebamba anotarisa musikana uyu achihutisa miromo yake. akabva avhomora bakatwa rake ndiye sumu

pamusoro pemusikana uya ndokubaira
bakatwa rake muhudyu musikana
ndokusara akavata achifemedzeka.

Anononga pfumo rake raira rakabaira
muvhu ndokubva afuratira musikana uya
, anotanga kufamba achikamhina
gumbo rake aiita rekukweva uku
richisina ropa. Musukana uya nguva iyi
zvakatanga kumunetsa kuti munhu uyu
akaita sei? Angava muvengi wangu here?
Kuti ndiye akateya dhibhura iri here?
Kosei asina kundiuraya?" Yakava
mibvunzo isina mhinduro, musoro wake
wainge wovira semadirwa adirwa
masvusvu.

Anosimuka paanga akavata ndokubva
anonga miseve yake yose ndokuisa

mudati rake raiva kumusana. Anononga
utesvero hwepfumo chete sezvo hwiriko
rainge ravhunika. Anotora nhava yake
ndokubva aivhura anoidongorera
mukati mayo anobva anyemwerera
achimanyisa meso ake. Chebamba
akafamba nhambwe pfumbamwe chete
akananga chamhembe ndokubva amira
akabaira pfumo rake pasi
nekumagadziko kwaro gumbo ainge
akarisimudza zvaitaridza kuti
raimurwadza. Anocheka kumashure
kwake kwainge kwasara musikana uya,
vakabva vasonganidzana maziso ne
musikana uya achinyemwerera ,
anoramba akamutarisa anoona
musikana uya okochekera nhava yake

muhero. Musikana uya anobva afamba
achitevera kwaiva naChebamba.
Chebamba anotanga kufamba
achikweva gumbo rake, raiita kubaya
baya kunge ririkuchekwa chekwa mukati
nebakatwa. Anofamba nhambwe shanu
ndokubva agara pasi akazambira
dombo ndokubva atambarara gumbo
rake riya rainge richimurwadza. Misodzi
yake ichibva yatanga kubuda
yekutambudzika. Zviya zvekuti murume
haachemi unenge usingarwadziwi.
Musikana uya akabva asvika ndokubva
amira mberi kwa Chebamba uyo ainge
akabata gumbo rake akatarisa mudenga
achishinyira.

"Murume haachemi kana ari musango ,

zvoitwa nembwende izvozvo" anotaura musikana uya achibva asvuura gavi remuswati refu.

"Akakuudza izvozvo ndiyani. Saka vakadzi chete ndimi munochena bedzi here, bva-a ndimi makazvarwa mune ropa, nekuti asina ropa ndiye asingachemi", anotaura Chebamba aine shungu.

"Zvinoitwa membwende sewe, chinochemedza chii ipapa unoona sendine mukaka wekukuyamwisa here ini" anotaura musikana uya achigwadama paiva negumbo ra Chebamba. Anosunugura gavi raiva rakasungisa apa sezvo raiva raoma.

"Unoti dai usina kuchema ndaikunzwa

here , handiti ungadai wadyiwa
nezvikara padhibhura ipapa" anotaura
Chebamba. Asi musikana uyu haana
raakadavira . Achipedza kubvisa makavi
akaoma aya paakati ba-a ronda ra
Chebamba anovhunduka kuona
paronda iri pakaitwa kubvarurwa
mazino aionekwa paakapinda napo,
haana kuziva kuti imhuka rudzii , pamwe
pacho paiva pakadzika. Musikana uyu
anotarisa Chebamba uyo ayiyuwira.
Anovhuna chimuti cheMupanda
ndokubva achiisa pamuromo
paChebamba akaita chekuchinjika.

"Ruma muti uyu, usabvisa pamazino
ako" ,anotaura musikana. Chebamba
ndokubva aruma chimuti chiya.

Musikana uya anobudisa zvakaita
zvitema sepfodya yegudo munhava
make. Ndokuzvazorera paronda riya,
achipedza akabva awetera ronda riya
akabata gumbo raChebamba
zvakasimba. Chebamba anonzwi kwa
kuridza mhere akazambira dombo asi
haana kubvisa chimuti pamuromo ,
mhere yese yakaperera pachimuti ichi.
Musikana uya achipedza anosunga
ronda negavi riya raasvuura
zvakasimba dzamara apedza.

Anosumuka paanga akagwadama
ndokubva abvisa chimuti chaiva
pamuromo paChebamba. Anomubata
ruoko rwekurudyi achibva amukweva
Chebamba achibva asimuka. Musikana

uyu anoona imwe nzeve ya Chebamba
yakakwaurwa nepakati payo. Akafunga
kuti zvimwe museve kana pfumo
rakadarika napo asi haana kubvunza.
Mudumbu ma Chebamba makabva
mati gururu gururu nyoka dzemudumbu
dzainge dzochema nzara sezvo ainge
ava nemazuva maviri asina chaaisa
mudumbu, akagumira makwakwa
aakadya paakazosangana na Jeka
mugura zuva raaibva kwa Gonamavende.
Musikama uya anopinza ruoko rwake
munhava make ndokubva abudisa
katsuro kakagochewa anokatsemuka
nepakati ndokubva atambidza
Chebamba rimwe divi. Chebamba
anotora nguva asina kutambira ainge

akaringa musikana uyu ndokuzoitambira
pava paya. Nguva iyi hapana aitura
nemumwe. Chebamba anodya
semombe yabva kusina pfuro iri nzara
dzamara apedze kudya. Anodzvova
kamwe chete. Chiso chake chainge
choratidza mufaro,mvura ndiyo yainge
yasara badzi, nechemumoyo aiti
vadzimu vangu mandinzwa. 'Uku ndiko
kusasika ura pachitsiga , pano hapaiti
kumira kana kugara. Muridzi wedhibhura
iri anogona kungoerekana asvika
takarivara. Saka kubva pano apa ndiko
kwava pano mvura ndozoiona mberi
kana vadzimu vandinzwa uye zvinoreva
kuti ndarasika zvimwe dunhu rangu riri
mavirira' Chebamba anofunga izvi

akanyarara ndokubva atanga kufamba
musikana uya anobva atevera
kumashurewo. Nguva iyi zuva rainge
rotema nhongonya, nyenze dzainge
dzichivharisa nzeve dzevaviri ava sezvo
vainge vapinda nemujaru remisharu
bedzi. Chebamba anoona muti
wemuhumbangu waiva wakarurama uye
wakatetepa . Anovhomora bakatwa
muhudyu ndokubva atema muti uya,
anoinzanisa nepfumo rake. Anoriveza
nebakatwa rake achipedza, anomira
ndokubva ati. "Nditambidza utesvero
hwepfumo rako randavhuna nhambo
dziya ndaveza hwiriko rako iri chasara
kuribvura bedzi asi uyu muti hauna
zvaunouyita" anotaura Chebamba.

Musikana uya akabva atambidza
Chebamba utesvero huya. Chebamba
anotambira ndokutanga kusungirira
dzamara apedza. Mberi kwavo kwaiva
nemukonde. Anozeyesa pfumo riya
raagadzira katatu achibva asvetuka
kuinda mudenga ndokuregedza pfumo
riya zvakasimba rinobuda muruoko
richishinyira semvura yehore rakananga
pamukonde uya rakasvikoti piti piti
pahunde yemukonde uyu. Wakabva
wazungunuka kaviri uchibva wawira pasi
sezvo pfumo iri rakaita kubudira seri
.Chebamba anotarisa musikana .
Ndokubva anononga pfumo, anodzoka
naro ndokutambidza musikana . Asi
musikana uyu anotora nguva asina

kuritambira pfumo misodzi yake
yakabva yatanga kuyerera nematama
ake. Chebamba zvinomunetsa kuti chii
asi akangoti nechemumoyo
chakafukidza dzimba matenga, kana
mota racho roda kusviniwa toona
nekubuda kwemuromo. "Ndiwe wanga
uchitaura zvehumbwende handiti
unoona kuti ndiwe watova mbwende
yacho here tambira pfumo iri. , Inzwa
musikama ini ndinonzi Chebamba.
Koiwe unonzani imbosiya zvekuchema
unoti ini kuwanikwa musango muno
rugare here? Tarisa nzeve iyi ugotarisa
ronda rawandisunga kuda kwangu
here?" anotaura Chebamba
achitambidza musikana uyu pfumo rake.

Akabva amirira kuti ambopedza shungu dzake dzose. Anomubata ruoko asati amupindura ndokutanga kufamba dzamara vasvika mune rwumwe rwizi rwaiva nemvura yaisvika mumabvi Chebamba anomwa mvura dzamara aguta musikana uya anomwavo. Nguva iyi Chebamba ainge akamira achiona musikana achimwa mvura.

Anodzungudza musoro ndokuti nechemukoyo. Hakuna musha usina gonzo chokwadi vakuru vaininge vaona. Achipedza kumwa vakabva vakwidza nerwizi urwu vakananga mavirira .

Paakaona kuti musikana uyu agadzikana, akabva atsauka ndokunanga panemumwe muti

weMuhute (Mukute) waiva mujinga umu
waiva wakarembere nehute chiri dzaiva
kumadya husvu dzichiita machikichori.

KUPERA KWECHITSAUKO 14

CHITSAUKO 15

Chebamba nemusikana uya vanosvika
pasi peMuhute , Shiri dzaiva mumuti
umu dzakabva dzati dzvamu ndokutiza .
Chebamba anotanha hute dzaiva
dzakarembere nematavi ndokuzadza
tsimba yake . Musikana uya akasviko
gara pamusoro pedombo ndokuzambira

hunde yeMuhute uyu achibva abata
rushaya zvairatidza kuti pfungwa dzake
hadzisi panzvimbo imwe. Chebamba
anozviona asi haana zvaakataura ,
paakazadza tsimba yake akabva
afamba achiinda padombo paiva
nemusikana. Anosvikomira mberi kwake.

"Tambira hute idzi uwane matematsva
mumukanwa" anotaura Chebamba.
Musikana uya anoita kuvhunduka
achibva mundangariro dzake.

"Wati Chebamba he?, Hoo ihute waita
hasa hako" anotaura musikana uya
ndokubva atambira hute dzaiva
muruoko maChebamba. Panomboita
karunyararo, muromo bedzi iyo
yaifurukuta, mvura yaiva murwizi umu

ndiyo badzi yainzwikwa kuverera kwayo.

"Benzi bvunza rakanaka musikana ,
tingasvika kupiko tisingazivani mazita
edu? Zvinganakidza here kuswero
shevedzana tichiti iwe iwe kunge
mombe. Iri rangu zita ndakuudza paya
kuti ndinonzi Chebamba . Iwe hauna
kuzotaura rako nekuda kweshungu",
anotaura Chebamba achibva akanda
hute mumukanwa make ndokutanga
kutsenga akatarisa musikana uyu.

"Chako chinouya neronga handiti hauyite
zvebamba here? Ini ndinonzi Rujeko"
anotaura zita rake achibva anyarara.

Chebamba anogutsirira musoro wake
ndokubva ati.

"Zvinoreva kuti zvose zvajeka
zvandakatarisana nazvo kana iwe
zvawakatarisana nazvo zvajeka sezita
rako" anotaura Chebamba achibva
anyarara.

"Saka iwe uri kuinda kupi uye uchibvepi"
anobvunza musikana uya.

"Ndikakurondedzera rinonyura zuva
rikabuda riwe zvekare. asi handiregi
kukuudza" anotaura Chabamba.

"Ndiko saka ndiri pano, itumbure
ndakateerera zano pangwa uine rako"
anotaura Rujeko.

"Unoona Rujeko ini ndakafirwa na baba
ndokubva ndasara namai badzi. Asi mai
vakazoorwavo nerimwe jinda guru

remumuzunda medu. ndakabva
ndasara ndichichengetwa na mbuya na
sekuru. Zvino sekuru vangu ini
ndimambo vanova baba vakabereka
baba vangu inini. Saka nhau iripo apa
ndeyokuti ndaitsvaka munhu akauraya
baba vangu, sezvo ndakarwadziwa
nemafiro avakaita zvinondakamuwana.
Ko ndaizivei kuti ndiye nyakuroora mai
vangu. Saka murume uyu tsoro dzake
dzose ndakadzibata uye ndava nadzo.
Chashata avakuda kuuraya inini kuti
azogara umambo. Uye anoda kuuraya
mai vangu, nhau yacho haisai yanyatso
pinda munzeve dzangu kuti vakapara
mhosva yei. Asi izvezvi moyo wangu
hauna kugadzikana nyama dzangu

dzirikutaura kuti mai vangu hakuchinda ndakaona tsutsukuviri zuro chaiye.

Uchindiona kudai , ndakapona nepaburi retsono ndingadai ndakafa kuwera zuro uyo. Nekuti ndakarohwa nejinda rekuroora mai vangu iroro inonzi Jeka aibatsirwa na Dapi saka ndakabva ndafenda kana kufa handingakwanisi kutsanangura. Vachipedza kundirova vakabva vandondikanda mudziva rine makarwe dai vadzimu vasina kumira nesi ndingadai ndakafa. Saka apa ndava kudzokera kumuzinda kuti ndinoona zvakasara zvikaitika pamazuva iwawa . Nzeve iyi yaunoona ndinoono kunge ndakachekwa nebakatwa na Jeka . Gumbo iri ndakarumwa neimbwa

yen'anga ya Jeka. Saka zviri pano ini ndarasika ndakabatwa nechadzimira asi izvezvi ndiri kuona kunge gomo iro ndinoriziva nehuma yaroiro" anotaura achibva asumuka padombo paanga akagara ndokutenderera muhute uyu anodzoka kugara pasi zvekare.

Rujeka akaramba akanyarara senge pasina chaanzwa. Aidya hake hute ndokubva azoti.

"Nhau yako inorwadza kwazvo . Asi zvavakuda kutokwinya mekuti wadenha mago. Ukavata nezamo mumukanwa unoindiswa nyika dzimu. Vakuru vakati tsuro haiponi murutsva kaviri. Saka mambo varikuzviziva here zvose izvi kuti ndozvirikuitwa nejinda ravo" anotaura

Rujeko.

"Mota rinomirirwa kuti muromo utange waoneka kana wazooneka kurisvina kunenge kwana nyore., Mambo vari kutsi kwehope asi chirikuvanetsa kufa kwemachinda avo zvisina tsarukano asi zvose izvi zvirikukonzera na Jeka, pese apa ndaida kutanga ndaona umbowo kuti ndizogona kupira mambo nhau iyi" Chebamba anotaura zvose hapana chaakasiya. Asi akatozopedzisira ava kusvimha musodzi. Achipedza kutaura anobva anomwa mvura ndokugeza kumeso ndokudzoka paiva na Rujeko aida kuti shungu dzake dzipere.

"Ndine rungano rwandinoda

kukutsanangurira rwaigarotaurwa
nevamwe mbuya zvimwe nyaya yacho
yakada kufanana neyako saka teerera.
Paiva nemumwe murume ainzi Mazivei
aiva nemumadzi wake nevana
vavovaviri mukomana nemusikana. Asi
musikana ndiye aiva mukuru. Mazivei
uyu aiva mwana wamambo
Dzimbarimwe . Aiva nemunin'ina
wakewo ainzi Dzamiranemhuru . Zvino
baba vavo mambo Dzimbarimwe
pavakarwara vakasiya vapa Mazivei
umambo ndokubva vafa . Vakasiya
vapa Mazivei nyanga yechipembere
inova yakabata muzinda uyu. Zvadero
Dzamiramemhuru paakaroora
akatanga kuchiva umambo

hwemukoma wake Mazivei. Asi Mazivei akazona kuti ndozvavakuitika munin'ina apindwa nemweya wakaipa.

Dzamiranemhuru rimwe zuva akafuma asiri mumuzinda ndokuita mazuva matatu. Akainda kunevamwe mambo ndokunovaudza kuti ndakatorerwa umambo hwandakasiya ndapiwa nababa. Saka akakumbira mambo ava kuti amubatsire kutora umambo achizoripa nemhandara pamwe chete nenyanga iya yechipembere. Zvadaro Dzamiranemhuru akapiwa machinda akawanda kwazvo namambo ava .

Akasvika pamuzinda usiku munhu wese avata. Mazivei aiva mumhu airotswa chero baba vake mambo Dzimbarimwe

izvi vaizviziva . Mazivei akangoti
achitanga kuvata ndokubva arota
achinzi mwanasikana wako anoda
kutorwa nemuvengi atengeswa
nemunin'ina wako Dzamiranenhuru.
Saka ipa mwanasikana wako Nyanga
atize nayo iwe garamo chinouya
chokuwana urimo. Mazivei akabva
achera Nyanga pakati pehozi yaanovata
usiku ihwohwo ndokumutsa
mwanasikana wake anomutambidza
Nyanga iya ndokubva ayiisa munhava
yemwana wake .

"Tiza mwanangu nerimwe zuva
tichazoonana kana vadzimu vatendera
uye kana ndichirimupenyu , ukaramba
uri muno unopinda mumukanwa

meshumba nekuti urikuda kutorwa
nemuvengi woitwa mukadzi.

Babamunini vako Dzamiranemhuru
ndivo vaita izvi chiinda", vaiudza mwana
wavo vakamubata matama ndokubva
vagumhanisana huma dzavo. Musikana
uya akabva atobuda mumuzinda usiku.
Asi haana kure kwaakainda akainda
mugomo raiva pajinga pemuzinda wavo .
Muvengi haana kuitawo nguva akabva
asvika akatungamirirwa na
Dzamiranemhuru". Anombomira kutaura
achibva atarisa mudenga. Asi
Chebamba akafunga kuti zvimwe
paneshiri yauya kumhara mumuti, asi
zvaisava izvo. Rujeko akabva
asumudzira achiti. "Mwanasikana wa

Mazivei, akaona baba vake na mai vake pamwe ne hanzvanzi yake yaiva doko yaiva nemakore masere okuberekwa. Vachishungurudzwa zvakaomarara vari padare. Dzamiranemhuru akanotarisa paigara nyanga akaishaiwa akaona pakacherwa akaziva kuti vabviswa . Ndokuinda kunhanga kwemwanasikana wa Mazivei akanomushaiwa. Izvi hazvina kumufadza akabva auraya mukoma wake Mazivei pamwe nemukadzi wake . Chikomana chakabva chasungwa makumbo ndokuindwa nacho nemuvengi. Mwanasikana waMazivei akachema akasvika pakunyarara ari mugomo , Ndokubva abatirwa nehope ari mugomo imomo .

Paakazomuka zuva rainge ratogara miti
haana kuzoona kwakaindwa
nehwanzvadzi yake nemuvengi.

Paakazodzika mugomo umu
akakwanisa kunonga museve mumwe
chete wemuvengi, ndipo paakatetereka
nesango dunhu iri raiva rotongwa na
Dzamiranemhuru uyo ainge auraya
mukoma wake Mazivei . Musikana
akaona kuti kudzokera kumuzinda
kunenge kuri kuzviwisira mudziva
rinengwena ndipo pakafira sarungano".

Anotaura Rujeko achibva anyarara.
Chebamba anoramba akanyarara
akatsikitsira achibaya baya pasi
nepfumo rake.

Anosimudza musoro ndokutarisa

Rujeko anoona matama ake akanyorova nemisodzi. Chebamba anosimuka ndokubva abata Rujeko ruoko rwekurudyi.

"Chirambadare huripa nepfumo Rujeko!, Ingava hayo ngano yawataura asi yandibata kwazvo. Kureva here kuti ndiwe musikana wacho Rujeko?. Uye baba vako ndivo here vakaurawa na Dzamiranemhu?. Ndibudire pachena sezuva" anotaura Chebamba . Asi Rujeko anoramba akanyarara achichema. Anotora nhava yake ndokubva apinza ruoko mukati anobudisa nyanga yechipembere iya ndokutambidza Chebamba. Chebamba anoibata ndokuinan'anidza kumativi

kwayo kwaiva nemamvere
akaipoteredza . Anodzika padombo
paaiva ndokufamba achiinda kurwizi.
Anonochera mvura nenyanga iya
ndokudzoka paiva na Rujeka
anomumwisa mvura , yasara yacho
Chebamba akabva aimwa asi haana
kuipedza. Anotora yaiva yasara
ndokugezesa Rujeko kumeso katatu
iyewo ndokubva agezawo.

"Vadzimu vako vakakurwira ngavatiringe,
anotaura achitambidza nyanga iya
Rujeko. Anotarisa museve waiva
wakasiyana neimwe mudati raRujeko
ndokuuvhomora anounan'anidza
asihaana kuuziva . Anougura katatu
zvimiti pamwe neutesvero hwacho

ndokuzvibaira munyanga iya. Zvose izvi zvaiva mumaziso aRujeko haana chaakavhunza.

"Charachimwe hachitswanyiri inda. Ndichamira newe kusvika tawana hanzvadzi yako uye kusvika taparadza muvengi wako. Hazvingadi vanhu vakawanda kuita basa iri nekuti mbevazhinji hadzina marise. Ivo baba munini vako vakaputsa chirangano chavakagarira pasi na baba ne mukoma wavo iyeyu , izvi zvinotsamwisa vadzimu ndikosaka vakati Chirambadare huripa nepfumo hazvidi kuudzirwa. Asi chikumbiro changu kubva kwauri kana zvichiita. Ndaida kutanga ndamboinda kumuzinda kwangu ndoona kuti mai

vangu pamwe namambo vapenyu here
uye kunonzwa kuti chii chiri kuitika
mumuzinda. Asi zvose izvi ndinoda
mubatsiri anenge iwewe. Vimbaneni
Rujeko". Anotaura Chebamba
achipukuta misodzi yaRujeko pamatama
ake.

"Ndazvinzwa Chebamba asi nhamo
yemumwe hairambirwe sadza uye
ukabatsira mumwe zvake zvikaita ,
munhu wenyama anokufuratira iwe
wabuda naye muhondo
nemunatambudziko" anotaura Rujeko .
Chebamba anotora ruoko rwaRujeko
ndokubata chigunwe chekupedzisira
chidiki chacho anokochekeranisa
nechake chidokowo achibva ati,

"Rujeko ini usandifungira izvozvo
unoona zvandaita izvi ndichochivimbiso
chandakuratidza nyamwe zvitsvuke
seropa ticharwa semvumba nekuti
mukono unoonekwa nemavanga , kuti
rinzi rava svinga hunge wateza huni
hapana chinouya wakagara. Mekuti
ndipopano-----" Chebamba haana
kupedzisa mashoko ake aanga
achitaura , anoona varume vaviri
vachibva divi renyasi vachikwidza
nerwizi urwu. Anobata Rujeko ndokubva
vati sei kwedombo hwatata.

"Pane vanhu vari kuuya zvimwe vavengi
tarisa nemunyasi nemuhute uyo"
anotaura nezevezeve Chebamba
akatende kwaiva nevanhu vaaona.

"Vangani" anobvunza Rujeko
achipfekera museve wake pauta.

"Ndiri kuona vaviri badzi , hazvigoni kuti
tivarwise sezvo shure kwavo tisingazivi
kuti kune vamwe here, sumuka tiinde
munhokwe idzo. Vanenge vakarurama
pano",anotaura Chebamba ndokubva
vagwesha nemagokora pamwe nemabvi
vakasimudza tsoka mudenga. Dzamara
vavamunhokwe .

Vanhu vaya vanosvika pakuhute uya
ndokubva vatanga kudya hute
vachikurukura .

"Madzore pano panenge pakasvika
garwe chete maviri tarisa izvi
ndomafambiro aro kutara tara pasi
seizvi, ndakariona ini garwe gore riya

riya rakanaya mvura ine chimvura
mahwe ikaparadza mbeu mumunda " .

"Dapi haudaro wava kuda kundityisidzira
here. Saka ngatibve panozve togona
kudyiwa zvakaitwa Chebamba mudziva
ratakanomukanda. Akaita kudyiwa
zvose nemapfupa kana chakasara"
anotaura Madzore.

"Uyo akatonosangana namai vake
pamwe na baba vake nyikadzimu.
Chokwadi ngatibve pano tozviona mberi
Jeka anotida risati rapinda munamai
varo kumuzinda uko, ndambonzwa
achiti mangwana anoda kutuma
mumwe chete wedu haana kutaura kuti
anoda kutuma kupi, asi ati pane rwendo"
. Zvose izvi zvaiva munzeve

dzaChebamba na Rujeko, Chebamba anovira nehasha paakanzwa nezvekufa kwamai vake. Akaita seabaiwa nepfumo akada kusimuka paanga ari asi Rujeko akabva amubata zvinesimba.

"Usachimbidza kumedza kutsenga uchada. Dzikama sedziva rinonyudza" anotaura Rujeko nezevezeve.

Chebamba anoteerera zvaanga audzwa na Rujeko. Dapi na Madzore vakabva batobva paMuhute uyu ndokukwidza nerwizi. Chebamba na Rujeko vakabva vabuda munhokwe mua.

"Jeka kuuraya mai vangu here andicheka nerakagomara , vadzimu mandisekereiko ini" anougudza akatsikitsira huma yake yakatunga

dombo. Rujeko akaramba akanyarara ziso rake raiva kwaiinda vana Dapi.

"Rujeko vanhu ava ndivo vandanga ndichireva nhambo dziya saka apa vari kubva kudziva kwavakandiwisira kuda kunoono kuti ndakadyiwa here. Zvino vari kutsi kwehope ndirikutsika uswa huchimuka , Nhasi rinofanirwa kuvira tasvika kumuzinda saka isu ngatitevere shure kwavo. Jeka achataura chakatadzisa imbwa kuseka iko kunyenama ichigona" anotaura Chebamba neshungu. Anononga pfumo rake ndokubva aridza tsamwa.

"Hande Rujeko nhambo dzadyana".

Anotaura Chebamba ndokubva atevera shure kwana Dapi. Zuva rainge rorova

shaya kunze kwainge kwotonhorera.
Pavakapota gomo raiva mberi kwavo
Chebamba ndopaakazoti pembenu.
Ainge ava kuziva .

"Tasvika mudunhu mangu, unoona
gomo iro ririmberi kwedu tarisa necheku
chamhembe kwaro uone chiutsi
chirikupfungaira ndipo pamuzinda. Saka
ini ndiri kuda kuti iwe utungamire
wonopinda mumuzinda ini ndichauya.
Ndinoda kukuzora ropa muviri wese
kana wasvika uchaona zvekutaura
wavako usavanda nanga mumuzinda
badzi. Ndoda kuti utsvake mbuya vangu
vaRusanzu wovaudza kuti vaudze
mambo kuti Chebamba mupenyu, asi
iwe unoita senge wasvikirwa paunenge

wavaudza" anotaura Chebamba akamira. Anobudisa bakatwa rake ndokuzvicheka ruoko. Anotora ropa riya ndokuzorera Rujeko panhembe nekumeso pamwe nemaoko. Kana ndauya ikoko hatizivani uye zvinobva nekuti dunhu rakamira sei. Chiinda nhava yako ndisiire zvose nemiseve Jeka angatora nyanga iyi" anotaura Chebamba.

"Wongwarira zvikara zvesango kuno kwawasara ndokuona wauya ndichaita sekudero uya usandityira hako ndakakwana zvaunoona kudai" anotaura Rujeko achibva atambidza Chebamba nhava vake. Anobva afuratira anosvetuka matombo aivapo achiinda kumuzinda kwamambo Chirambadare.

Chebamba akasara akamira meso ake
akaringa Rujeko dzamara
asingachamuoni apota nemiti.

KUPERA KWECHITSAUKO 15

CHITSAUKO 16

Jeka paakaona kuti mazuva maviri
apfuura Chebamba asati adzoka.
Anonyemwerera ari musasa make
maaiva nemukadzi wake mai Shupikai.

"Mai mwana, tsoro dzangu dzese
ikozvino wangova mutserendende

semusuva une derere. Tarisa mazuva
maviri apfuura zvinoreva kuti Chebamba
akadyiwa nemakarwe
kwaakanokandirwa nemachinda angu
Dapi na Madzore" anotaura achipuruzira
matama amai Shupikai. Nguva idzi
dzaiva dzemashambadzou jongwe repiri
rainge rava nechinhambo rarira.

"Chokwadi ichocho murume wangu,
asizve kuti munyatsogutsikana kuti
Chebamba akasiya nyemba zvakadii
kuti mutume machinda enyu Dapi na
Madzore vadzokere zvekare kudziva
vanoona kuti akadyiwa here
zvechokwadi nekuti vana
vemadzimambo ava manhenda wauraya
hameno kuti munopaonawo sei

Chasura" vanotaura nemutupo mai
Shupikai vakatarisa murume wavo
sezvo tsvatsva yainge ichipfuta.

"Kuti angadero ari mupenyu here
mukadzi wangu?" anotaura Jeka.

"Hongu ndinodavira ndichidaro nekuti
munhu uyu makamukanda mudziva asi
hamuna kunyatsoona kuti aiva mupenyu
here kana kuti aiva akafa, kana kufenda
uye sezvandamboreva. Sekuziva
kwangu ini garwe haridye chebamba
charo chinouya neronga" vanotaura mai
Shupikai.

"Zano pangwa uinerakowo apa
wandivhura njere ndanga ndiri kutsi
kwehope, kuchingati hunderere badzi
ndovatuma machinda angu aya

omanyako onopedzera nyota pachitubu.
Ini ndosara ndoonesana na mambo kuti
muzukuru wavo akauraya mukadzi
wangu ndoda kuripwa , uyezve ndinoda
kuindisa Chenai kwa Gonamavende
anomuita mukadzi kana vana Dapi
vadzoka kudziva uku" anotaura Jeka.

"Mukadaro munenge magona
kuparadza mhodzi dzamai Chebamba
dzese nekuti dzingazopanduka
mangwana" vanotaura mai Shupikai.

Kunze kuchingoti hwe-e . Jeka akabva
amuka ndokuti,

"Mai Shupikai idoinda unoshevedza Dapi
auye kuno kuhozi nekuchimbida
mouya mese" anotaura Jeka
achigadzirisa shashiko nemhapa yake.

"Ehoi changamire regai ndimanye
ndoda kuzovesa moto ndibvure
kamukuyu mudyane nekamunya kenyu
kamakasiya madeko" vanotaura mai
Shupikai ndokubva vatobuda havo
kunanga kumba kwa Dapi, muyo wavo
waifara kwazvo nekuti vaininge vava
nenguva vasina kumbo kurukura naDapi .
Nenguva isipi vaininge vasvika pasasa
raDapi , vanomira pachikumbaridzo
ndokubva vagugudza kaviri.

"Ndiyani ari kundida rungwanani rwuno"
anodavira Dapi achifukura musoro
wake mudaunha. "Ndini mai Shupikai".

"Kwakanaka here mai Shupikai, honai
takachavata madii kuzondiona
kwachena" anotaura Dapi asi inzwi rake

rairatidza kutya.

"Baba mwana mukagoita kunge muri
kutya asi mune zvamakapara kani.

Budai mudaunha muinde panze
munozvinzwira" anotaura mukadzi wake
Dapi.

"Urikudiwa na Jeka iyezvi , kwanzu huya
nekuchimbida kwaita rwendo"
vanotaura mai Shupikai , izvi zvakaita
kuti moyo wake Dapi uti nyaunyau. Hana
yake yainge yobika manhanga,
chokwadi munhu kana aine mhosva
anongozvibatisawo , moyo unofunga
kuti zvimwe ndiri kuonekwa kana
kuzivikanwa. Anotaura mafemo Dapi
kunge anga akasenga svinga rehuni
ndokubva ati.

"Ndimirireipo ndipfeke tifambidzane mai Shupikai" anotaura Dapi ndokupfeka nhembe dzake nekuchimbida ndiye dhugu panze.

"Dapi anomira pachikumbaridzo ndokuona pasina ainge ofamba panze ndokuvhara gonhi . Anombundira mai Shupikai ari mumadziro eimba yake tsodi padama achibva asiya mate ipapo. Musi uyu kwaiva neuma hwainge hwakaputira dunhu rese nemakomo akapoterredza , uma uhu hwaiva hwakaita sechiutsi ndiwo mukana wakashandiswa naDapi.

"Ko ukationesa mhai Dapi, ungabva waita ushingi hweshambakodzi kugadzikwa mumavivi emoto chokwadi?

Hauoni kuti wava kuda kuzviwisira mudziva rine ngwena here?". Vanotaura mai Shupikai vachinyaririra semuramu asiiwa aina bamukuru musasa imwe.

"Ndinenge ndakusuwa mudiwa wangu. Kungoonana kamwe here semvura yehore, izvezvi kungorovera matama pasi ndotokurota iwewe badzi, ndofa nenyota makumbo ari mumvura here mudiwa wangu? Saka kwanzi toda kutumwa kupiko na Jeka" anotaura Dapi.

"Kana mukana ukaita chete toonana wopedza shungu, ndozviziva kuti paya wakazogurisirwa panzira uchiimba mahanga kutapira!, Kwanzi moda kuinda kudziva kwamakainda na Chebamba munoona kuti zvechokwadi

akadyiwa here" vanotaura mai Shupikai vakaringa Dapi.

"Ho-o saka yazvikanga yega nemafuta ayo.Chinzwaka nyeredzi yangu iwe nhasi tofanirwa kuonana nekuti kudziva uko hatisweriko , kana ndichiinda naMadzore ndichati tava kusvika kuchikomo che Madidi chiya chirimujinga mezunde ramambo, ndomuti chitungamira ndoda kuteya misungo yangu pamwe nekutema mupini wangu , iwe ndokuonera pazimukamba riya rakadii zano iri"anotaura Dapi asi apa vainge vosvika pahoji ya Jeka. Vaitomunzwa achiridza muridzo wake ari musasa.

"Ndichaita sekudaro asi imi

mochimbidzawo kuzodzoka , unozviziva
iwe kuti murume haarohwi netsimbo
imwe anoda nhatu" vanotaura mai
Shupikai. Dapi anonyemwerera asi
hapana akazotaura nemumwe dzamara
vapinde musasa maiva naJeka.

"Ndauya naye ini ndava kumbonovesa
moto Shupikai anenungo dzekumuka
mwana iyeyu" vanotaura mai Shupikai
ndokubva vatonanga kuimba yekubikira
ndokusiya vaviri ava vachitaura.

"Dapi inda unotora Madzore monanga
kudziva kuya monoona kuti Chebamba
akadyiwa here mapedza kuona
modzoka ndokudai pano nekuchimbidza
mangwana pane rwendo asi ndokuudzai
madzoka Madzore ndaiva

ndakamuudzawo zverwendo urwu asi
handina kutaura kuti nderwekuinda kupi.
Saka itai semurikuinda kunovhima
ndokudai risati ravira pano" anotaura
Jeka achibva asimuka pachigaro chake.

"Changamire wangu zvimwe ini
ndichazomboda kuteya musungo
muchikomo cheMadidi Madzore anouya
hake neshoko. Mazuvano ndanzwa
kudya nemubvunza ndadya nenyevhi
pamwe nemowadhongi saka nhomba
yandibaya changamire" anotaura Dapi,.

"Zvakanaka chiindai ini ndakumbonoona
mambo" anotaura Jeka. Vaviri ava
vakabva vaparadzana, Dapi akanotora
Madzore ndokubva vatobuda
nemabvazuva vakabereka zvombo

zvavo.

Mai Shupikai vanotsonyana na Dapi ndokubva vanyemwerera nhambo yavakabuda. Jeka anofamba achiinda kuimba yamambo yeumambo sezvo vainge vamuka, Iro zuvawo rainge rati kwirei. Jeka anoitawo mahwekwe na Chiundura uyo aitouyawo pasasa pamambo zvimwe aida kuvamutsa. Jeka anosvika ndokubva amira , Chiundura anosviko gogodza pasina ataura nemumwe.

"Haundimutsi sei Chiundura , mukuru mukuru hanga haigaribvunde kundizvidza kaikoku iwe?" Rinotaura Jeka rakafinyamisa chiso rakabata ruoko rwa Chiundura rwaigugudza .

"Gudo guru peta muswe vadiki vakutye. Nekuti ukasaupeta pwere dzinotamba nawo ukadambuka. Ini handikumutsi nekuti tagara takarimirana muganhu kokana ukandinyararira handiti ndini ndinenge ndava kuita sebenzi here, wadii kundimutsawo iwe Jeka?"

Anotaura Chiundura achibva agugudza sasa ramambo nerwumwe ruoko rwaiva netsimbo .

"Wadii kundimutsa waona kuti handidaviri here? Sei uchirutsa mashoko kudaro gava richadambura musungo chete , ndakamboti poshi haarwirwi asi apa zvanyanya wava kutambira kunonyudza" Jeka anotaura achirovera rovera pfumo rake pasi. Ndokubva

atopinda musasa mamambo.

"Mangwanani mambo wangu" anotaura
Jeka akadzikama semvura yemuguvi.
Chiundura akabva amutsawo mambo
ndokugara pasi.

"Machinda angu magona mukauya
ndanga ndichida kukutumirai shoko kuti
muuye pano ndikupirei nhau yangu.
Chiundura dzora gonhi inzwa rumhepo
rwurikufefetera inenge inoda kuturuka
nhasi mvura iyi" vanotaura mambo
vakatarisa panze . Chiundura anosimuka
ndokuvhara gonhi, achipedza anodzoka
ndokugara pachigaro pekare Jeka ainge
akamuringa neziso dzvuku.

"Kunyangwe iniwo changamire wangu ndinenhau irikundishungurudza hana yangu ini handina mufaro zvachose. Saka ndanga ndatoti mangwanani ano ndoitumbura kwamuri sezvo zuva riya takati kana mazuva maviri apfuura Chebamba asati adzoka zvoreva ku kuti zvava pachena seinda iri mubaravara kuti ane chekuita nekufa kwemukadzi wangu saka ini ndoda kuripwa uye ndoda kutomutsvaka kusvika ndamuwana ndouya naye pachita chevanhu ndomuitawo zvaakaitamukadzi wangu. Tarisai mazuva maviri apfuura hatina kuona rutsoke rwake asi imi mambo makangonyarara nezvazvo, mukadzi

wangu akafa aine pamuviri ndaitarisira
mwana komana pamimba iyoyo"
anotaura Jeka achirova rova chigaro
chake neruoko akaringa mambo.

"Zvino ukabva waita kunge ini ndisina
chandinofunga. Unoti handirwadziwiwo
here nekushaiwa muzukuru wangu pano.
Poshi Mucharipa mwana wangu
akangofa zvisina tsarukano, nhasi
ndoshaiwa Chebamba zvisina tsarukano
iye ariye mwene weushe uhu ndingafara
here nhai Jeka . Sekufunga kwako iwe
Chebamba angakwanisa kusumudza
mai vake ega ovasungirira sezviya here"
vanotaura mambo.

"Musatema makarerekera divi rimwe
chete uye kutaura zvakapfura kare

zvekufa kwa Mucharipa ngatitaurei izvi
zvakaiteka unyoro huno, ini ndakaona
sekuti uyu Chiundura wamuri
kunyenyeredza arimowo mukati
menhau iyi asi ndoziva kuti
hamungazvitendi henyu" anotaura Jeka.

"Saka iwewe nhau yako iri pakuti kudii
tizivewo uye muripo wako wacho unoda
chii? " vanotaura mambo vakanyorovera
sezvo vaida kuti ataure Jeka.

"Jeka handioni kunge dzako dzino
kweva, musoro wako unongoda hondo
badzi asi iwe hondo yacho hauyikwanisi
ndiudze kuti sei uchiti ini ndirimowo
munhau iyi? Ini ndava kuti ndiwe
wakaura mukadzi wako wava kuda
kutinakurira nyoka mhenyu ndakati

ngatifambe iwe ukabva watsikatsika
saka unoda kubatsirika sei asi kana iwe
uriwe godobori?" anotaura Chiundura
achisumuka pachigaro chake ndokubva
atarisa Jeka neziso rakasara munzara
rainge riri chiropa.

'Chiundura ava kuda kunditonga
ndirikuzviona , asi ndoverenga mazuva
mashanu ndinenge ndamuwisa uyu.
Haasi kundiziva ndonzi Jeka regai
ndimufadze nenhema' anotaura
mashoko aya Jeka mumoyo make ,
nguva iyi ainge obudisa musodzi
kunyepera kurwadziwa akatarisa
mambo. Chiundura ndiye aitambisa
tsvimbo akatarisa Jeka , paakaona Jeka

ava kuchema akabva adzoka pachigaro chake.

"Kana uchida kuti tifambe tozviita svondo rinouya. Izvezvi ndichambochema mukadzi wangu" anotaura Jeka achibva anyarara.

"Ndiro dama chairo, wava kufunga sejinda guru Jeka. Ini ndiri kubatikana kwazvo ndinoda kuziva chakamedza muzukuru wangu, tichabuda tirivatatu seizvi dunhu rosara rakabatwa na Gunanga toubata chete munzwa uri mundove uyu" vanotaura mambo Chirambadare.

Jeka akaona kuti ndikada kungwadza Chiundura handimubati zvakanaka, akaona kubvuma uku kuruko

kuchapinza Chiundura munataisireva.
"Changamire sezvo mandidzorawo uye
kutura zvandanzwa chiregai timirire
zuva randataura risvike tobva tafamba
misodzi yangu pamwe neronda nyoro
riripamoyo iri rinenge raoma . Ini simba
chairo rekuswero famba handina regai
ndifurwe menhepo ndichitenderera
dunhu rino zvimwe pfungwa
dzingagadzikana hakuna kwarabikwa
here doro Chiundura?" anotaura Jeka
achibva anyarara.

"Inda kwaDzasukwa uko ndokwariri
doro" anotaura Chiundura . Jeka akabva
asimuka ndokubva abuda . Chiundura
akambosara namambo ndokuzobudawo
oinda kunopfurisa mapadza ake

mangwana aida kunokavira nzungu
dzemukadzi wake sezvo pasi paiva
panyoro.

Mambo vakasara vega vakagara asi
hana yavo yaivarambira kuti Chebamba
akafa. Asi yaivaudza kuti pane paari
achauya , vaiziva uchenjeri
hwemuzukuru wavo kuti hwaiva
hwenyoka. Mhandara dzemumuzinda
padzakanzwa kuti Chebamba akafa
dzakaora moyo vava vairatidza kuti
vaida Chebamba vakachema
vakazvirega. Zuva parainge rorova
shaya, mai Shupikai vakabva vatobuda
mumuzinda sekurongana kwavakaita na
Dapi. Vakanyepera Jeka kuti
ndichambonotsvaka howa kune

kwandakahuona howa hwe Chihombiro
ne Bandapakukutu haana kutaura kuti
ndekupi. Jeka rakafara kwazvo
ndokubva ati indai henyu sezvo howa
aiva nerudo nahwo. Zvineiwo mai
Shupikai vakabva vatobuda
nemabvazuva ndokunanha nyasi
kuchikomo vakati vachisvika kuchikomo
cheMadidi ndokunanga kuzimukamba
kwavainge varongana. Ndokusana
kutema mashizha eMuzeze ndokubva
vimirira kusvika kwaDapi. Zvineiwo
havanawo kuzoita nguva refu vagere
Dapi akabva atosvika mugomo umu ,
Madzore aitoonekwa munyasi megomo
achiinda kumuzinda.

"Watosvika mudiwa wangu ndanga

ndichiti zvimwe ndosvika wora moyo
nekumirira" anotaura Dapi.

"Ndichangosvika ini asi tofanirwa
kuchimbidza ndanyepera Dapi kuti
ndainda kuhohwa" vanotaura mai
Shupikai vakaringa Dapi nenyemwerero.

"Aa-a chero ukainda usina unoti
ndasvika hohwa hwese hwadyiwa
nekamba , angazviramba kuti ndiye chii .
Rega titigaga nhambo dzakandidya asi
zuva richipo haro iri hauna mucheche
anoyamwa saka nguva ndeyangu"
anotaura Dapi nyemwerero ichisvika
kugitsi.

Vakatora nguva varipo pazimukamba iri.

Chebamba kuparadzana kwaakaita na
Rujeko akanokwira muchikomo ichiwo
cheMadidi asi iye akazotiwo nonoke
sezvo nhambo dzainge dzainda. Akati
achifamba mugomo umu

uti aringe kumuzinda abva akaona
makwakwa aiva pajinga pezimukamba
iri moyo wake wakati nyau nyau sezvo
ndicho chaiva chikafu chake. Anodzira
achiinda kuya , ava kunosvika akabva
amira mushure mekunzwa manzwi
aitaura mberi kwake akafunga kuti
zvimwe muvengi . Anonyahwaira
achivanda nemiti achiinda kuya
paakanoti ba-a akabva ati,

'Maiwe-e vakafa havana chavakaona
makunakuna kaaya' aitaaurira mumoyo

make akaita kukotamira akabata
muromo. Anodududza ndokunoti kwati
nemuti, akatora nguva aripo ndokuzoti
pava paya. Akazooka vaviri ava vava
kudzika gomo haana kuda kuchimbida
kumedza. Asi izvi zvakamushamisa
kwazo makwakwa aanga achida
akabva atomaguta. Mai Shupikai
ndovakazotanga kumanya kuinda
kumuzinda Dapi ndokusara achitema
mupini wake anozotiwo pava paya
ndokuchiinda kumuzinda asi
nyemwerero yaisvika kugoti. Dapi akati
achisvika pasiwo guru anoona paine
mumwe musikana waasina kuziva
akabatwa nevarindi achibvunzurudzwa ,
musikana uyu aiva Rujeko. Rujeko

paakaona Dapi akabva amuziva sezvo ainge ambomuona paMuhute uya.

"Abvepi musikana iyeyu Magarapa" anobvunza Dapi.

"Angosvikawo pano iyezvi kwaabva chaiko haana kutaura ari kuti handina kwandiri kuziva. Saka zvamauya kudai indai naye kumuzinda ndokwaachanotaura zvizere ikoko ava mudare" anotaura Magarapa.

"Iwe Magarapa mubate tiinde naye vamwe sarai muchirinda pano" anotaura Dapi ndokubva atotendeuka kunanga kumuzinda na Rujeko pamwe na Magarapa. Vakaita rombo rakanaka mambo ,Jeka na Chiundura nemamwe machinda vaiva padare ukuwo zuva

rainge ratotsvuka semazimbe emuuzhe
ari mumvuto yematembo. Rujeko
akaviko gadzikwa mudare muviri wake
wainge wakazara ropa ainge
akatsikitsira pasi.

KUPERA KWECHITSAUKO 16

CHITSAUKO 17

Kusvika kwakaita Dapi na Rujeko
pamwe na Magarapa padare, munhu
wese aiva apa akasimuka musoro
ndokupotsera meso vakaringa Rujeko.
Rujeko anogadzikwa pasi kapati padare
akaringa mambo na Jeka vavo vaiva

padyo na padyo. Dapi anofamba
achiinda panechimwe chigaro chaiva
pedyo na Madzore , ndokubva akanda
danda rake pasi raanga abva naro
kuMadidi remupini wake ndiye pasi go-
o . Jeka anoringa Rujeko ndokubva
asimuka pachigaro chake , anofamba
achiinda paiva na Rujeko
anosvikomubata chirebvu
ndokumutaridza mudenga.

"Muno mudare hamutsikitsirwi hatisi
zvikomana zvako isu ukadzosa chiso
chako pasi badzi pfumo rinonyura
pachipfuva chinenge mbudzi ichocho.
Zvose zvatichakubvunza pano unodavira
nekuchimbida! Tiri kunzwanana here
iwe?" Anotaura Jeka achizunza musoro

waRujeko akamubata vhudzi.

"Zvino mukagondibata neseri kweruoko kunge muvengi wenyu zvinobuda here? Inga vakuru vakati imbwa kuberekera pavanhu hunzi nditandirwe imbwa asi imi mava kuti dzawa nemusana" anotaure Rujeko akaringa Jeka.

"Haisi nguva yako yekuti utaure pfumbira muromo wako" anotaure Jeka achibva agara pachigaro chake.

"Mambo musikana uyu asvika pasiwo guru achiratidza kuti kwaabva kunopfungaira chiutsi, uye haana kuda kuita nharo patamubata saka tati tiuye naye pano padare pane chita chevanhu uye imi varidzi vedunhu momubvunzurudza zvinokugutsai imi"

anotaura Magarapa achiudza mambo.

"Maita zvakanaka chidzokera hako kunorinda isu tochinzwa kuti abvepi" vanotaura mambo, Magarapa akabva adzokera kusiwo kwaiva nevamwe vake.

"Mubvunzei henyu machinda angu tinzwe chifambirwa chake" vanotaura mambo.

Jeka sezvo ariye jinda guru ndiye aitobvunza akabva abatapfumo rake ndokuti.

"Sekureva kwandamboita nhambo dziya, tiudzewo kuti zita rako ndiyani? , unodei pano?, Watumwa nani uye watumwei? Iti daku daku nhambo dzadyanana tarisa zuva ravakupinda

marakapinda nezuro" anotaura Jeka achibva atarisa Dapi. Vanotsonyana zvisina ani akaona, asi Rujeko ndiye badzi akasviona.

"Changamire wangu mondiregererawo, madii kumbotanga mandiitirawo usvusvu hutete tete husinganetsi kudzaka pahuro ndiwanewo simba rekutaura. kutaura kunouku izvezvi ndiri kunzwa ura hwangu kusimuka handina chandingataura nguva ino dumbu rangu rangova gombo. Uye mubvunzo yenyu ikabva yanaya semvura handina chandanzwa panese zvamataura ndatokanganwa ini" anotaura Rujeko akarika Jeka neziso rakasara munzara .

" Iwe iwe unofa sehuku wakangwanwa

chii ipapa, nzeve dzako dzakabairwa
zvimiti here? aikakazve , Uye uri kuda
kubikirwa nani? Hapana mai vako
vanokubikira pano , wakanzwa nani kuti
pano ndipo panozinurwa vanhu? Uri
kutipedzera nguva unonzwa.

Changamire wangu nemanakiro akaita
musikana uyu hamuoni kuti taredzwa
sehove here apa zvimwe hondo yasara
munhasi merwizi ini handisi kuchenesa
musikana uyu hamenowo vamwe
zvimwe toona nekufunga zvakasiyana
tipei mafungiro enyu" anotaura Jeka .

"Jeka wataura dama uyu atumwa
nemuvengi , arikuda kutibata kumeso
badzi, akapiwa tsvimbo imwe chete
anotaura uyu" anotaura Dapi achitsinhira

mashoko aJeka. Rujeko anobva
adzungudza musoro wake akaringa Dapi.

"Handiti haasati ataura chifambirwa
chake here, zvino imi mava kumanya
mberi semudonzvo madii kuti iye
nyakuuya ataure ega saka kana imi
muchiziva bva-a mamugarisirei mudare
muno regai ataure isu totangira paasiira"
anotaura Chiundura achipikisa
zvaitaurwa naJeka pamwe na Dapi.

Iwo mabvi ako Dapi akakuzvuka kudaro
asi wanga wakagwadama muruware
kani abva acheneruka chii Dapi"
anotaura Ndoro.

Dapi anotarisa mabvi ake wanei
hazvitarisiki. Anotarisa Jeka ndokutarisa
Ndoro achibva ati,

"Ndagumburwa kwandanga ndiri uko parurware zvino ndabva ndasveedza ndokubva ndadonha nemberi ndikosaka ndakuzvuka mabvi kudai" anotaura Dapi munhu wese achibva ati bvuu kuseka .

"Chiundura haudaviri uchidaro padare. Ziva kuti kana muvengi akauya pano isu tisu tinoparadzwa iye musikana uyu anenge atiza saka tanga wafunga uye ini ndini ndiri kubvunza. Kana muchiona senge ndaresva kubvunza ndava kumuindisa nyika dzimu musikana uyu izvezvi muvengi itsori yatumwa kuongorora dunhu" anotaura Jeka achipupira furo achibva asimuka akabata pfumo, anofamba ndokunomira shure kwa Rujeko

anomusunda negumbo. Rujeko achibva awira pasi nedivi, Jeka ndokubva atsika huro yaRujeko achibva asimudza pfumo rake mudenga akaruma muromo wepasi.

"Jeka chandatadza chii ini?, Kana uchida kuuraya ibva wandiuraya hako kwete kupotsa kana kurega asi-----" anotaura Rujeko asi haana kuzopedza mashoko ake nekuda kweshungu anobva anyarara. Dapi anosumuka ndokubata Jeka.

"Musachimbidza kumedza changamire wangu regai ataure tingatsindira mwena unobuda neishwa" anotaura Dapi .

Jeka anopfinyamisa chiso akaringa munhu wese padare apa ndokubva ati.

"Handi jaidzi makudo neanokamhina ini

akangonyarara izvezvi ndiri kuregedza
pfumo ndasvoda Dapi andibata uyu
motomotenda, kwete kutaura kwako
Chiundura kunogumbura" anotaura
achirovera pfumo rake pasi ndokubva
agara pasi achibva aridza tsamwa .
Rujeko anotora nguva akavata papi
ndokuzoti pava paya kwarakwashu
ndiye go-o ndokugara.

"Zvino zvamunodai pamuti munyora
kuzoti wakaoma? Handiti munotouvesa.
Ini handina kuuya kurwa nemi asi
ndauyawo kuupoteri nekuti kwandabva
ndapona nepasaka reshumba. Asi baba
na mai kutaura kuno hakuchina
vaparadzwa namambo . Saka ndaona
zvisingachaiti kuti ndigare dunhu iroro

ndikosaka ndatetereka nenyika
dzamara ndauyawo muno chero henyu
mukandiita mushandi wamambo
ndinoda nekuti chandinoda ndepekgara
bedzi zvimwe zvose handinei nazvo.
Zita rangu ndinonzi Rujeko" anotaura
Rujeko achibva atanga kusvimha
misodzi ndokubva atsikitsira pasi
neshungu. Dare rose inobva rati zii
kunge pafiwa. Chiundura anoramba
akatarisa Rujeko ndokubva atarisa
mambo.

"Kana mwana ati auya kuzopotera
gashirai mashoko ake sezvaari nhasi
ndini mangwana ndiwe" vanotaura
mambo. Rujeko anotarisa mambo
achibva apukuta misodzi yake. Jeka

akabva asimuka ndokubva ati.

"Zvamataura ndazvinzwa mambo wangu.
Asi kunaka kwezvimwe kushata
kwezvimwe . Munhu wese anoziva kuti
ini ndakafirwa nemukadzi wangu saka
zvanaka ndava kutora Rujeko uyu oita
mukadzi wangu sezvo achida
kuchenjetwa pano uye imi mambo
murimi mamubvumira kugara pano,
Tichibva pano ndotonanga kuhozi
kwangu naye saka dare rapera iri pane
ane nyaya here? Uye mambo
mozvionawo sei zvimwe ronda rangu
ringapora vende rakashama rovharika"
anotaura Jeka.

"Zvamataura ndazvinzwa changamire
wangu ini ndinotodawo kuroorwa chero

izvezvi. Handizivi kuti
munganditenderawo here kuti nditaure
zvizere mozoita kuda kwenyu" anotaure
Rujeko. Uye mambo havana kupindura
mashoko aJeka.

"Unozotaure tava kuhozi kwedu, dzerudo
ndedzevaviri Rujeko ndoda kuzodya
howa hwangu ndabva kuhozi newe saka
kuti utaure tingapedza nhambo"
anotaure Jeka achinanzvira maromo
akaringa Rujeko . Iyewo Rujeko wacho
aiva akazvarwa chokwadi waimedza
mate asipo. chiso chake chainge
chinogezwa nemukaka. Mhino yake
yainge yakareba zviri pakati nepakati
inokwira inda ichizororera . Aiita kunge
ane manhanga maviri enhopi

kumashure kwake kana achifamba .
Mazino ake ainge akati mbu-u
semukaka uri muhwedza, kutsanangura
tingapedza nguva asi kuzvionera
pamhino sefodya.

"Zvinoda kuti nditaure ruzhinji
rwuchinzwa kuitira mangwana pashaye
anozorwa mafuta enguruve yaasina
kudya, zvozova kwauri kufuka kana
kuwarida ini ndataura" anotaura Rujeko
asi Jeka airatidza kuti anonokerwa
irowo zuva rainge rapinda munamai varo,
huku dzaininga dzavharirwa. Pwere
dzaitamba dziri pakati pechivanze
dzichiimba mvura naya naya tidye
mapotsi sezvo denga rainge rasunama
dehwe mukwindi reripa rainge roputira

denga rose.

"Iti daku daku hatiswereri nhau iyi kana yadai yaperu" anotaura Jeka achiratidza kuti akamira negumbo rimwe sejongwe.

"Idoteereresai, pamusoro mambo nedare rose. Ini kubva ndichizvarwa namai vangu runako harwuna kuchinja uye imba chaiyo ndaitoidawo asi vadzimu vakazviramba.

Ndakambofunga kuti zvimwe vadzimu vainyepa kuti hauroorwi saka ini ndakabva ndaitawo zvemusoro wangu ndokuitawo mukomana wangu, akabva avata neni akauya kunhanga kwangu usiku. Akangoti achipedza kuvata neni akabva atotanga kudaidzira achiti ura hwangu huri kudamburwa damburwa

achigomera sembudzi irikubereka.
Kwakazosara kwoyedza mukomana uyu
afuga rake ega. Ndakamboti zvimwe
agara achirwara hake mukomana uyu.
Ndakabva ndafambidzana nemumwe
zvekare ndokuvata tose akabva afa
zvekare semafiro akaita uya wekutanga.
Saka kubva ipapo ndakadanana
nevakomana vapfumbamwe vachingofa
mafiro mamwevo iwawa . Sakazvadai
takabva tafamba kuti ndikwanisewo
kuroorwa. Takainda kunemumwe
godobori anonzi Mudziwenyundo
hapana asingamuzivi madzimambo
mazhinji anomuziva. Takasvikoudzwa
zvainyevenusa moyo wangu asi
zvichirwadza zvekare. Akati kana pakafa

vanhu gumi zvinenge zvapera ndozvaida
vadzimu vangu uye ndinenge ndava
kukwanisa kuroorwavo ndiyo nyaya
yangu iyoyi. Zvinoreva kuti iwe Jeka
zvawati unondida ndiwe wechi gumi
wacho kana wakazvipira ndinoda
kuroorwa hangu togona kuinda kuhozi
kwako kwacho izvezvi" anotaura Rujeko.
Jeka akabva asimuka ndokutenderera
padare anodzoka kugara pasi haana
raakataura kunze kwekungodzungudza
musoro wake waiva nemhanza inenge
guyo redovi ndokutura mafemo.

'ilni ndinoda umambo ndikatora
musikana uyu ndinofa sezvo asi
kwasara munhu mumwe wechigumi.
Ndomirira mumwe kuti atange afa ini

ndozomutora haangatorwi ndiripo
hazviiti. Pachaita makuva mberi uko
badzi, ndikafa Chiundura anosara
achitora umambo hazvigoni chatanga
ndicho chakachenjedza' Jeka
anotaurira mumoyo izvi zvisina ani nani
ainzwa ndokubva azoti.

"Chiundura tora hako musikana uyu ini
ndanga ndakoshiwa kuti vadzimu
vakanditi ndofanirwa kuroora mukadzi
akamboita mwana kwete tsvingudzi"
anotaura Jeka.

"Asi unoda kuti ndife kani Jeka? Handina
kut ndoda mukadzi ini wangu ndinaye.
Tanha dzaunosvikira ini handina kuti
ndinomuda Rujeko uyu. Inga ati
waanodanana naye apa ndiye

wechigumi uye anofa asi anotevera
haafi saka ini ndini ndoda kufa here?"
anotaura Chiundura.

"Haa ini ndichatora hangu mukadzi
waUrahwatasva uyu ndikatora
ndotsamwisa vadzimu vanguwo"
anotaura Jeka achibva atosimuka
padare ndokunanga kusasa kwake
sezvo ainge aoma mate mumukamwa
aifamba achizunza maoko ake .

"Saka iwe musikana uchagara
kwavaRusanzu uchivabatsira basa ikoko
ndivo mukadzi wamambo . Saka iwe
Ndoro indai naRujeko uyu kuna
VaRusanzu motora nhembe dzemuno
mumuzinda momupa apfeke dzake idzo
obvisa. Zvakadii izvi mambo wangu"

anotaura Chiundura. "Ndiro dama
chairo, inzwai kwava yava kudonha
donha mati ticharamba tigere pano
padare here regai ndiinde kuchembere
yangu zvimwe yabika" vanotaura
mambo vachibva vasumuka. Ndoro
anosumudza Rujeko paanga akagara
ndokufamba achiinda naye kusasa
kwavaRusanzu kwainge wainda mambo.
Ndoro anonotora dzimwe nhembe
ndokubva apa Rujeko achibva apfeka.
"VaRusanzi uyu ndiye ava mushandi
wenyu kubva nhasi. Zvakawanda
mucharumwa nzeve namambo .
Handichamiri inzwai mvura yopurana
ndikanonoka kubva muno inondivharira
muno ndavakuinda ini" anotaura Ndoro

achibva atosimuka ndiye panze.

VaRusanzu waitopambira mvura

yesadza zuva iri vaininge vanonoka kubika.

"Mbuya hamungabiki ndiripo pano

ndosaka ndauyiswa muno pamusoro

regai ndikuchingurei ndibike"anotaura

Rujeko achiratidza kufara. Asi mambo

vakaramba vakatarisa Rujeko vanoona

kuti chiso chake chine ushingi uye kuita

kwake aneshoko raainaro . Izvi mambo

vaizviona kunyangwe vasina kutaura

nemunhu. VaRusanzu vanopa Rujeko

ndokubva atanga hake kubika dzamara

apedza akabva apakura sadza.

VaRusanzu vakazopakurawo murivo.

Nhambo yavainge votanga kudya sadza

Rujeko akabva asumuka ndokufamba

achiinda mberi kwechikuva asi haana
kusvika ndokubva adzoka anotenderera
mumba ndokubva agura musuva
wesadza anoukanda muchoto umwe
ndokubva akanda panze. Zvose izvi
zvaiva mumeso evaviri ava. Rujeko
akabva agara pasi ndokutura mafemo
achibva atarisa mambo ndokutarisa
vaRusanzu.

"Ndiri kuona mune misodzi mumatama
enyu mwese mambo wangu nemi
mbuya. Asi mhupo yangu yataura
izvozvi kuti mune muzukuru
wamunodisisa ari pamoyo penyu
mwana wemwana komana wenyu akafa
zvisina tsarukano . Zvino imi muri kuti
muzukuru wenyu akafa, ndinoda

kukuudzai kuti muzukuru wenyu
mupenyu uye zvikafamba zvakanaka
nhasi anowira mumuzinda muno usiku
huno zvakawanda achauya otaura
omene" anotaura Rujeko ndokubva
atanga kudya sadza. Mambo
vakashamisika nezvaitaura Rujeko .

"Ndozviripo chokwadi ini ndiri kuti akafa
bvatotenda yavira tsambakodzi
yedemhe, akasvika chete Chebamba
moyo wangu unenge wanyevenuka
nhasi handivati" vanotaura mambo .

VaRusanzu vakabva vasimuka
ndokudzana vachiridza kamupururu asi
meso avo aiva nemisodzi. Rujeko
akazvione asi haana raakataura.

"Ini ndokumbirawo pekuti ndivate

ndakaneta, uye siyai rimwe sadza
muhari mbuya"anotaura Rujeko.

"Kwanhasi uchavata muno muzukuru,
mangwana tozogadzira kunhanga iri uko
ndokwauchazovata hako" vanotaura.

Nhambo dzekuvata dzakasvika Rujeko
ndokusara ega muimba yekubikira umu.
Anowaridza ndokubva avata akatarisa
mudenga hope hadzina kumubata
pfungwa dzake ndipo padzainge dzava
kumaziva ndadzoka dzichibikana .

Chebamba achiona kuti kunze kwavira,
akabva adzika muchikomo cheMadidi.
Ainge akabereka nhava dzake dzirimбири.
Muruoko ainge akabata pfumo badzi
tsimbo yaiva muhudyu. Denga rainge
rasunama. Anofambisa kunanga

kuchipukunyuko kuya kwaakabuda nako
zuva raakatevera Jeka paaiinda
kwaGonamavende. Anosviko pinda
nepo nhambo yekuvhara chipukunyuko
haana kuzoiwana nekuda kwemvura
yainge yonaya. Anonyahwaira
akananga mumuzinda dzamara apinda.
Anosvika patsapi yaNdoro ndokumira
mumadziro mayo sezvo ainge anzwa
kuti pane munhu aifamba mberi kwake
nekuda kwerima haana kukwanisa
kumuona . Anotenderera netsapi iyi
ndokuti verere nedivi remavhirira,
akabva abhumhana nemunhu asi munhu
uyu akagomera achiwira pasi , nerima
irori chaionekwa hapana. Chebamba
haana kuda kumirira izvozvo

akazongonzwa rume richidaidzira kuti
ndiyani asi haana kudavira. Anomanya
neseri kweimba vaiva yamai vake
shungu dzakambomubata asi
akazosiyana nazvo. Uyo hoyo kutsapi
yambuya vake. Anosviko pinda munyasi
mehwaro ndokunanga paburi rake riya
raiva pasi pehwaro anorisunda
nemusoro ndokubva twanda yaiva
yakavhara apa yabva anopinda mutsapi
ndokubva adzosera tswanda iya pakare .
Anombotora nguva akamira panzvimbo
imwe chete kuti ajairane nerima raiva
mutsapi umu . Nhambo yaakatanga
kuona ndopaakadzisa nhava dzake
pamwe nemiseve yaiva mudati.
Anokwira pamusoro pedura painge

pakadzurwa paiva nehari yainge
yakakwidimbirwa ipapo anoisa nhava ya
Rujeko yaiva nenyanga muhari iyi
ndokubva aikwidibira anoisundidzira
hari iyi kumacheto kwedura kwakadziva
kuberevevere zvekuti hapana ayiiona.
Achipedza abva ambogara kwekanguva
achitura mafemo asi zvaitika musasa
mambuya vake aizviona aiva
akadongorera nepahwangwaridzo vaiva
yakanangana nemusiwo weimba
yekubikira . Nhambo yakabuda mambo
na mbuya vake voinda kunotsivama
zvaiva mumeso akwe . Akatora
chinguva arimo mutsati umu ndokubva
azobuda pava paya nezvombo zvake
zvose . Anonanga kuimba yekubikira

ndokumira pamusiwo.

"Go-go-go, Rujeko Rujeko vhura gonhi
ndini Chebamba ndasvika" anotaura
Chebamba akamira pachikumbaridzo
nezevezeve.

KUPERA KWECHITSAUKO 17

CHITSAUKO 18

Gwara harinambonje! Vakataura vakuru.
Asi nerimwe divi vakazodzoka voti
mukono unoonekwa nemavanga.
Zvichireva izvo kuti chinhu chese munhu

unofanirwa kutoshinga nekuti hakuna chinouya wakagara vadzimu vanobatsira anozvibatsirawo.

Chebamba haana kutarisa kuti kwasviba here uye kurikunaya here. Aiona kunge kunze kwakachena kwazvo. Hana yake haina kubvira yaro va usiku uhu, chiso chake chairatidza kuti akagarwa nevenyika dzimu.

"Go-go-go, Rujeko Rujeko vhura gonhi ndini Chebamba ndasvika chimbidza" anotaura Chebamba akamira pachikumbaridzo, meso ake nenzeve zvaimanya manya mativi ese.

Rujeko achinzwa inzwi iri akabva ati kwanyanu kubva padaunha rake inzwi ainge atoriziva nechekare anoinda

kugonhi ndokubva avhura achiita
zvishoma zvishoma.

"Asi wanga usati watsivama? nzeve
dzako dzinenge dzehanga Rujeko
chirega ndivhare gonhi iwe chibatidza
tsvatsva" anotaura Chebamba.

"Kuvata hope rugare Chebamba,
dzinobata here hope zvakaita manyama
amire nerongo kudai" anotaura Rujeko
akananga pane tsvatsva achibva
abatidza mumba mese ndokubva mati
ngwe-e. Chebamba anonanga pachoto
ndokufunhura shambakodzi ne hadyana
yaivapo anobva anyemwerera akatarisa
Rujeko . Rujeko anogutsirira
akatarisawo Chebamba . Chebamba
anosumudza hadyana anotanga kudya

sadza akamira ,shambakodzi yainge
yakagadzikwa pamapfihwa dzamara
aguta. Achipedza anofamba kuinda
mberi kwechikuva anatora mukombe
wedeteni ndokuchera mvura
muchirongo achibva amwa kusvika
dumbu rati tashu ndokuchifamba
achiinda kwaiva na Rujeko.

"Ndaguta zvino, chekutanga hauna
kutambudzwa here nhambo dzawapinda
muno mumuzinda" anotaura Chebamba
nezevezeve.

"Chinhu chese chinotanga nemukwidza
kozouya materu. Jeka ndiye anga ava
kuchishatira anga achida kundiita
mukadzi asi haana kuziva kuti matsotsi
haagerani ndamunyepera zvokuti

handifungi kana asara neremuromo"
anotaura Rujeko akaringa Chebamba.

"Wagona ipapo. Ko shoko randakataura
wataura uye kuita sekunge wasvikirwa"
anobvunza Chebamba.

"Ndavaudza zvole. Chasara ndiwe chete
kuti vagutsikane kuti wasvika here"
anotaura Rujeko.

"Saka yazvikanga yega. Chinzwaka
Rujeko. Ini ndoda kunoona sekuru vangu
chekutanga ndisati ndaita zvole.
Ndichibva ikoko ndoda kunanga kuna
Chiundura rimwe jinda dema rine vanga
riri panyasi peziso zvimwe wamuona
padare" anotaura Chebamba.

"Hongu ndamuona iroro jinda

ndorandipunyusa nhambo yandanga
ndiri padare asi ndaona kuti na Jeka
vakarimirana muganhu" anotaura Rujeko.

"Ichokwadi ichocho. Saka iwe
ndichazouya ndokuona kana ndadzoka"
anotaura Chebamba achitosimuka
kubva paanga ari.

"Usatsigira gonhi, kana wavata ndouya
ndichikumutsa" anotaura Chebamba .

"Kwete kuzvikanda mumukanwa
meshumba ikoko" anotaura Rujeko
achitevera shure kwaChebamba aida
kunovhara gonhi. Asi izvi hazvina
akazonzwa Chebamba ainge atopota
nemadziro. Rujeko anodzorerwa gonhi
ndokubva agara zvake pachigaro
chaivamo achimirira kudzoka

kwaChebamba.

Chebamba anonyahwaira akananga
kuhozi kwaSekuru vake mambo
Chirambadare. Yaisava zvayo kure
neimba yekubikira iyi. Anosviko mira
pamusiwo nechepajinga pawo paiva
nerima. Anoona mumba umu
makabatidzwa tsvatsva akaziva kuti
mambo vakasvinura.

"Sekuru go-go-go ndini Chebamba"
anotaura nezevezeve. Nguva iyu mambo
vainge vakasvinura , vanosumuka kubva
pachigaro pavanga vari. Ndokufamba
vachiinda kumusiwo ndokuvhura gonhi.
Chebamba anopinda achibva ambundira
sekuru vake ndokubva vagara pasi asi
Chebamba ainge akachonjomara pfumo

riri muruoko.

"Sekuru ndinoziva kuti mune nhau dzakawanda kwazvo. Mbuya musavamutsa mozovaudza kwachena kuti ndauya. Asi sekuru ndoda kukuudzai kuti ndirimupenyu asi ndainge ndafa zvakawanda zvichabuda pachena nenguva yazvo kwete ino. Ndinozviziva kuti ndini ndirikunzi ndakauraya mai vangu asi zvichabuda zuva racho . Chandakabata munhu akauraya baba vangu ndiye akauraya mai vangu uye ndiye ainge andiuraya tarisai mavanga aya sekuru. Ndakapona nepasaka reshumba vadzimu vanondida. Chandinoda kuti muchenjere kuti murarame kusvika vadzimu

vakushevedzai. Ndinoda kuti mudye
zvabikwa mambuya vangu ava. Uye
ndinoda kuti munyarare kunge
semusipo kusvika ndapedza tsoro
dzangu. Ini kutanga nhasi uno handigari
muno mumuzinda kusvika ndagadzirisa
dunhu renyu nekuti rashata rine
makunakuna chaiwo asi nguva yekuti
nditaure zvakawanda handina sekuru asi
mai vangu vari kundiwardza asi
ndichamira semurume semvumba"
anotaura Chebamba achisvimha
misodzi akatarisa mambo.

"Kukwira gomo hupoterera Chebamba
iwe ndiwe watova baba pano saka
ukagoremerwa zvinobuda here? shinga
muzukuru chirongo chinorema wava

kusvika" vanotaura mambo vachibva
vasumuka pavainge vakagara
ndokufamba vachiinda kunhava yaiva
yakaturikwa kumadziro esasa.

Vanopinza ruoko rwavo imomo
ndokubudisa chuma chaiva
chakaputirwa chitehwe chebamba
ndokudzoka kwaiva naChebamba uyo
aiva akachonjomara. Vanosviko
mupfekedza Chuma chiya chaihwinya
kunge chazorwa mafuta euromba.
Vachipedza Chebamba akabva asimuka
ndokutarisa mambo ziso rake raiva
dzvuku chairo. Anobata chuma chiya
ndokubva anyemwerera zvenhambo
iyoyo badzi.

"Nhambo dzadyanana ndichadzoka

kwete nhasi" anotaura achitodududza
nenhendashure ndiye tendeu achibva
abuda. Mambo vakasara vakamira asi
vakaona kuti Chebamba anemhandu
dzakawanda imo mumuzinda. Vakasara
vaine mibvunzo yakawanda kuti saka
chii chirikuitika mudunhu rino.

Chebamba anoti verere nemadziro
nhambo iyi mvura yainge yavara.

Anonanga kusasa kwa Chiundura. Aiziva
kutika akaona Chiundura ndiye achataura
zvose zvirikuitika mumuzinda.

Achingoti pote seri kweimwe sasa.

Anobva amira ndokuringa mativi ose
kutika hakuna munhu here. Anonzwa
kusina chaingonzwikwa ingonono
nepwere dzaivhumuka. Anonanga

kumba kwa Chiundura anosvikomira pachikumbaridzo.

"Chiundura Chiundura urimo here musasa umu" anotaura Chebamba. Asi Chiundura anotora nguva asina kudavira asi ainge azvinzwa. Imwe pfungwa yakati zvimwe ndaresva kunzwa. Chaakaita kusimuka zvinyoro nyoro ndokutora pfumo rake raiva kumutsago , ndokufamba achiinda kumusiwo.

"Chiundura unonyarara asi iwe uchifamba daviraka ndini Chebamba" anotaura Chebamba. Chiundura anoshamwiswa kuti ainge amunzwa nguvai kuti ari kufamba. "Rega ndivhure gonhi , kondagoziva kuti unosvika nhasi here?" Anotaura Chiundura achibva

avhura gonhi rake".

"Nguva handina Chiundura hande kuimba yekubikira yemukadzi wako hatingatauri nhau mune mukadzi wako" anotaura Chebamba. "Chebamba hauoni kuti iko tinonzwikwa wadii wapinda muno musasa tahwereketa uyu mukadzi haana hapwa" anotaura Chiundura.

"Dzevarume hadzidi vakadzi nditevere zvawava kutaura izvo ndezvegware" anotaura achiinda kusasa yekubikira ya Chiundura. Chiundura anoona kuti zvechokwadi haisi nguva yekuseka iyi. Anoteverawo shure kwa Chebamba ndokubva vanopinda muimba yekubikira.

"Muzinda wakamira sei Chiundura ndauya kuti iwe undiudze nekuti ndava

kuda kuparadza muvengi wangu"
anotaura Chebamba. "Chekutanga mai
vako iwe vakafa asi akaita izvi zviri kunzi
ndiwe ukatiza. Saka ini ndakati ndonzwa
newe wauya kuti ndiwe here?" Anotaura
Chiundura akaringa Chebamba neziso
dzvuku.

"Saka iwe pawakanzwa mafungiro
evanhu wakafungawo kuti chii?"
Anobvunza. "Ini ndakati ndiwe sezvi
wakashaikwa mudunhu zuva racho ,iwe
waiva waonekwa saka ndingaramba sei
ndichiona kuti ndizvo" anotaura
Chiundura. "Uri mukadzi iwe , unodiiko
kupfeka nhahwamaringa wanochera
mvura nechirongo kurwizi uko.
Ukafunga uchidawo toindepi nhai

Chiundura ini kuuraya mai vangu
vakandirera kusvika ndava zvandiri
ndouyara ko vatadzei. Chinzwa
Chiundura ndaona kuti uri mwana saka
zvakawanda handina nyaya newe ndava
kuinda" anotaura Chebamba achibva
asimuka paanga agere. Chiundura
anobva anyemwerera sezvo izvi
akazviita achida kuona kuti pfungwa dza
Chebamba dzapinza here. Akabva
amubata ruoko ndokubva ati.

"Wava murume chaiye Chebamba
ndazviona. Inzwaka ini handisi
mbwende kufunga izvozvo asi ndanga
ndichida kunzwa paumire. Chinzwa
muzinda washata asi ndiri kumira
semukono asi ndakaono kuti kunyarara

hakuna kwandinosvika. Jeka handisi
kumuchenesa , ane zvombo
zvandakaona ainazvo uye tsvimbo
zvakandinetsa kuti zvombo akazviwana
kupi nekuti hazvisi zvedunhu rino"
anotaura Chiundura asi Chebamba
akabva azviziva zvombo zvaainge
areva."Inzwa Chiundura. Zvombo izvo
Jeka akapiwa nen'anga yake
Gonamavande usavhunduka hako
hazvina basa. Asi chandiri kuda kuziva
pano, arikuti chii nezvangu nekuti apa
ndinoda kumugura kunorira" anobvunza.

"Iwe ukaonekwa arikukuindisa
nyikadzimu uye anoratidza kuti
aneukasha kubva zvaakabva
kwawareva zvimwe ngoma ndiyo ndiyo

haana kuchinja. Imwe nhau pane musikana asvika mudunhu nhasi handina kumunzwisisa Chebamba kuti hamusi pamwe chete here?" Anobvunza Chiundura. "Inzwa Chiundura nhambo dzainda zvawataura zvole ndanzwa. Musikana wawataura uyo ndini ndinaye asi mberi uko kana ndapedza tsoro dzangu ndichazoda rubatsiro rwako saka iwe chisara hauna kumbobvira wandiona. Ndayenda ini" anotaura Chebamba achibva atobuda achisiya Chiundura musasa umu nekuti zvole zvaaida kunzwa ainge audzwa.

'Ndikada kuvata nezamu mumukanwa ndinobatwa. Asi ndofanirwa kunoona mambo . N dofanirwa kuinda kuninga

sekutaura kwavakamboita kuti kana
mvura yaturuka toinda kuninga.
Ndinofanirwa kupedza hondo dzangu
dzandakatarisana nadzo ndabva
kunochingamidza vadzimu kuninga saka
ndofanirwa kunoona mambo' Chebamba
anofunga mashoko aya usiku uhwu.
Akaona zvakanaka kuti mangwana
kuchiyedza voinda kuninga nasekuru
vake. Nguva iyi jongwe repiri rainge
ratorira . Anonyahwaira achiinda kusasa
kwamambo. Anosvikogugudza asi gonhi
rainge risina kutsigirwa akabva apinda.
"Wadzoka Chebamba wagona muzukuru.
Garapasi" vanotaura mambo nguva iyi
mbuya vake vainge vasvinura
anovakwazisa asi vakamboda kuchema

asi akavanyararidza sezvo yaisava
nguva yacho yekuchema.

"Sekuru ndadzoka nhau dzangu
dzandanga ndichida ndanzwa. Saka apa
chasara kuti tiinde kuninga ndinoda kuti
vadzimu vanditungamirire pahondo
dzangu" anotaura. "Ndikosaka ndati
wagona wadzoka, ndasara ndozvifunga
wainda asi ndaona kuti uri shure
nenguva. Saka iwe mangwana
kuchiyedza tofanirwa kunosongana
kujinga kwegomo Nyachibvi kunova
kuneninga, tochikwira asi tichatora
nguva tiriko zvakanwanda totaura
tavako" vanotaura mambo. "Zvapinda
munzeve sekuru ini ndingasasika ura
pachitsiga ukadyiwa nemasvosve

tosongana kugomo Nyachibvi ini ndava kuinda hapana anofanirwa kuziva kuti ndauya muno" anotaure achibva atobuda. Zvombo zvaiva kumusana kwake ndokubva ananga kuimba yekubikira kwaiva na Rujeko anosviko pinda mumba sezvo gonhi raiva risina kutsigirwa.

"Rujeko , Rujeko ini ndava kubuda muno mumuzinda. Uye ndine kwandinoda kuzoinda saka inzwaka , mangwana ndinoda kuti mbuya vakuratidze Chenai hanzvadzi yangu. Ndokumbirawo kuti umuringe nekuti Jeka na Dapi vane zvavaironga pamusoro pake haafanirwe kubuda muno mumuzinda zvausiri kunzwisisa" anotaure Chebamba.

"Ndazvinzwa ko unoda kuinda kupi ,
haisiyo here nguva yekuparadza
muvengi wako ino?" Anotaura Rujeko.

"Nguva ndiyoyi asi handitangi ndaita
izvi ndisina ku-----" anonzwa kufamba
panze ndokubva anyarara. Akabata
Rujeko muromo. Chebamba anofamba
achiinda kumusiwo ndokubva avhura
achiita zvishoma zvishoma asi haana
waakaona. Anodzoka pana Rujeko
ndokubva ati. "Uchengete hanzvadzi
yangu Rujeko ndayenda ini pano
ndichadzoka manheru pfumo rako iri
nebakatwa. Nhava yako ndinayo usatya
hako iri pakanaka" anotaura Chebamba
achibva atobuda. Anonanga nemavirira
kunova ndiko kwaiva negomo Nyachibvi

rineninga. Aida kuti zvimuitire nyore
nhambo ichabuda zuva onosongana
namambo. Akaita zvekunosvetuka
rusvingo rwemuzinda ndokupota seri
kwaro. Utunga hwainge hwatsvuka
mabvazuva nyamasasi yainge
yatokwira.

KUPERA KWECHITSAUKO 18

CHITSAUKO 19

Kusimuka kwakaita Jeka achibva
padare, akananga kuhozi kwake
akadumbirwa kwazvo nezvainge
zvataurwa na Rujeko padare sezvo
ainge amuda nemoyo wese. Akasvika

kuhozi kwake anorova gonhi negumbo
zvineukasha richibva rati bheu.

"Nhai murume wangu kwakanaka here
kurova gonhi seizvi? mandivhundutsa
kwazvo dai kuuya muchiimba kana
kuridza muridzo muchipinda henyu ini
hana yangu inhete", vanotaura mai
Shupikai avo vaichinja nhembe dzavo
dzimwe dzacho dzainge dzazara muto
wemashizha avainge vakagarira
paruware vaina Dapi. Saka vaisada
kuzvibatisa.

"Ndinoimbeiko mukadzi wangu, handina
kana rwiyo rwungandinakidza , ko
wadzoka nguvai kwawanga wainda,
ndovimba kuti nhasi sadza rinomanya
kwazvo richidzika mudumbu

semutserendende, wahuwana here
hohwa hwacho uye howa rudzii
kwawanga wainda" anobvunza Jeka
achizendamidza pfumo rake kumadziro
nhava ndokubva aikochekera pahoko
yaiva seri kwegonhi.

"Zviripiko murume wangu ? Ndafambira
mashangurapata chaiwo kusvika
dzamira nemhuru. Shungu dzaita kuvira
kunjwa godo randigara pahuro chaipo.
Ndawana kamba dzichiita
mutambarakede dziri pamachikichori
nehohwa hwacho, ndapererwa kana
simba rekuti ndirambe ndichiinda mberi
ndarishaiwa ini ndatozodzoka nezvikuni
zviri kubikiswa na Shupikai" vanoruka
zvavo nhema mai Shupikai dzavainge

vakaudzwa na Dapi kuti monosvika muchitaura izvi.

"Babanguwe! Kureva kuti hauna kuwana kana huviri chaihwo zvaari mashura chaiwo. Chawatsvira hako nezuva mukadzi wangu, chiinda unobika zviripo izvozvo mangwana zvimwe Dapi anogona kubata mhembwe kana mhara sezvo nhasi ateya misungu yake achibva kudziva kwavakaisa Chebamba" anotaura Jeka.

"Ko ivo vati mupenyu here Chebamba wacho" vanobvunza mai Shupikai vachiita kunyemwerera vakatarisa Jeka.

"Ini wandabata haararami mukadzi wangu igaroziva izvi, Chebamba akainda nyika dzimu uyu kwakainda mai vake,

kwanga kuri kungoitira chirango hedu
kunotarisa asi moyo wangu wanga
uchitaura" anotaura Jeka.

"Ndinozviziva kuti iwe murume wangu
haujaidzi makudo neanokamhina , kana
zvadai watova mambo chingaramba chii
ihwo umambo hwacho hwakawa
nemusana kudai.Ko musikana
wandaona achipinda muno mumuzinda
wamanga muchitonga padare apo
ndiyaniko tsvakarakadenga iyoyo uye
abvepi chiso chake chitsva kwandiri"
vanotaura mai Shupikai vachipedza
kupfeka nhembe dzavo.

"Muroi chaiye musikana uya, onde
kutsvukira kunze asi mukati rizere
masvose! Apedza kuuraya varume

kudunhu kwake kwaabva ndokuuya
kupotera dunhu rino. Zvino ini ndabva
padare apo ndakadumbirwa chaiko
Chiundura haandidi zvachose mukadzi
wangu. Kunditi Jeka handiti ndiwe uri
kuchema kuti wakafirwa nemukadzi
saka tora musikana uyu uroore mushure
mekunge musikana uyu ataura
madzanambwa ake iwawa ,chero
ndiwevo maiShupikai ndingafara here
ini pakadai. Kuti ini ndife ndichisiya iwe
pamwe neumambo hwava mumaoko
angu uhwu?" Anotaura Jeka achiratidza
kuti akashatirwa kwazvo.

"Hezvo hezvo, inga zvakanzi muroi
royera kure vepedyo vakupupurire.
Chiundura hamuoni kuti anotoroyawo

masikati machena semusikana
wamareva iyeye uyu, ko zita rake anonzi
aniko?" vanobvunza.

"Kwanzi ndonzi Rujeko here
ndazombozviisa mumusoro here mai
mwana musoro wanga wongova
mafunge mafunge senzuma kutsva
chakadya nyanga. Chiinda unondiitira
kasadza nhasi usaita dete ndoda gobvu
chairo urege richiti shinyirei kwete kuti
rinhuhwe gunhi, murivo isa dovi
reruninga adi waita uri mutsine chaiwo .
Chimbidza tarira mvura yava kunaya iyi
nekuti uka-----" Jeka anomira
kutura mushure mokunzwa pamusiwo
pagogodzwa.

"Ndiyani" anodavira Jeka neinzwi gobvu .

"Ndini Dapi changamire wangu"
anotaura.

"Pinda Dapi, ndanga ndichida kutotuma munhu kusasa kwako ikoko. Imi mai Shupikai chiindai munogadzira kudya dumbu rangu rangova gomba" anotaura Jeka. Mai Shupikai vanotarisa na Dapi vachibuda pamusiwo nyemwerero ichisvika kugotsi. Dapi anopinda ndokubva agara pachituro. Nguva iyi mvura yainge yosvotsvoma iko kupenya paiita kunge pabatidzwa moto.

"Changamire wangu sekuziva kwenyu kuti ndambosara ndichiteya misungu uyu Madzore ndiye atungamira neshoko kuno. Ndafara kwazvo Chebamba anoratidza kuti akafa kudziva kwatainda

uko makarwe anga atori nenzara
ndovimba kuti Madzore ataura zvizere"
anotaura Dapi.

"Ndiko kugona kwamakaita Dapi izvi
zvoratidza kuti uri kugona basa rako.
Chinzwaka nhau iri pano. Ndeyekuti
mangwana kuchiyedza. Ndichanyepera
kutuma Chenai kumvura. Saka ndoda
kuti iwe na Madzore mozotevera shure
kwake mobva manomubata, ndoda kuti
munange naye kwa Gonamavende
unokuziva iwe. Monomupa Chenai moti
zvimwe zvichauya sana kugadzira
mhiko dzako kuti ndikunde kuuraya
Chirambadare mukadzi ndakupa uyu.
Ndokudai pano jongwe rekutanga
richichema kana kuti kunozosara

kochena mavamo. Ndoda kuti
muchingosvika totouraya Chiundura uyu
haanetsi. Saka uchibva pano nanga
kumba kwa Madzore izvezvi
wonomupira nhau iyi" anotaura Jeka.

"Riri munzeve changamire wangu
musatityira henyu, simbi inorohwa
ichapisa imimi mangwana wacho itai
izvi kaziva kachiti vhu-u" anotaura Dapi.

"Ndichaita sekudero Dapi,iwe chiinda
kuna Madzore asati avata , inzwa
ruchando urwu haanganonoki kuvata
ndiyo nhambo dzekutandara nevakadzi
zvikagoti wake akazvitakura iti haina
mwedzi mishanu here zviya" anotaura
Jeka.

"Asi maitorava mwedzi yemimba

yemukadzi wemumwe kani Changamire"
anobvunza Dapi achibva asimuka.

"Ndarangarira paakatanga kupfira pfira
ndipo pandaipfurira tsapi yangu yezviyo"
anotaura Jeka. Dapi anoseka achibva
atobuda panze.

Anoti ava panze anomanya akananga
kusasa kwa Madzore. Ari mukumanya
kudaro anoyerekana aroverana
nemumwevo munhu murima achibva
adonha pasi ndokubva arovera negotsi
muviri wese kwakuzara madhaka.

"Ndiyaniko uyu? He-e ndiyaniko
ukagonyarara seiko" Dapi ainge ava
kutura ega achifunga kuti munhu
waaroverana naye achiripo. Anoridza
tsamwa ndokubva amanya achiinda

kumba kwaMadzore. Haana kuda kupinda mumba nhambo yaakagugudza pamusiwo.

"Madzore huya apa ndikurume nzeve ndoda kunozorora" anotaura, Madzore ndokuuya. Vanotaura nezevezeve vari pamusiwo zvaisanzwikwa dzamara vapedza ndokubva vaparadzana Dapi ndokunanga kusasa kwake. Musi uyu Jeka akarambidza Chenai kunovata kwavaRusanzu, aiziva kuti ane zvaanoda kuita. Chero vaRusanzu zvakanetsawo sezvo kubva zvafa mai Chebamba vanova mai va Chenai , Chenai ainge agara kwavaRusanzu achitizve ndokunogara mukoma Chebamba.

Chifumi chamangwana zuva richingoti
vhu-u Rujeko ainge atomuka achiita
mabasa emumba kusuka nekutsvaira
pamwe nekuvesa moto. hapana munhu
akamukirana naye zuva rakazobuda
apedza zvose. Zvineiwo Chennai akati
achingomuka akabva ananga kumba
kwavaRusanzu sezvo varivo munhu
waaidisisa ndovaainge achiti mai vangu.
Na mai Shupikai vaisaonana sa gonzo
nekatsi. Chennai achisvika muimba
yekubikira anowana Rujeko achirodza
bakatwa rake . Rujeko ainge akafuratira
anotendeuka achiita zvisishoma
nezvisishoma ndokubva vatarisana na
Chennai mumaziso chaimo. Rujeko
anoisa bakatwa muhudyu make

ndokubva ati,.

"Chenai wakadii hako unofara here gara pasi" anotaura Rujeko achibva akuchidzira moto.

"Ndiwe ani wandiziva? Kugara ndinogara hangu kovaridzi vemuno vaindepi" anotaura Chenai achifamba ndokunogara mberi kwaRujeko.

"Ndinonzi Rujeko mbuya vako vachakavata asi mbai mbai vanomuka havo" anotaura Rujeko.

"Ho-o, saka iwe ndiwe wandakaona urimudare nezuro ndiwe wava kugara nambuya vangu here, ini ndiri muzukuru wavo" anotaura Chenai.

"Hongu , vakandiudza ndikosaka ndaziva

kuti Chenai" anotaura Rujeko asi haana kuda kutaura kuti ndakaudzwa izvi na Chebamba.

"Ndafunga kuti zvimwe mukoma vangu Chebamba ndivo vauya newe semuroora ini" anotaura Chenai .

Rujeko anoseka akatarisa Chenai . Asi haana kudavira mbuya vaRusanzu vakabva vapinda. Chenai anomutsa mbuya vake , ndizvowo na Rujeko anomutsa vaRusanzu avo vaikahadzika kuti Rujeko amuka nguvai mumba mainga makachena zvose zvainge zvaitwa. VaRusanzu vachingogara pasi pamusiwo pakabva pagogodzewo. Vose vanocheuka ndokuona ari Shupikai mwana wa Jeka.

"Pinda kwakanaka here" vanotaura
vaRusanzu.

"Ndakamira negumbo rimwe handisi
kupinda , Chenai kwanzi na baba huya
kuno izvezvi nekuchimbida, kwanzi
ukasvika mate avapfirira pajinga
pemoto aoma panotsva badza mupini
uchisara" anotaura Shupikai achibva
atotendeuka ndokumanya achidzoka
kusasa kwaiva na Jeka.

Chenai chiso chake chinoratidza
kusvava semuboora wemuchirimo
warohwa nezuva akatarisa mbuya vake.
Rujeko akazviona asi haana zvaakataura.

"Inda uchimanya muzukuru wangu
ungasvika ukamedzwa naJeka"
vanotaura. Chenai anodonhedza

musodzi akatarisa mbuya vake
achisumuka.

"Kutevera mai vangu nyikadzimu
kurinani mbuya, ukaona hove dzemuna
Save dzochena kokuzoti dziri
muzvimatsime" anotaura Chenai
achibuda musasa umu meso ake
yakajenga misodzi yekutambudzika, izvi
zvairatidza kuti arikushungurudzwa.

Chenai akainda achimanya kwazvo. Asi
hana yake yairova kwazvo. Akasviko
nanga kuimba yekubikira kwaiva na
Jeka richidziya moto na Dapi pamwe na
Madzore. Anosvikogwadama parutivi
pa Jeka. Jeka anosunga chiso
ndokubva aregedza ganyamuto

rembama kumusana kwa Chennai uyo
akashanyarika achidonhera pasi Jeka
richibva rati nyamwi pachigaro paro
rakatarisa Chennai uyo ainge oshanyarika
sembongoro iri padurunhuru
(gombaremadota).

"Ndakati chii nenyaya yekuinda
kwavaRusanzu Chennai muka ugare apa"
anotaura Jeka.

"Ndaposha baba, makati handidi
kukuona uchiindako" anotaura Chennai
achiuchira maoko ake akatarisa Jeka
musoro wake uri parutivi.Regai vakuru
vakati nherera inoguta musi unofa mai.
Chennai ainge ari muchoto semhashu
yabatwa nemufudzi wemombe".

"Nyarara apa ndinokudzemura neimwe

mbama, chinzwa kana uchida
zvakanaka neni shamhu iyi unoiona
here" anotaura Jeka achivhomora
shamhu yaiva seri kwegonhi yemusharu.

"Hongu baba" anodavira Chenai
achipukuta misodzi yake.

"Kuti ndikuregerere izvezvi tora chirongo
icho woinda kurwizi wonochera mvura ,
ndokuda pano izvozvi . Sumuka uinde
izvezvi" anotaura Jeka. Chenai anotora
chirongo chaiva chisina mvura
ndokubva atobuda mumba umu Jeka
ndokubva atogara pasi.

Rujeko zvaakasara navaRusanzu ,
akabva asimuka ndokubva abuda panze
haana kutaura kuti ndiri kuinda kupi .
Rujeko akatevera kumba kwa mai

Shupikai kwaiva kwainda Chenai
ndokubva anogara mumadziro achiita
senge arikudziya mushana. Zvose
zvakaiteka mumba umu akazvinzwa uye
kurohwa kwakaiteka Chenai akazvinzwa
ari mumadziro.

"Dapi dzawira mutswanda chiindai
munobata Chenai moinda neye monopa
n'anga yangu Gonamavende akatomirira
mukadzi wake iyeye teverai Chenai
izvezvi toziva kuti chikamu ichi
ndapedza" anotaura Jeka mushure
mokunge agara pasi. Zvose izvi zvaiva
munzeve dza Rujeko. Dapi na Madzore
vakabva vatobuda muimba umu
vakapakata zvombo zvavo ndokubva
vatevera kurwizi kwainge kwainda

Chenai. Rujeko anovira nehasha kwazvo. Anosimuka pamadziro paanga ari ndokubva afamba achiinda kusasa kwambuya vaRusanzu asi akafamba nhambwe nhatu ndokubva ayeuka mashoko aChebamba.

'Rujeko chengeta hanzvadzi yangu, pana Chenai ndipo pauri ndokumbirisawo' anofunga izvi mushure mokunge afamba nhambwe shanu. Akabva atoti tende u asati asvika kusasa kwambuya. Akabva anonga chimwe chirongo chaiva paneimwe tsapi haana kusvitarisa kuti chinemutsi here. Akabva atoti verere ndokutevera kurwizi kwainge kwainda Chenai uyo ainge ateverwa nana Dapi. Rujeko akati achingobuda siwo guru

badzi akabva arovera chirongo chaaiva
nacho padombo chichibva chati
kwarakata kuputsika kuita zvipenga
makumi manomwe dzaiva shungu chiso
chake chainge chazara mananda
mananda . Anomanya achidzika nyasi
kurwizi achitevera tsoka dzana Dapi.

Chenai akati achisvika kurwizi ,
anofemedzereka sembongoro
yakasungwa uyu achichera mvura
aingocheuka cheuka mativi ose
misodzi yaingochururuka seirikubva
muchitubu chemhokore .

Pfungwa dzake dzainge dzava
kumaziva ndadzoka kufunga mai vake
na Chebamba mukoma wake.
Anopedza kuchera mvura ndokubva

asumudza chirongo chake ,
paakangochiti mumusoro tsve-e akabva
anzi huro dzvi-i na Dapi sezvo ainge
akafuratira paaaisenga chirongo chake,
Chirongo chakabva chawira pasi
mujecha asi hachina kuputsika. Chenai
anoyedza kuchema asi zvakakona
n'anga."Madzore manya nemashizha
iwawo, pfokera mumuromo wobva
wasunga muromo wacho zvakasimba
nguva hatina" anotaura Dapi. Madzore
anopfokera mashizha mumuromo
maChenai ndokubva amusunga
muromo wake. Vanomusunga
makumbo nemaoko Dapi anobva
asumudza Chenai semhara
ndokumukandira pamafudzi. Vanosiya

chirongo chakakwidibirwa pamufuku
ndokubva vatopinda musango havo
maodzanyemba akadziva mavirira.

Rujeko akati achisvika kurwizi anobva
apinda mugwenzi remuroro raiva
mujinga marwo rwizi. nhambo
yaisungwa Chenai zvose izvi zvaiva
mumaziso ake. Kutakurwa kwaakaitwa
zvaiva mumaziso ake. Anodzungudza
musoro wake kupererwa sezvo ainge
atangirwa. Asi moyo wake wakarwadza
akabva ati mukono unoonekwa
namavanga chauya chinoona ini
nyangwe vakuru vakati chara chimwe
hachitswanyi inda ndinofa ndayedza.

Anobuda mugwenzi remuroro maainge
apinda. Ndokutanga kutevera shure

kwana Dapi achivanda nemiti. Vana Dapi
vaiita kukanda nhambwe chaiko kwete
zvekuseka. Madzore ndiye aivamberi
Dapi ari kumashure akasenga Chennai
uyo aibidirika asi zvaishaya basa nekuti
Dapi aiva nesimba. Vanoti vafamba
mutunhu Chennai akabva aona Rujeko
achitevera kumashure asi kuti
ashevedzere zvainge zvisingaiti. Chennai
nechemumoyo akangoti chero hazvo
Rujeko andiona ndiye achanoudza
mbuya vangu kuti ndafa uye ndaurawa
nanani. Asi chakamunetsa aingoona
Rujeko achitevera ari shure achivanda
nemiti. Vakafamba dzamara zuva
rapinda munamai varo , vhenekera
tsvimborume ndiyo yainge yoita basa

rekuvhenekera nyika. Nhambo yayainge yonyura vhenekera tsvimborume iyi ndiyo nhambo yakasvika vana Dapi padumba raGonamavende. Rujeko hana kupinda muchivanze akasara ari kure . Anoona Chenai achipinzwa mudumba iri raipfuta moto mukati mabviravira chaiwo. Chenai anochema mhere chaiyo yakavharisa dumba iri asi akabva anyarara zvairatidza kuti pane zvaainge amwiswa mumukanwa , nekuti akaita semumhu ari kukarara mvura yekurapa mahumunya na Gonamavende akabva anyarara nhambo iyoyi. Rujeko anoshatirwa kwazvo pfungwa dzake dzaipishana kuti saka zvazvadai ndoita sei?, Nekuti zvaisada kuita dzungu

pamusha pen'anga aiinda nyikadzimu
akakurira muvhu sembambaira.

Kubuda kwakaita Chebamba usiku,
anotura mafemo ava kunze kwemuzinda.
Anofamba achiinda mavirira . Anosvika
paiva nerimwe zimuchakata , anomira
pasi paro akazembera hunde. Mazizi
maviri anotanga kurira achibvumira ,
'Hi-ii hi-i , hi-i hi-i' anosumudza musoro
wake asi haana chaakaona sezvo
kwaiva kuchakasviba nyangwe hazvo
utunga hwainge hwabuda.

'Michataka ndiyo inoshandiswa nevaroi

kazhinji kacho. Ndogona kuonekwa
vavakuuya kugovana nyama dzavo pano.
Mukati Jeka haasi muroyi uya kana
asingaroyi uya hazvigoni ndiye
anototemera vanhu uroyi' anotaura
Chebamba achibva paMuchakata uyu
ndokunanga kune ziMupfura raiva mberi
kwacho. Akasviko kwira ndokuzvisunga
nemakavi . Semunhu aiva asina
kumbovata hope dzakabva
dzamunyangira sezvo dzisina mugoni.
Anotanga kurota Chenai ari mukati
memaviri emoto. Asi panhu apa paisa
svikika kuti amutore , anonetsekana
kwazvo sezvo moto uyu waipisa kwazvo.
Ari mushishi rekuti otera sei hanzvadzi
yake anoona nyoka mbiri dzainge

dzakatarisana naye dzichiita kupfira
mate . Imwe yacho yakabva
yamumonera makumbo ake imwe yacho
yakabva yatanga kudzingirira vanhu
mumuzinda. Nyoka imwe yacho yaiva
yamumonera makumbo yakabva
yamuwisira pasi. Ndiyo nhambo yaakati
pepu achiridza mhere. Anoona zuva
ratokwira dzatova nhamho dzekukamwa
kwemombe. Hana yake yakabva yati
dhidhidhi katatu. Anodambura makavi
ainge akasvisunga nawo ndokusvetuka
achidzika mumuti nedavi segudo."Nhasi
zvangu nasekuru, kuti handiwani
vadzokera kumuzinda here
ndazovatisawo ini vadzimu seiko
mandiinyengedza nemazihope asina

dudziro aya" anotaura ega achizvituka.
Anobereka zvombo zvake kumusana
pfumo badzi ndiro raiva muruoko.
Anomanya akananga mavirira kugomo
Nyachibvi kunova kwaakavimbisana
nasekuru vake kuti tonosongana kujinga
kwegomo. Anomanya achisvetuka
makwenzi achiparwa nemiti , hapana
chaainzwa sezvo nhambo dzainge
dzadyanana.

Nguva dzekuvhurwa kwemombe ndiyo
yaakati pfacha mujinga megomo
Nyachibvi. Ainge ofema ropa badzi ,
anomira akabata mabvi ake
achifemereka . "Havadaro vatodzokera
here mambo" anotaura ega achifamba
achitevedza gomo. Anomira ndokubva

anzwa kuti 'Ga-ga-ga-ga' divi remavirira .
"Vangava mambo here ava kana kuti
ndemumwevo munhu. Zvimwe anogona
ari Jeka amukirawo kuno. Asi regai
ndinopedzera nyota pachitubu" anotaura
ega achibva ananga kwaiti ga-ga-ga
kuya , ava kusvika akabva aona vari
mambo waitoveza zvavo mupini wavo.
"Ruregerezo mambo wangu ndaposhwa
sekuru ndiregererezwi hope
dzazondikurira nhambo dzandati
ndimbotsivamawo sezvo ndanga
ndanzwa nemaneto,ndaposhwa sekuru"
anotaura Chebamba achiuchira maoko
ake akachonjomara mberi kwamambo
rimwe ibvi rake raiva rakatunga pasi
akakotamisa chiso kupa rukudzo

kunamambo. "Sumuka hako muzukuru wangu , ndinozviziva kuti basa rauri kubata harisi doko ndinozvinzwisisa. Asi zvawanonoka kuuya kudai totomirira kuti kunze kutionhorere tanga tichifanirwa kukwira gomo iri mangwanani chaiko kuchitionhorera. Asi ndaziva kuti uchanonoka ,hauoni ndaisa maheu muchoro chemvura ichi ndichiitira kuti tigomwa ndoziva unomada nyorovedza pahuro muzukuru" vanotaura mambo ndokutambidza Chebamba achibva amedza huro shanu asina kuzorora. Ndokubva agara hake pasi. Anotarisa panzvimbo imwe achishaya kuti hope dzake dzaarota dzinorevei. Asi imwe pfungwa yakati

zvimwe ihope dzekutya varoi sezvo akambonzwa mazizi manheru.

"Muzukuru ukagoita senge usi pano, haungoturi zviri mudundundu mako here" ?vanotaura mambo . Chebamba anonyemwerera akatarisa mambo ndokubva ati.

"Zvipiko sekuru ndiri kufunga Jeka akaona musiri mumuzinda achafungei nazvo" anonyepa Chebamba.

"Ndozvingakunetsa here izvozvo siira ini muzukuru zvose izvi tiite chifambirwa. Watoguta here maheu aya , imwa nekuti kuzoona tosvika paneninga zvimwe tosvika zuva ragara makomo sezvo ini unoona handifambisi handichina makumbo, zvichireva kuti kudzika

kwedu mangwana mangwanani zuva
rinozobudawo tavapano pasi" vanotaura
mambo . "Chakakosha kuonana
nevenyika dzimu zvimwe izvi hasvina
mhaka ini ndatova jengetwa nesango"
anotaura Chebamba.

Vaviri ava vakagara apa kusvika zuva
rarereka ndiyo nhambo yavakatanga
kukwira gomo Nyachibvi. Vaifamba
zvishoma zvishoma . Sakai vakuru
vakati kukwira gomo husendemara
vaisakwira vakarurama vaifamba
sezvinoita rwizvi. Zuva parainge
rananzva makomo ndiyo nhambo
yavakasvika paninga. Mambo vairatidza
kuti vaine vaneta kwazvo asi kwaiva
kushingirira kwemutana."Tasvika

muzukuru. Unoona hwendefa inemutswi
iyo tarira munyasi mayo uchaona
katombo kehurungudo karipo wokarova
nepfumo rako" vanotaura mambo.

Chebamba akabva aita sekudero
anorova katombo kaya kachibva
kafamba hwendefa iya yakabva yadzika
munyasi ndokusara mukaha waibatika.

"Chirisundira mavirira hwendefa iyoyo
wopinza ruoko kumabvazuva uchaona
tsvatsva dziripo wobatidza" vanotaura
mambo. Chebamba anosundira
hwendefa iya mavirira ndokubva siwo
reninga ravhurika. Anopinza ruoko
kwaainge anzi apinze achibva atora
tsvatsva nhatu dzaivapo anodzibatidza .
Mambo vakabva vauchira

ndokudetemba vakachonjomara
pamusiwo. Vachipedza vanotambira
tsvatsva ndokubva vatungamira
vachipinda muninga Chebamba aiva
kumashure asi hana yake yaibika
manhanga. Uku zuva rainge rapinda
muna mai varo.

KUPERA KWECHITSAUKO 19

CHITSAUKO 20

HONDO MUMUZINDA WAMAMBO

CHIRAMBADARE

Kubuda kwakaita vana Dapi vachitevera
Chenai kurwizi,Jeka akasara agere
pachituro chake achidziya moto.

Nyemwe rero yake yaisvika kugotsi
pamwe nemoyo wake wainge wati
mbembe sedivi redoto.

'Chikamu ichi ndapedza , kana
Gonamavende nhasi hope hadziuyi
ndamupa gombo risina kubvira rarimwa,
nhasi anotora nguva yake chero
paavatira zvavakwaari kufuka kana
kuwarira, ini nhasi mambo ndiri kuda
kuvapfuudza nemuchetura handivapotsi
ndopika na Gonamavende.

Ndakambovapa tambo refu zvino nhasi

vaigochera pautsi. Ndirikuona kuti
padare apo havasati vasvika. Vachingoti
rutsoka rwavo mudare badzi zvangu
zvaita. Regai ndigare ndaruka tsoro
dzangu" anotaura Jeka achibva asimuka.
Anobuda muimba yekubikira iyi
ndokunanga kuhozi kwake. Anosviko
tora zvimukuyu svitatu zvenyama
yemhara ndokudzoka kuimba yekubikira
kuya. Anowana mukadzi wake mai
Shupikai varimo na Shupikai. Anogocha
nyama yechimukuyu chiya chaanga
ainacho, achiisa mundiro yemuti.
Achipedza akabva abuda akabata
nyama iya ndokunaga kusasa kwake
zvekare kwekuvata, anosvikogadzika
ndiro iya pasi ndokuturura nhava yake

yaiva seri kwegonhi, anobudisa chitehwe
chiya chaakatorera Urahwatasva zuva
raakafa. Anobudisa nduru yegarwe
ndokubva aisasira pamusoro penyama
iya. Achipedza akabva atobuda musasa
make umu akabata ndiro iya inenyama
mumaoko ndokubva akakanyara
achiinda kudare. Aiva neimwe nyama
yaanga asina kuisa nduru yegware ndiyo
badzi yaaifamba achidya dzamara
asvika padare. Anowana paina
Chiundura nemamwe machinda asi
mambo vainge vasipo.

Zvinomunetsa kuti mambo varipi,
akambofunga kuti zvimwe vachakavata ,
asi mumwe moyo wakabva wati benzi
bvunza rakanaka.

"Mukagogara mega mega pano kudai ko mambo vaindakupiko vandisiri kuona?"
Anobvunza Jeka achimanyisa meso ake mativi ose.

"Ini ndirikutoti iwe Jeka ndiwe uri kutoziva kwainda mambo kana kuti ndiwe wabuda namambo izvo uriposu? Kubva richibuda chiso chako handina kubvira ndachiona" anotaura Chiundura.

"Usandibata kumeso iwe Chiundura ndingabuda ndisina kutaura here musi upi uyoyo kana kuti zuva randakabuda namambo ndikasataura,? Riripo here?"
Anotaura Jeka akatsvukisa meso.

Chiundura haana raakadavira anoramba akapfumbira muromo wake. Jeka anobuda mudare ndokubva ananga

kusasa kwavaRusanzu aida
kunozvinzwira kuna mambo. Anosvika
paimba yekubikira yavaRusanzu iyo
yainge yakatsedeurwa zvishoma nana
gonhi rainge rakatsigirwa nedombo
rehurungudo.

"VaRusanzu , hei mune munhu here
mumba umu, vaRusanzu murimo here
mumba gogogo" anokwamatata Jeka
asi hapana akamudavira. Akabva aridza
tsamwa katatu

achisunda gonhi netsvimbo yake
yaakapiwa na Gonamavende wanei
hamuna mumhu. Akafamba achiinda
kuimba yeumambo ndopaakaita
mahwekwe navaRusanzu vachibva
kuhozi kwavo.

"Ko hamuchadaviri here kana muchishevedzwa, chinguridzo ndakwamatata asi makabaira miti munzeve kani" anobvunza Jeka.

"Kwakanaka here Jeka" vanobvunza vaRusanzu. "Ndirikuda mambo ndapedza kugocha nyama yavakandiraira zuro kuti ndizogocha" .

"Zvino mambo vafuma vasiri muno mudunhu. Havana kundioneka sezvo ndanga ndakavata nhambo dzacho asi ndaona senge kusina kure kwavarikuinda havo" vanotaura.

"Kana vauya movapa nyama iyi sezvo ini ndirikuda kutobudawo izvezvi" anotaura Jeka achitambidza vaRusanzu nyama iya. VaRusanzu pavanoti

vatambira vanoresva kuibata ichibva
yasvedza kumaoko avo ndiyo pasi waya
nyama yese ndokuzara ivhu rine
madhaka sezvo madeko kwainge
kwanaya.

"Ndochii ichi vaRusanzu, kana manga
musingadi madii kutaura pane kurasha
nyama yangu kudai zvino ndoiwana kupi
ha-a mandigumbura" anotaura Jeka
achipopota kwazvo.

"Ndine urombo Jeka hameno kuti
chiveve chandibata sei ndatadza kubata
zvakanaka ndiro" vanotaura vaRusanzu
vakatarisa nyama yaiva pasi asi yadeuka
yadeuka haichaorereki, yose yainge
yazara ivhu. Jeka anoridza tsamwa
achibva atonanga kusasa kwake

akafuta sedafi ratsikwa.

'Ishura rudziiko randinoitirwa na Jeka iri.
Kuti yanga iri nyama iri yega iyoyi?
Kokana yanga iri nyama kwayo adiiko
kuinonga anosuka ozodya yabva ivhu.
Handimuchenesi ini Jeka. Papi
pandanga ndichamuudza kuti mambo
vafumo bata jongwe muromo vachiinda
kuninga' vanotaura izvi vaRusanzu
vakabereka maoko avo vachiinda
kuimba yekubikira. Vaifunga kuti
zvimwe vachasvika Rujeko avamo asi
zvaiva zviroto anga asimo. Nguva iyi
vaRusanzu zvakatanga kuvanetsa
kwazvo. 'Kuti Rujeko abuda mangwanani
pano achiita senge ari kunotora huni

kana kunorasa mvura panze nanhasi
haasati adzoka, Ko aindepipi?. Munhu
akasvika pano zuro chaiye anga ajairana
nevanhu nguvai. Kuti aida kumba
kwashevedzwa Chennai here kwaiyeye
Jeka here? Asi dai atauraka kuti ndiri
kutevera kwainda Chennai. Asi nhambo
dzaabuda musasa ungadai adzoka kare
kana kuri kubvuwa sadza kana bota
zvimwe dai ratoibva pamwe nekusuka
ndiro dzacho regai ndimutarise
mumuzinda muno ndingangogaraka
munhu atopinda parumana nzombe
sezvo achiri mutsva murino dunhu'
vanotaura vega vaRusanzu ndokubva
vatanga kutsvaka Rujeko mumuzinda
asi kwaiva kutsvaka tsono mujecha.

Wese wavaibvunza aingoti hatina
kumuona vakasvika pakukanda
mapfumo pasi . Ndokudzoka kusasa
kwavo.

Jeka paakaona kuti machinda ake Dapi
na Madzore havasati vadzoka akaziva
kuti musungo wake wabata asi chainge
chomunetsa kuti ko mambo vaindepi,
izvi zvakamushatirisa kwazvo
kuvanzirwa .

'Chiundura anoda kundiita pwere yake.
Zvimwe ipapa mambo vainda kun'anga
yavo chinyararire. Ndikanonyatsobata
Chiundura anondiudza chete,
akasataura pfumo iri rinomuindisa nyika
dzimu. Kana kuri kuti vainda kun'anga
zvava pachena seinda iri mubaravara

kuti ndinonobatwa kuti ndini ndiri
kuparadza vanhu vese varikufa muno.
Hazvigoni mambo ndava kuta Chiundura
ndokuta zvekare here hazvigoni.
Anofanirwa kuziva kuti ini ndiri jinda
guru mambo vava kutoudza iye zvose
nekushumwa, ndiye ava kuudzwa kana
vachibuda nhai? Zvino vagadzira
makuva pasi" anotaura ega Jeka ari
musasa make. Anononga pfumo rake
ndokubva abuda musasa make
achifambisa akananga kudare kwaiva
nemachinda ese. Akati ava kusvika
padare inonzwikwa mhere divi
remabvazuva.

"Yowe yowe yowe"

Mhere iyi yakavharisa muzinda wese.

Vakadzi pwere vakabva vabuda panze
vabatira ura mumaoko. Machinda ese
aiva padare anowaruka achibva
pazvigaro zvawo, Jeka haana kuzoinda
mberi anomira panzvimbo imwe
sedzukurununu. Munhu wese akabva
apotsera meso kwaibva mhere iya.
Vanoona guruva rakati tsvete tsvete
ukoko, zvaimboita sekwakabva kunaya
here zuro. Pfumo remuvengi rainge
rapinda senyuchi mumuzinda
mamambo Chirambadare. Mhere iyo
yaiva yevarindi vaiva kusuwo guru vose
vakatumburwa nemuvengi vakasiya
nyemba.

Ndoro anosvetuka ndokubva aridza
hwamanda yehondo kashanu.

Machinda amambo Chirambadare
ainge anyangirwa akarivara nemuvengi
zvekuti nguva yekutora zvombo
mudzimba yakanga isingachaiti. Jeka
anozvinyorovedza akamira pazvimbo
imwe chete. Nenguva isipi muzinda
wainge wava kushandurudzwa
nemuvengi ropa richisvosvoma. Vakadzi
vainge vasingaurawi. Machinda aiva
nezvombo akada kurwisawo ndivo
vakaurawa. Jeka achiona kuti apa
handipabudi akangoti verere ndiye
pokonyoko , mamwe machinda
amambo Chirambadare achiona izvi
akabva atizawo. Chiundura na Ndoro na
Magarapa ndovakasara vorwisa
muvengi uyo wavaisaziva kuti ndiyani

.Aiita kutema rege wembada. Chiundura paakaona kuti vamwe vatiza akabva aridza mheterwa yekuti kune vamwe vake ngatitizeiwo. Hapana akasara vakapona nepasaka reshumba .

Ndokumanyira mumakomo aiva kunze kwemuzinda. Vakadzi ndivo vakasara kumuzinda ndokubva vaunganidzwa , vana vaichema zvaisiririsa,zvi chinzwiswa tsitsi.

"Nyararai apo, munochema chii pfumbirai miromo yenyu nekuchimbida" rinotaura rimwe jinda raiva dema dema sehari yabikirwa mbeva. Mazino aro aiva akasviba seradya hubvu. Vakadzi vese vakabva vanyarara asi vaifemedzereka.

VaRusanzu vainge vazviisa mudura
mavo vainge vakati kwati kwati seri
kwegonhi. Mumwe mukadzi werimwe
jinda rainge raurawa misodzi yake
yaingoyererera sezvo chitunha
chemurume wake chaiva parutivi.

Jinda riya rakabva rapotsera pfumo
kumukadzi uye pfumo rakasvikoti
muchipfuva piti piti ndokubva rabudira
kumusana uko kwainge kuine svava
ikabva yabaiwavo nepfumo iri vese
ndokuinda nyika dzimu.

"Mazvionaka kana ndichiti munhu
nyarara ngaanyarare ndokutumburai
hapana varume venyu pano" rinotaura
jinda iri rairatidza kuti ndiro
raitungamirira hondo iyi.

"Chorwira tora machinda manomwe nunotinha zvipfuwo zvese musawana zvinosara. Iwe Chenje tora vasikana uyu neuyu ,kouya avo vese vakanaka ngatitore sekutaura kwaitwa na mambo vedu" rinotaura jinda riya richifamba famba. Dzinotorwa mhandara gumi pamwe nezvipfuwo zvose mombe mbudzi nemakwai. Izvi zvakararatidza kuti muvengi uyu anga achingoda zvipfuwo badzi, nguva iyi zuva rainge ratsvuka . Ndipo pakazobuda muvengi odzokera, asi akabuda nemavirira kusiwo diki asi pakupinda akapinda nesuwo guru. Kuchingoti zvarara vana Chiundura vakabva vadzoka mumuzinda vachiita vaviri vaviri , Jeka akazouyawo pava

paya ndiye akava wekupedzisira.
Varume vainge vaurawa mumuzinda
umu havana kuzivikanwa kuti vangani ,
hapana akakwanisa kuzviverenga
nekutya uye hapana akavata mumba
sezvo vaifunga kuti zvimwe muvengi
angangodzoka akatiparadza . Uyewo
zvitunha hapana akazvinonga
vaitomirira kuti kunze kuyedze.

"Sekuru ndiye mukadzi wenyu uyu
watanzi tikupei na Jeka hatingazivi
zvamakarongana" anotaura Dapi.

Gonamavende anotarisa Chenai
ndokubva anyemwerera. Anosumuka
ndokubva ainda pana Chenai
anomutsvoda matama ndokuzotsvoda
pamhanza yake.

"Apa Jeka andigonera zvikuru
ichimhandara handitika vazukuru ,
muregedzei henyu zvandamumwisa izvi
ndozviri kushanda haachatokuzivii imi
ava kutoziva inini bedzi" anotaura
Gonamavende , achimanyisa ziso rake
rimwe chete raaiva asara naro raihwaira
hwaira kunge kune chamupupuri. Dapi
na Madzore vanoregedza Chenai uyo
airatidza kuti hapana chaanga achaziva.

"Imhandara iyi Gonamavende unogona
kutarisa zvako tichipo kudai sezvo

kunofanirwa kuyedza tawira
mumuzinda" anotaura Dapi.

Gonamavende akabva abata Chenai
ndokumuwisira pasi negotsi , aiita
kufemedzereka achiita kakugomera
rute rwuchidonha kunge shumba yaona
nyama. Mumuromo make maiva
nemazino mashanu maviri aiva
kumusoro matatu ndiwo aiva nyasi aiva
akasviba kuti ndo-o uye aiva
nezvipakanwa kunge munhu adya
mamengo . Gonamavende akabvisa
nhawamaringa yaiva yakamonera
Chenai anofambisa ruoko rwake
rwuchiinda pasikarudzi , rwaiva neman'a
uye rwakatsvukuruka semvura yanyikwa
makavi emupfute.

"Akazara gombo harina charati
ratemwa ndini ndichatanga kurima
nekusakura , ndovimba kuti mbeu
inobuda apa ichandifadza" anotaura
Gonamavende achibva amutsa Chenai.

"Ndikosaka mapuwa uyu dunhu rese
ndiye anovharisa" anotaura Dapi.

"Apa andigonera regai ndimwe midzi
yangu , panopera zvinguvana
ndochishanda basa, iyi midzi mukaimwa
vazukuru mukadzi anodetemba mutupo
wako asina amuudza uye kunochena
hope hadziuyu, seuyu mudiki
ndikamutangira achakadai anokura
ajaira" anotaura Gonamavende achibva
amwa midzi yake ye bonde.

"Isu hatichamiri sekuru vaguta

havaoneki" anotaura Dapi achibuda musasa, Madzore ndokubva abudawo.

"Ini handichakubudisii dai makumbi wangu aripo akubudisai zvino ainda kunotsvaka makwati" anotaura Gonamavende.

Rujeko zvose izvi zvaiva mumeso ake. Paakaona vana Dapi vavakuuya akabva avhomora bakatwa rake muhudyu muya maakariisa nhambo yaaiva mumba paakapedza kurirodza. Anoti kwati kwati negwenzi raiva pajinga penzira. Anoti achangoti tonono ipapo imwe pfungwa yake yakamuti inda nechemberi sumuka ipapo vasati vavakusvika. Anosumuka ndokumanya achidzoka kumashure akabva anoti seri kwerimwevo dombo

kwati kwati.

Anonzwa vana Dapi vachitaura vachiuya
nekwaaiva.

"Dapi rega ndimbotsauko
usazonyanyofambisaka" anotaura
Madzore achiratidza kuti zvamukurira.

"Ukaita chinono sechembere
unondibatira mberi chimbidza inda seri
kwedombo iri" anotaura Dapi
achitopfuura. Madzore anotsveta
zvombo pasi achibva ati tonono aiita
kunge anonzwa mudumbu. Akaita
kudurura sekamwana kari kumera
mazino" . Rujeko akabva ati dzawira
mutswanda. Anoita kukwakuka achibva
paaiva ndiye huro yaMadzore dzvi-i.
Anoregedzera bakatwa panhongonya

richibva rati zvata kunyura rese. Rumwe
ruoko rwake rwainge rwakabata
gurokuro ainge akaita kunyudza nzwara
dzake achibva akwachura gurokuro.
Madzore haana kumboti wa-a. Akafa
akanyarara segwai. Achipedza izvi
akabva avhomora bakatwa rake
panhongoya ya Madzore anomupfira
kumeso ndokusumudza musoro wake
anougadzika pamusoro petsvina yake
ndokutsika shaya yake, unzwe svina
yacho, yainhuhwa kunge nyama yakaora.
Haana kuda kuinda kuna Dapi, Rujeko
anononga zvombo zvaMadzore
ndokubva abereka dati remiseve
kumusana pfumo nebakatwa zviru
mumaoko. Anomanya achidzoka

kudumba kwaGonamavende. Anoti
achisvika muchivanze , anotanga
kufamba achiita zvishoma zvishoma
dzamara asvika pagonhi
reGonamavende. Anodongorera
nepahwangwaridzo sezvo rainjenjemera
gonhi racho. Anoona Gonamavende
achibvisa Chenai nhembe dzese
ndokumuradzika pasi. Akamutsamirisa
panerimwe zinhava raiva nemanhenga
edendera. Achipedza iye akabva abvisa
shashiko nemhapa asi zvumha akasara
ainazvo. Zvainge zvakazara muchiuno
nemusoro zvimwe zvaiva
zvakachinjikidzwa nemudumbu.
Zvairatidza kuti midzi yaainge amwa
yainge yoshanda, nekuti Rujeko

zvaakaona zvaikunda ngoma kurira.
Chenai airatidza kuti hapana chaanga
achaziva asi ainge akatosvunura hake .
Mwana ainge adzimaizwa na
Gonamavende. Nguva iyi aitotsenga
rakaita kunge gavi. Akabva atoti
pamusoro pa Chenai kata richiita
kuwira kunge munhu ari kusvetukira
mudziva , zvairatidza kuti pfungwa
dzake dzava panzvimbo imwe chete.
Rujeko achiona izvi anorova gonhi
negumbo zvine ukasha richibva
ranorova musana wa Gonamavende uyo
akavhunduka kunge munhu adirwa
mvura inopisa achiridza mhere. Ndiye
dzi- i kwakadero uko . Rujeko
anoregedza pfumo rake Gonamavende

anowaruka paanga akamira asi akadya
manonoko pfumo rakabva ranoti
muchidya pitipiti. Richibva rabudira seri.

"Nhasi kamba yasongana neanedemo,
ndirikukubvisa chiri kumeso izvezvi.
Handina akawanda newe muroyi
wombonora zvose zvawaita mwana uyu"
anotaura Rujeko akabata huro ya
Gonamavende akaisa bakatwa rake.

Gonamavende anotanga aseka
kwekanguva ndokubva anyarara
anotanga kufemedzereka.

"Kana uchida upenyu hwako ndiregedze
musikana ndipedzise zvandanga
ndichida kuita zvimwe tozoita" anotaura
Gonamavende. "Handisi kutamba newe
unonzwa here nguva handina yekuswero

taurirwa newe ngano" anotaura Rujeko
achibva atsika Gonamavende pakati
pemakumbo ake. rinoridza mhere
yakazungunutsa dumba.

"Usandiuraya mira ndiombonore
usandiuraya kani" anodaidzira
Gonamavende.

"Wanonoka nguva yandanga ndichada"
anotaura Rujeko achibva avhomora
pfumo rake pachidya paya anobata
sikarudzi ndokudambura nebakatwa
rake Gonamavende anokwamatata
achishanyarika ari pasi ropa richibuda
senhongo yabaiwa.

Anobaira bakatwa rake muhudyu
ndokupfekedza Chenai nhembe dzake,
achipedza anobuda naye panze

akamudzvara pafudzi. Anosunga gonhi
ndokutora moto waiva panze achibva
apisa dumba iri uku Gonamavende
aingokwamatata. Rujeko achipedza izvi
anosumudza Chenai ndokumuisa
pafudzi anotanga kufamba achibuda
muchivanzwe ichi. Achingoti kunze
kwacho anoona hwitakwi nhatu
dzichibva nemberi kwake.....

Hana yaChebamba yainge yobika
manhanga. Ukuwo zuva rainge rapinda
munamai varo. "Haikona kutya

Chebamba muno umu munoda munhu akashinga kwazvo" vanotaura mambo Chirambadare varimberi vakabata tsvatsva vachipinda muninga.

"Ndazvinzwa sekuru" anodavira nezevezeve asi aicheuka mativi ose nekumashure. Vanoti vati fambe fambe vakabva vasvika paiva nenzira mbiri. Mambo vakabva vamira ndokuti.

"Chebamba muzukuru , unoona ninga ino ine nzira mbiri kana wasvika pano. Iyi nzira ndiyo yaunozoinda nemhomho yose yevanhu kana dunhu richida kuparadzwa nemuvengi. Mese munokwana nezvekudya yakakura ninga iyoyi. Handiti unonzwa here muzukuru" vanotaura mambo. "Hongu sekuru

ririmunzeve" anodavira. "Zvakanaka nditevere" vanotaura mambo ndokubva vatora nzira yekurudyi ninga yakatanga kudzoka kuita nhete zvokuti vaitopinda nedivi, pamwe pachosaitozokotamira , kumira chaiko kwainge kusingaiti.

Vakati vati fambe fambe ndipo payakatanga kufaranuka ninga iya uye vainge vofamba vakamira. Nenguva isipi vainge vasvika."Mira pano apa Chebamba ndiite chikaranga".

Vanotaura, Chebamba anomira asi aidedera. Mambo vakafamba kuinda mberi vanotanga kubatidza tsvatsva dzaivamo uku dzaisvika gumi. Ninga yose yakabva yati ngwe-e kunge masikati. Mambo vanodzoka paiva na

Chebamba uyo aiona zvigaro
zvemabwe zvaiva uku asi zvaiva
zvakaagarwa nezvitunha zvakaomeswa
zvainge zvakaderekedzana uye zviine
ngohwani yehumambo , pamapfudzi
paiva pakazendamiswa mapfumo.
Mambo Chirambadare vakabva
vachonjomara pamwe na Chebamba
vakatanga kuuchira uku vachidetemba.

*"Ee-e vadzimu vangu, Chirambadare
huripane pfumo ndimi makadaro
tikasunga rimwe chete. Zvino nhasi ini
ndauya nenyana renyu kwamuri
sechitsidzo chedare ramakasiya
mapanga. Mutambireiwo nemaviri
azvipira kuchenesa dunhu renyu*

*vadzimu iro rakaondongwa kare. Asi
Chebamba azviramba. Muringei nguva
dzose dzamara akunda muhondo dzese
dzakamutarisa , ini ndangova hari
yofanzirofa nyama isisina muto.
Musazokotsira kwamuri nyikadzimu"*

Vanotaura mambo Chirambadare
hapana chavakasiya. Vachipedza izvi
ninga yose inobva yatinhira pamwe
nekuzununguka uye manzwi
akanzwikirwa kure kure achiridza
mhururu pamwe nehosho. Mambo
vachinzwa izvi vakabva vaziva kuti
vadzimu vatambira muzukuru wavo
ndokubva vasimuka. Vanofamba
vachiinda panechimwe chigaro

chaivamberi chaiva nechimwe chitunha
chakagadzikwa . Zvairatidza kuti ndivo
mambo vakapedzisira kufa. Mambo
Chirambadare vakabva vasviko tora hari
yaiva mberi kwacho yaiva nemvura.

"Huya upfugame apa mberi kwamambo
ava" vanotaura mambo. Chebamba
haana raakataura akasimuka ndokubva
anochonjomara mberi akatarisana ne
mushakabvu uya. Mambo vanodira
Chebamba mvura yaiva muhari iya yese
vachipedza vanoikwidibira. Vanotora
pfumo raiva pabendekete
remushakabvu ndokutambidza
Chebamba, vanotora ra Chebamba
ndokuisa pa bendekete remushakabvu.

"Pfumo iri ndiro rauchashandisa

Chebamba. Ava ndivo baba vangu uye ndomambo vakapedzisira kufa ndini ndakavaviga. Handiti unoona chigaro ichi chinotevera chisina munhu ndipo pauchandiisa. Iwe chakowo icho chinotevera. Zvandaita wazviona ndozvauchaitawo achatevera shure kwako. Mvura iyi ndeyekuti hana yako isimbe uve nehushingi. Ini ndikazoshevedzwa unotora mvura woisa muhari iyo iri apo mvura yacho inochera apo wogadzika mberi kwangu sezvanga zvakaitwa pano ndapedza une chekutura here" vanotaura mambo.

"Chekutura handina nekuti zvese mapedza" anotaura Chebamba.

"Zvakanaka muzukuru ngatichiindai

nguva yatatora muno yakakurisa
kwazvo" vanotaura mambo.

Vaviri ava vakabva vatobuda muninga
umu. Vachingoti panze vakaona kunze
kwava kutoyedza. Chebamba anovhara
ninga sezvayanga iri pakutanga
ndokubva vafamba nhereka vachidzika
gomo. Vachingoti pasi vakabva
vambozorora kwekanguva
ndokuchizofamba vodzoka kumuzinda.
Zuva rakatozobuda vavakuzvika kusiwo
diki.

"Mambo nyama dzangu dziri kutaura
kuti mberi hakuna kumira zvakanaka"
anotaura Chebamba achibva amira.

"Unorevei Chebamba" vanobvunza
mambo.

Asi chebamba haana kudavira vanoti
fambe fambe vavakusvika pasuwo
vakabva vaona madzimba emombe
mbudzi makwai uye madzimba evanhu
akawanda kwazvo. Mambo
vanodzungudza pamwe na iye
Chebamba .

"Ndiri kuresva kuona here Chebamba"
vanobvunza mambo.

"Pamwe ndini ndirikurota nekuti-----",
haana kupedza mashoko ake akabva
anongwa miseve miviri yaiva mberi
kwake asi yaiva neropa. Anounan'anidza
ndokubva aona miseve iyi yakafanana
nemuseve waiva na Rujeko. Musoro
wake wakatanga kuvira achibva arovera
pfumo rake pasi.

'Kureva here kuti Rujeko muvengi wangu?
Kureva kuti paya aindibata kumeso
handiti achiziva hake kuti itsori yaitouya
kusora muzinda wangu' anotaurira
mumoyo make aisada kuti sekuru vake
vazive kuti miseve iyi aiziva .

"Vanhu ava vatoinda sekuru. Zviripo imi
pindai mumuzinda , asi chandinoda
kuziva nechekuti Chenai mupenyu here
uye mbuya vangu vapenyu here kozoti
musikana ari mumuzinda Rujeko arimo
here. Kana asimo chete panokamwa
imbwa . Chiindai sekuru tingaswera
kurovera mbambo pachitehwe cheshindi
tosongana mberi handidi kuonekwa asi
ndirikuuya kana kutokutangirai kupinda
mumuzinda" anotaura Chebamba chiso

chakazara mananda mananda anobva
aparadzana namambo shungu dzichiita
kuvira . Zvaiva pachena izvi kuti Rujeko
ndiye aparadza dunhu nekuda
kwemiseve yake yakafanana neyaaona
Chebamba.

CHIZIVISO

***Book redu rava kutengeswa kubva pa
SEASON 2 inova CHAPTER 21***

***Book rino harichauyi kumagroups ose
ose amuri rava kuuya mugroup richange***

richinzi Subgroup

Kuti iwewe upinde muSubgroup

bhadhara Mari yako ndobva ndakuisa

kusubgroup kwamuchange muchiriwana

zuva rega rega , Ndokumbirawo kuti

unzwisire zvakanyorwa kwete kuita

zvisina kunyorwa.

Mutengo webook ndeuyu

Variku nZim 1500rtgs

Isa mari yako apa

0774512473 zita PHIBION M

\$2 Inn bucks 0774512473 P. M

*Variku _S A_ tine mhandu mhatu
dzekubhathara nadzo book redu saka
iwewe unosarudza kuti unoda
kubhathara sei*

*1. Vane mukuru card itai Transfer
50rand muCard reMukuru pa +27
659767960 zita N.Marira*

2. Vasina Mukuru shandisa

FNB:::Acc number 62330752496

Branch Code 250655

Acc Name TD Shiri

Or E wallet +27 659767960

*kune wese Ari kuneimwe nyika send
50rand nemukuru to +27
659767960zita N.Marira*

*Kana pane asina kunzwisisa huya
kuinbox kwangu panumber idzi, Uye
ndidzo dzamunoisa ma sreen short idzo*

0714160957

0774512473

Tosangana ku subgroup

By PHIBIE

KUPERA KWECHITSAUKO 20